




AUG. 7430







DISTRACTIONES  
ITINERANTIUM

PIÆ, JUCUNDÆ, ERUDITÆ,  
CUM VALIDO PRÆSIDIO

DIVORUM CÆLITUM

ET ELENCHO ITINERUM AD PRÆCIPUA  
LOCA ORBIS TERRARUM,

*Suppeditatæ*  
*PIIS ET CURIOSIS VIATORIBUS*


à R. P. JOANNE DREWS S. J.

*Pruteno - Varmienfi.*

ad vitandum in itinere, laetandum Tem-  
pus, & feliciter conficienda Itinera.

SECUNDA EDITIO

*duplex Corollario aucta.*




BRUNSBERGÆ

*Typis Collegij Societatis JESU*  
ANNO MDCC VII.

Videte Fratres, quomo-  
do cautè ambuletis: non  
quasi insipientes, sed ut sa-  
pientes; redimentes tempus:  
quoniam dies mali sunt.

*Ephes. 5. 15.*



*Aug 7430*

*Ad Perillust. & Rndmum D,*  
*D. LAURENTIUM*  
*JOSEPHUM*  
*à Bułovice*

**N Y C Z**

*Canonicum Varmiensem,*  
*&c. &c.*

**C**omplura sunt, quæ nos assidue  
exercent, fatigantq; Itinera  
Perill. Rndme D, Patrone Muni-  
ficentissime. Imus, ferimur, rapi-  
mur diurni nocturniq; terrâ ma-  
riq; Viatores. Imus, motu proprio,  
in negotijs ultro susceptis; ferimur  
Majorum imperijs; rapimur no-  
lentes volentes temporum impetu,  
& irrefragabilis destinationis Di-  
vine fato. Omnia ( præter Moto-  
rem primum, qui immotus omnia  
movet ) sunt in motu perpetuo:  
quem Matheſis aſſequi non poteſt,



patimur omnes. Caterum cū hu-  
jusmodi motus innumeris obnoxij  
sint periculis, casibus & infortu-  
niis, tædiis & mœroribus: in id o-  
pellam meam conferre statui; ut  
Viatores ad manum haberent op-  
portunas quasdam Distractiōes,  
& parata Præsidia; quibus in dif-  
ficultatibus & periculis muniren-  
tur. Ut verò hæ ipsæ pagellæ expe-  
ditum haberent iter in lucem &  
orbem dum sollicitus investigo Pa-  
tronum: sine mora magnis occur-  
risti passibus, indefessus & fortu-  
natus in amplissimis itineribus &  
terrarum, & literarum, & vir-  
tutum & honorum, Viator. Ter-  
restria itinera, quàm frequens su-  
scepisti, & suscipis, non tam pri-  
vatæ rei, quàm Ecclesiæ, Princi-  
pum, & patriæ causâ; tam felici-  
ter absolvisti; illisq; perennatura  
impressisti vestigia fidelis & in  
du-



industrij Oeconomi, Sapientis Commissarij, Æquissimi Arbitri. In Artium liberalium, & sublimiorum Scientiarum studijs, qua laude decurreris: testatur eximia E-ruditio in celebrioribus Athenais & universitatibus comparata; qua Principum calamum & linguam agere meruisti; nec minore gloria, quàm gratiâ, egisti. Arduas Virtutis vias quàm forti constantiq; pede impiger triveris: prædicat sine assentatione fama, testatur Principum & populorum Amor, extollunt virtutum pedissequi honores. In lubricis Honorum collibus quàm prudenter solideq; sis versatus: docent alij post alios, pulchrâ serie, & non volatu, sed non minus multo pretiosiq; labore, quàm avitæ Nobilitatis suffragio, obtenti? præsertim quando recen-ter ex inclytæ Collegiæ Gutsta-diensis Ecclesiæ colle, ad montem

*Cathedralis Varmiensis non tam  
ascendiſti, vel eluctatus es, quam  
Principis impulſu, & ardentibus  
ſuffragantium votis raptus es.  
Hunc montem non fore tibi Her-  
culeam, ſed Carolinam Columnam  
non vani auguramur. Ibis Plus  
ultra Avitæ Soleæ, & proprio-  
rum meritorum bonorumq; paſſi-  
bus: donec (utinam ſero!) in  
Domo beatæ Æternitatis conqui-  
eſcas glorioſus Comprehenſor. In-  
terim non dedignaberis ſolita hu-  
manitate in ſocietatem glorioſo-  
rum Itinerum tuorum comites ad-  
mittere diſtractiones meas, &  
Divorum oblata Præſidia: quibus  
proſperum, ſecurum & jucundum  
Tibi, pluribusq; alijs tuâ Beneficen-  
tia, faciat iter omne DEUS ſalutari-  
um noſtrorum. Ita vobet animitus  
Brunſbergæ, Anno 1701. 15. Julij.*

*Per illuſtris ac Rndmæ Dñis Veſtræ.  
ſervus addiſtiſſimus Joannes Drews S.I.*

## APPROBATIO

**L**ibellum huncce Politico-Spiritua-  
lem, cui titulus *Distractiones Iti-  
nerantium, pie, jucunda &c.* studio &  
operâ Admodum R. P. JOANNIS DREWS  
Soc: JESU, Sacræ Theologiæ Docto-  
ris concinnatum, uti talem, qualem  
Author indigitat, dignissimum cen-  
seo, quî publicæ luci exponatur. In  
quorum fidem &c. Datum ad Eccle-  
siam Cathedralē Varmiensē die 22<sup>a</sup>  
mensis Julij, Anno 1701.

JOANNES GEORGIUS KUINIGK

J. U. D. Cantor Vicarius & Officialis  
Generalis Varmiēsis, Pultoviēsis Ca-  
nonicus &c.

mppa.

---

## FACULTAS

R. P. Provincialis.

**C**um Librum, qui inscribitur *Distra-  
ctiones Itinerantium &c.* conscrip-  
tum à R. P. JOANNE DREWS nostræ  
Soc: Sacerdote. *Theologi aliquot ejus-  
dem*

*dem Societatis recognoverint, & in lucem fructuosè edi posse judicaverint; potestate mihi factâ ab Adm R P. N. Thyrso Gonzalez, Præposito Generali, concedo: ut Typis mandetur, si ijs, ad quos pertinet, videbitur. In cujus rei fidem has Literas manu mea subscriptas & Officij sigillo munitas dedi Grodnæ 1701. 29. Junij.*

TOBIAS ARENT

Præpositus per Provinciam Litvaniam,  
Societatis JESU.

*mppa.*

---

PROTESTATIO AUTHORIS.

**O**Mnia & singula, quæ in hoc Opusculo traduntur de Sanctis alijsq; Virtute illustribus Personis; intelligo humanâ solum fide nixa & accipi volo plenè juxta decretum Urbani VIII. Pont; Max; 5. Julij, 1631.

DI-





## DISTRACTIO I.

*Per Orationem frequentem.*

**O**pportunissima Viatoribus, & ju-  
re primo loco ponenda est  
hæc Distractio. Cùm enim  
familiare sit quibusvis mœrore vel tæ-  
dio aut lassitudine laborantibus, distra-  
here gravatum animum familiari con-  
versatione cum amicorum aliquo; Ora-  
tionem autem passim Ascetæ cum S.  
Joanne Chrysoſt: & S Joanne Climaco  
Grad. 38. definiant; quòd sit *Familia-  
ris conversatio, & conjunctio hominis  
cum DEO*, qui nobis & Amicus amicis-  
simus, & Pater, & Mater, & Omnia  
est. nihil opportunius Viatori probo  
esse potest frequenti elevatione mentis  
ad DEUM & Oratione devotâ. Ha-  
bet hæc & jucunditatis multum, &  
præsidij plurimum adversus occurrentia

pericula, & insultus hostium visibilium & invisibilium. Solent isti vel maxime infesti esse gaudentibus otio, quo pingviore fruuntur Viatores; & ipsa mens nostra honestis occupationibus non distracta, facile admittit, quæ aliunde ingeruntur, imò ipsa in quasvis ineptias dissolvitur, ut notavit S. Laurentius Justin: lib. de agone Christi c. 6. *Mens, si quando Oratione, aliâve occupatione honestâ, neglectâ, cœpit à sua custodia dormire: repente cupiditatibus fræna laxantur, & immundis cogitationibus aditus reſeratur.* Si ergo ad omnes pertinet, & ubivis locorum, illud Salvatoris nostri monitum Luc. 18. *Oportet semper orare, & nunquam deficere:* Viatores imprimis concernat, est necesse. *Plena sunt omnia periculis, plena laqueis;* ait S. Leo Serm 5 de Quadrag. non dormiunt, neque dormitant, sive meridiana, sive vespertina nocturnaque, aut matutina dæmonia, in perniciem nostram ubique ac specialiter in itineribus, intentissima. Nisi Dominus, devota oratione

interpellatus in adiutorium nostrum intendat, & ad adjuvandos festinet: facile in corpore & anima gravia accipere possumus detrimenta. Manifestius id fiet exemplis.

Cùm ad Provinciale Capitulum in Germaniam proficisceretur B. Henricus Suso, Ord. Præd. vir quidam pius, ipsi amicissimus, vidit in spiritu, dæmones duos à facie Domini egressos (ut olim Satan contra Job) ut Henricum, permittente DEO quàm possent acerbissimè exagitant. Et præstiterunt id cumulatè tum per Fratres quosdam, qui innocentem diris calumnijs in Capitulo infamarunt; tum gravibus morbis concitatis: ut simul in corpore & animo torqueretur, ac fere opprimeretur *Surius in vita 25. Jan. c. 25.* Non desunt DEO rationabiles causæ, ob quas subinde malignis Spiritibus plusculum potestatis in nos tribuit, sive ut peccata castiget, sive ut virtutem coronet. Orandus igitur: ut periclitantibus paternam manum porrigat, & faciat cum tentatione proventum.

Româ Viennam ad Ferdinandum II. Imp. ex mandato Summi Pontificis, licet æger, proficiscebatur P. Dominicus à JESU MARIA, Carmel. Discalc. Et ecce videt dæmonum ingentem copiam confluentem, & consultantem, quomodo hoc illius iter impedire possent. Cum sententijs dissiderent, nec certi aliquid concludere possent: exurgens ferocior unus, *discedat sanè*, ajebat: *faxo, ut brevi eum pœniteat itineris suscepti* Nec defuit promissis; miris variisque modis exagitando infirmum viatorem. Jam mulos, quibus vehebatur, terrefactos per invia & devia ajebat: jam everfam lecticam in fossas profundas & aquâ plenas, præcipirabat, jam alia objiciebat impedimenta; ut Sanctum vel ad reditum compelleret, vel ad impatientiam concitaret. Sed ex tota vexatione nihil tulit lucri, plurimum confusionis; quòd unum infirmum virum, solâ Oratione & Patientiâ munitum, debellare non potuisset. *Cochem lib. 3. Histor.*




Alijs artibus aggressi sunt Orci satellites, ac ferè æternum perdiderunt B. Ægidium Ord. Præd. dum juvenis genere, ac opibus, & ingenio florentissimus, ex Hispania tenderet Parisios, ad animum sublimioribus scientijs excolendum. In via, quasi fortuito, se ipsi adjunxit non nemo, ut videbatur, non è postrema nobilitate; ijsque humanitatis officijs sese insinuavit in familiaritatem Ægidij: ut hic illum assumeret in lecticam suam. Ibi his illisve mistis sermonibus, veterator infernalis ita incautum juvenem circumvenit, eoque deduxit; ut relicto itinere Parisiensi, Toletum deflecteret, scholam Magicam, ejurato DEO frequentaret, donec vitijs quàm scientiâ plenior, post septennium Doctorali laureâ in ea arte donaretur. Perierat æternum miser: nisi misericors & miserator Dominus in manu forti ex abyssso scelerum eduxisset pereuntem; prout latius prosequor in Breviario meo Ascetico *fer. 5. post Dom. 3. & fer. 2. post Dom. 17. à Pentec.*

Nimirum, ut pridem notavit S. Chrysoſt. lib. I. de orando DEO: *Sce-  
leratiſſimi ſpiritus continenter obambu-  
lant, obſervantes nos: ut ſi quem depre-  
benderint nudatum deprecationis præſi-  
dio, protinus abripiant: primùm qui-  
dem in cogitationes otioſas, deinde in  
periculoſas, tandem in malas, tum in  
cupiditates pravas, denique in gravia  
delicta, &, quæ ſequitur, perditionem.*  
Ex his igitur manifeſtum eſt, quàm ſit  
neceſſaria itinerantibus Oratio.

Quàm verò eadem ſit Jucunda, ſi  
rite iſtituatur: experienciâ magis,  
quàm rationibus diſcitur. Quid enim  
jucundius accidere poteſt mendico;  
quàm ad ejus divitis fores mendicare,  
qui totus eſt charitas, & miſericordia;  
Quid jucundius infirmo; quàm illi me-  
dico detegere infirmitatem ſuam, qui  
ſolo verbo poteſt quemvis depellere  
morbum? Quid jucundius periclitanti;  
quàm illius opem implorare, qui &  
poteſt, & vult juvare, dummodo hu-  
militate & fiduciâ ſincerâ invocetur?  
Talis eſt in gradu eminentiſſimo, imò

infinito, DEUS noster. *Omnia quaecunque orantes petitis, credite, quia accipietis; & evenient*, inquit ipse Marc. 11. Unde concludit S. Chrysostomus hom. 19. *Oratio mæroris omnis refugium, hilaritatis argumentum, occasio perpetuæ voluptatis est.* Patebit amplius ex Distractione seq.

Porro inter Orationes Viatoribus familiares, magisque proficuas, primas obtinet *Intentio recta*: quâ offertur DEO præsens iter, & omnes ac singulæ passus, in unione itinerum Christi, ex motivo charitatis, obedientiæ &c. cum omnibus molestiis, quæ occurrent. Deinde recitatur *Itinerarium*, ab Ecclesia pro Clericis concinnatum, sed omnibus accommodatissimum. Addi solent Litanæ de OO. Sanctis: ut contra vim, dolos, & insidias hostium visibilibus & invisibilibus, contra varios alios incurfus & casus, tutius communi-  
 niamur; Castra DEI Viventis  
 opportunè opposcentes satellitibus Orci.



## ITINERARIUM.

*Initio Itineris quotidie devotè dicendum*

*Antiphona: In viam pacis.*

*Canticum.*

**B**enedictus Dominus DEUS  
Israël, quia visitavit, & fecit  
redemptionem plebis suæ.

Et erexit cornu salutis nobis,  
in domo David pueri sui.

Sicut locutus est per os San-  
ctorum, qui à sæculo sunt, Pro-  
phetarum ejus.

Salutem ex inimicis nostris, &  
de manu omniū, qui oderunt nos.

Ad faciendam misericordiam  
cum Patribus nostris: & memo-  
rari testamenti sui sancti.

Jusjurandum, quod juravit  
ad Abraham Patrem nostrum,  
daturum se nobis.

Ut sine timore, de manu ini-  
micorum nostrorum liberati, ser-  
viamus illi.

In



In sanctitate & iustitia coram ipso, omnibus diebus nostris.

Et tu puer Propheta Altissimi vocaberis, præibis enim ante faciem Domini, parare vias ejus.

Ad dandam scientiam salutis plebi ejus in remissionem peccatorum eorum.

Per viscera misericordiæ DEI nostri, in quibus visitavit nos, oriens ex alto.

Illuminare his, qui in tenebris & in umbra mortis sedent: ad dirigendos pedes nostros in viam pacis.

Gloria Patri &c.

*Antiphona.*

In viam pacis & prosperitatis dirigat nos omnipotens & misericors Dominus, & Angelus Raphaël comitetur nobiscum in via; ut cum pace, salute, & gaudio

revertâmur ad propria. Kyrie  
eleison. Christe eleison. Kyrie  
eleison. Pater noster *secretò*.

*V.* Et ne nos inducas in tenta-  
tionem. *R.* Sed libera nos à  
malo.

*V.* Salvos fac servos tuos. *R.*  
DEUS meus sprantes in te.

*V.* Mitte nobis Domine auxi-  
lium de Sancto. *R.* Et de Sion  
tuère nos.

*V.* Esto nobis Domine turris  
fortitudinis. *R.* A facie inimici.

*V.* Nihil proficiat inimicus in  
nobis. *R.* Et filius iniquitatis non  
apponat nocere nobis.

*V.* Benedictus Dóminus die  
quotidie. *R.* Prosperum iter fa-  
ciat nobis DEUS salutarium no-  
stròrum.

*V.* Vias tuas Dómine démon-  
stra nobis. *R.* Et fémitas tuas  
édoce nos.

*V.* Uti-

*V.* Utinam dirigántur viæ nostræ. *R.* Ad custodiéndas justificationes tuas.

*V.* Erunt prava in directâ. *R.* Et áspera in vias planas.

*V.* Angelis suis DEUS mandavit de te. *R.* Ut custódiant te in omnibus vijs tuis.

*V.* Domine exáudi oratióem meam. *R.* Et clamor meus ad te véniat.

*V.* Dóminus vobiscum. *R.* Et cum spiritu tuo.

*ORATIO.*

**D**EUS, qui filios Isràél per maris médium sicco vestígio ire fecisti, quique tribus Magis iter ad te, stellâ duce pandisti: tribue nobis quæsumus iter prósperum tempúsque tranquillum: ut Angelo tuo sancto comite, ad eum quó pergimus locum, ac

demum ad æternæ salûtis portum  
pervenire feliciter valeâmus.

**D**DUS, qui Abraham puerum  
tuum de Ur Chaldæorum  
eductum per omnes suæ pere-  
grinationis vias illæsum custo-  
disti: quæsumus, ut nos famulos  
tuos custodire digneris: esto no-  
bis Domine in procinctu suffra-  
gium, in via solatium: in æstu  
umbraculum, in pluvia & frigore  
tegumentum, in lassitudine vehi-  
culum, in adversitate præsidium,  
in lubrico baculus, in naufragio  
portus, ut te duce, quô tendi-  
mus, prosperè perveniamus, &  
demum incolumes ad propria  
redeâmus.

**A** Desto, quæsumus Domine,  
supplicationibus nostris: &  
viam famulorum tuorum in sa-  
lutis tuæ prosperitare dispône,  
ut

ut inter omnes viæ & vitæ hujus  
varietates tuo semper protega-  
mur auxilio.

**I**Ræsta quæsumus omnipotens  
**DEUS**: ut familia tua per  
viam salutis incedat, & beati  
Joannis Præcursoris hortamenta  
sestendo, ad eum, quem præ-  
dixit, secura perveniat Domi-  
num nostrum **JESUM** Chri-  
stum Filium tuum: Qui tecum  
vivit & regnat in unitate Spiritûs  
sancti **DEUS**, per omnia sæcula  
sæculorum. *R. Amen.*

*V. Procedamus in pace,*

*R. In nomine Domini, Amen:*

### **LITANIÆ**

#### **DE OMNIBUS SANCTIS.**

**K**Yrie eleison. Christe eleison.  
Kyrie eleison.

Christe audi nos. Christe exaudi  
nos.



Pater de cœlis DEUS, Miserere  
nobis.

Fili Redemptor mundi DEUS,  
Miserere nobis,

Spiritus sancte DEUS, Miserere  
nobis

Sancta Trinitas unus DEUS,  
Miserere nobis.

Sancta MARIA,

S. DEI Genitrix,

S. Virgo Virginum;

S. Michâél,

S. Gabriel,

S. Raphaél,

Omnes sancti Angeli & Archan-  
geli, Orate pro nobis.

Omnes sancti beatorum Spiritu-  
um Ordines, Orate pro nobis.

S. Joannes Baptista, Ora pro no.

Omnes sancti Patriarchæ & Pro-  
phetæ, Orate pro nobis.

S. Petre, Ora pro nobis.

S. Pau-

[ Ora pro nobis.

S. Paule,  
S. Andrea,  
S. Jacobe,  
S. Joannes,  
S. Thoma,  
S. Jacobe,  
S. Philippe,  
S. Bartholomæe,  
S. Matthæe,  
S. Simon,  
S. Thaddæe,  
S. Mathia,  
S. Barnaba,  
S. Luca,  
S. Marce,

Ora pro nobis.

Omnes sancti Apostoli & Evangelistæ, Orate pro nobis.

Omnes SS. Discipuli Domini, Or.

Omnes SS. Innocentes, Orate.

S. Stephane, Ora pro nobis.

S. Laurenti, Ora pro nobis.

S. Vincenti, Ora pro nobis.

S. Fa-

SS. Fabiane & Sebastiane, Orate.

SS. Joannes & Paule, Orate.

SS. Cosma & Damiane, Orate.

SS. Gervasi & Protasi, Orate.

Omnes sancti Martyres, Orate.

S. Silvester,

S. Gregori,

S. Ambrosi,

S. Augustine,

S. Hieronyme,

S. Martine,

S. Nicolæ,

Ora pro nobis.

Omnes sancti Pontifices & Confessores, Orate pro nobis.

Omnes sancti Doctores, Orate.

S. Antoni,

S. Benedicte,

S. Bernarde,

S. Dominice,

S. Francisce,

Ora pro nobis.

Omnes sancti Sacerdotes & Levitæ, Orate pro nobis.

Omnes

Omnes sancti Monachi, & Eremitæ, Orate pro nobis.

S. Maria Magdalena,

S. Agatha,

S. Lucia,

S. Agnes,

S. Cæcilia,

S. Catharina,

S. Anastasia,

Ora pro nobis.

Omnes sanctæ Virgines & Viduæ,  
Intercedite pro nobis.

Omnes Sancti & Sanctæ DEI;  
Intercedite pro nobis.

Propitius esto, Parce nobis Domine.

Propitius esto, Exaudi nos Dne.

Ab omni malo,

Ab omni peccato,

Ab ira tua,

A subitanea & improvisa  
morte,

Ab insidijs diaboli,

Lib. nos Domine  
Ab

Ab ira, & odio, & omni mala  
 voluntate,  
 A spiritu fornicationis,  
 A fulgure & tempestate,  
 A morte perpetua,  
 Per myſterium ſanctæ incar-  
 nationis tuæ,  
 Per Adventum tuum,  
 Per nativitatem tuam,  
 Per baptiſmum & ſanctum  
 jejunium tuum,  
 Per crucem & paſſionem tuā,  
 Per mortem & ſepulturam  
 tuam,  
 Per ſanctam reſurrectionem  
 tuam,  
 Per admirabilem aſcenſionem  
 tuam,  
 Per adventum Spiritûs S. Pa-  
 In die judicij, (racleti,]  
 Peccatores, Te rogamus audi nos.  
 Ut nobis parcas, Te rogamus  
 audi nos, Ut

Libera nbs Domine.



- Ut nobis indulgeas ,  
Ut ad veram pœnitentiam  
nos perducere digneris ,  
Ut Ecclesiam tuam sanctam  
regere & conservare di-  
gneris ,  
Ut domnum Apostolicum &  
omnes Ecclesiasticos ordi-  
dines in sancta Religione  
conservare dignetis ,  
Ut inimicos sanctæ Ecclesiæ  
humiliare digneris ,  
Ut Regibus & Principibus Chri-  
stianis pacem & veram con-  
cordiam donare digneris ,  
Ut cuncto populo Christiano  
pacem & unitatem largiri  
digneris ,  
Ut nosmetipsos in tuo sancto  
servitio confortare & con-  
servare digneris ,  
Ut mentes nostras ad cœlestia  
desideria erigas ,

Te rogamus audi nos.

Ut

Ut omnibus benefactoribus  
nostris sempiterna bona re-  
tribuas,

Ut animas nostras, fratrum,  
propinquorum & benefa-  
ctorum nostrorum ab æ-  
terna damnatione eripias,

Ut fructus terræ dare & con-  
servare digneris,

Ut omnibus fidelibus defun-  
ctis requiem æternam do-  
nare digneris,

Ut nos exaudire digneris,

Fili DEI,

Te rogamus audi nos.

Agnus DEI, qui tollis peccata  
mundi, Parce nobis Domine.

Agnus DEI, qui tollis peccata  
mundi, Miserere nobis.

Agnus DEI, qui tollis peccata  
mundi, Exaudi nos Domine.

Christe audi nos. Christe exaudi  
nos. Kyrie eleison. Pater noster.

*Psal-*

*Psalmus 69.*

**D**EUS in adiutorium meum  
intende: Domine ad adju-  
vandum me festina.

Confundantur & reveariantur,  
qui quærunt animam meam.

Avertantur retrorsum & eru-  
bescant, qui volunt mihi mala.

Avertantur statim erubescen-  
tes, qui dicunt mihi Euge, euge.

Exultent & lætentur in te o-  
mnes, qui quærunt te; & dicant  
semper, magnificetur Dominus,  
qui diligunt salutare tuum.

Ego verò egenus & pauper  
sum: DEUS adjuva me.

Adjutor meus & liberator me-  
us es tu: Domine ne moreris.

Gloria Patri, &c.

*V.* Salvos fac servos tuos,

*R.* DEUS meus sperantes in te.

*V.* Esto nobis Domine turris for-  
titudinis,

- itudinis, *R.* A facie inimici.  
*V.* Nihil proficiat inimicus in nobis. *R.* Et filius iniquitatis non apponat nocere nobis.  
*V.* Domine non secundum peccata nostra facias nobis. *R.* Neque secundum iniquitates nostras retribuas nobis.  
*V.* Oremus pro Pontifice nostro *N.* *R.* Dominus conservet eum, & vivificet eum, & beatum faciat eum in terra, & non tradat eum in animam inimicorum ejus.  
*V.* Oremus pro Benefactoribus nostris, *R.* Retribuere dignare Domine, omnibus, nobis bona facientibus, propter nomen tuum vitam æternam, *A.*  
*V.* Oremus pro Fidelibus defunctis, *R.* Requiem æternam dona eis Domine, & lux perpetua luceat eis. *V.* Re-

*V.* Requiescant in pace. *R.* Am.

*V.* Pro fratribus nostris absentibus,  
*R.* Salvos fac servos tuos,  
DEUS meus sperantes in te.

*V.* Mitte eis Domine auxilium  
de sancto. *R.* Et de Sion tuere  
eos.

*V.* Domine exaudi orationem  
meam, *R.* Et clamor meus ad  
te veniat.

*V.* Dominus vobiscum, *R.* Et  
cum Spiritu tuo.

*ORATIO.*

**D**EUS, cui proprium est mi-  
sereri semper, & parcere,  
suscipe deprecationem nostram:  
ut nos, & omnes famulos tuos,  
quos delictorum catena constrin-  
git, miseratio tuæ pietatis ele-  
menter absolvat.

Exaudi, quæsumus Domine,  
supplicum preces, & confitentium  
tibi



tibi parce peccatis: ut pariter  
nobis indulgentiam tribuas beni-  
gnus & pacem.

Ineffabilem nobis Domine,  
misericordiam tuam clementer  
ostende; ut simul nos, & à pec-  
catis omnibus exuas, & à pœ-  
nis, quas pro his meremur eri-  
pias.

DEUS, qui culpâ offenderis,  
pœnitentiâ placaris; preces po-  
puli tui supplicantis propitius re-  
spice, & flagella tuæ iracundiæ,  
quæ pro peccatis nostris mere-  
mur, averte.

Omnipotens sempiterne Deus,  
miserere famulo tuo Pontifici no-  
stro N. & dirige eum, secundum  
tuam clementiam, in viam salu-  
tis æternæ; ut te donante tibi  
placita cupiat, & totâ virtute  
perficiat.

Quæ-

Quæsumus omnipotens DEUS,  
ut famulus tuus N. Rex noster,  
qui tuâ miseratione suscepit re-  
gni gubernacula ; virtutum etiam  
omnium percipiat incrementa ;  
quibus decenter ornatus, & vitio-  
rum monstra devitare, & ad te,  
qui via, veritas & vita es, gra-  
tiosus valeat pervenire.

DEUS, à quo sancta desideria,  
recta consilia, & iusta sunt ope-  
ra ; da servis tuis illam, quam  
mundus dare non potest, pacem ;  
ut & corda nostra mandatis tuis  
dedita, & hostium sublatâ formi-  
dine, tempora sint tuâ prote-  
ctione tranquilla.

Ure igne sancti Spiritûs renes  
nostros, & cor nostrum Domine :  
ut tibi casto corpore serviamus,  
& mundo corde placeamus.

Fidelium DEUS omnium Con-

B

ditor

ditor & Redemptor animabus famulorum famularumq; tuarum remissionem cunctorum tribue peccatorum : ut indulgentiam , quam semper optaverunt , pijs supplicationibus consequantur.

Actiões nostras , quæsumus Domine , aspirando præveni , & adjuvando prosequere , ut cuncta nostra oratio & operatio à te semper incipiat , & per te cœpta finiatur.

Omnipotens sempiterne DEus , qui vivorum dominaris simul & mortuorum , omniumque misere-  
ris , quos tuos fide & opere futuros esse prænoscis : te supplices exoramus , ut pro quibus effundere preces decrevimus , quosq; vel præsens sæculum adhuc in carne retinet , vel futurum jam exutos corpore suscepit , intercedentibus

dentibus omnibus Sanctis tuis,  
pietatis tuæ clementiâ, omnium  
delictorum suorum veniam con-  
sequantur. Per Dominum no-  
strum JESUM Christum Filium  
tuum; qui tecum vivit & regnat  
in unitate Spiritûs sancti DEUS;  
Per omnia sæcula sæculorum.  
*R. Amen.*

*V. Dominus vobiscum,*

*R. Et cum Spiritu tuo.*

*V. Exaudiat nos omnipotens &  
misericors Dominus. R. Amen.*

*V. Fidelium animæ per miseri-  
cordiam DEI requiescant in  
pace. R. Amen.*

*HYMNUS.*

**A**Ve Maris stella,  
DEI Mater alma,  
Atque semper Virgo,  
Felix cœli porta.

*Sumens illud Ave,  
Gabrielis ore,  
Funda nos in pace,  
Mutans Eve nomen.*

Solve vincla reis,  
Profer lumen cæcis,  
Mala nostra pelle,  
Bona cuncta posce.

*Monstra te esse Matrem,  
Sumat per te preces,  
Qui pro nobis natus,  
Tulit esse tuus.*

Virgo singularis,  
Inter omnes mitis,  
Nos culpis solutos,  
Mites fac & castos.

*Vitam præsta puram,  
Iter para tutum,  
Ut videntes JESUM,  
Semper collattemur.*

Sit Laus DEO Patri,  
Summo CHRISTO decus,

Spi-



Spiritui sancto ,  
Tribus honor unus.

Sub tuum præsidium confugi-  
mus S. DEI Genitrix , &c.

*V.* Ora pro nobis S. DEI Ge-  
nitrix. *R.* Ut digni efficiamur  
promissionibus Christi.

*ORATIO.*

**D**Efende quæsumus Domine ,  
B. M A R I A semper Virgine  
intercedente , istam ab omni ad-  
versitate familiam , & toto corde  
tibi prostratam , ab hostium pro-  
pitiis tuere clementer insidijs.

*V.* Adeste nobis SS. Angeli  
Custodes nostri. *R.* Defendite  
nos ab inimicis nostris.

**D**EUS , qui ineffabili Providentia SS.  
Angelos tuos ad nostram custodiam  
mittere dignaris , largire supplicibus  
tuis : & eorum semper protectione de-  
fendi , & æternâ societate gaudere. Per  
Christum Dominum , &c. Divinum au-  
xilium maneat semper nobiscum. Amen.

Quidam laudum DEIpæ V. studio-  
fiores, initio Litaniarum, post  
*Sancta Virgo Virginum*, subjungunt,  
*Mater Christi, Mater divinæ gratiæ, &c.*  
totasque decurrunt Litanias Laueta-  
nas, ulq; ad *Regina Sanctorum omnium*:  
tum prosequuntur Litanias de Omnibus  
Sanctis, dicendo: *Sancte Michâél, &c.*

Quanto exiguæ operæ pretio præ-  
dictis Litanij invocetur DEUS cum  
Sanctis suis: Compluribus constat ex-  
perimentis. Illarum solemni cantu  
inter supplicandum abacta est Româ  
horribilis pestifera lues, tempore S.  
Gregorij M. Iisdem Constantinopoli  
sedatus est funestus & diuturnus terræ  
motus: postquam ex revelatione cœ-  
litus accepta, jussi sunt incolæ conti-  
nuare Litanias illas, atque in fine hanc  
annectere clausulam: *Sancte DEUS,*  
*Sancte Fortis, Sancte Immortalis mise-*  
*rere nobis.* Dum in supremo agone  
Sanctæ Mechtildis solitis Litanij invo-  
carentur Sancti: Vidit S Gertrudis  
singulos ad pronunciatum Nomen su-  
um gaudio gestientes, exurgere; ac  
de-

demissos in genua, merita sua pro moriente offerre Divinæ Majestati. Religiosis S. Dominici tanto præsidio contra infestos variorum inimicorum insultus fuerunt eadem Litanæ: ut proverbio diceretur: *Cavete à Litanijs Fratrum Prædicatorum: Mira enim operantur* Barry in Anno S. 18. Jan. S. Chrysostomus hom. in Matt. *Habent, inquit, vim pro nobis, & quidem maximam, orationes supplicationesque Sanctorum: sed tunc profectò cum nos quoque id ipsum per Pœnitentiam postulamus, & ad studia meliora confugimus.* Juvat igitur, dum initio Litaniarum ad invocationem Divinarum Personarum, dicimus *Miserere nobis*; serio conatu actum elicere Contritionis, & non obiter id pronunciare.

Litanijs convenienter subjungunt multi trinam salutationem Angelicam, cum Antiphonis *Angelus Domini*, & c. in venerationem Incarnationis Dominicæ & DEIparæ V. Cujus devotionis tam studiosus fuit S. Carolus Borromæus: ut audito campanæ signo, quo-

cunque loco esset, quantumvis lutofo, genua humi poneret, salutaretque Virginem Matrem cum benedicto fructu ventris sui; ut tradit Novariensis in ejus Vita lib. 7.

Plures, easque non minùs jucundas, quàm fructuosas, Preces, ut Horas Canonicas, Rosaria & Coronas DEIPARÆ V. Officia varia, &c. suppeditabunt tum Gradus Sacerdotalis, tum Leges Sodalitatum, quibus nomina dedimus, tum privata devotio, & quæ hic sequentur, *Distractiones*. Illam S. Francisci Borgiæ, quem precum heluonem sanctum rectè dixeris, non præteriero industriam, qua usus est, dum ex mandato Pontificio cum Cardinali Alexandrino proficisceretur in Hispaniam. Cùm enim nonnulli nostrorum PP. Procuratorum in idem iter convenissent: Franciscus ita inter comites suos divisit horas precandi: ut totus dies perpetua esset oratio. Quod orandi institutum ita probavit Cardinalis: ut & ipse inter comitantem se Clerum pari modo tempora pre-

precandi distribuerit, non minus jucunda distractione, quàm DEO grata devotione. *Sacchinus hist. Soc. Part. 3. lib. 7. n. 14.* Plurium vices soli obibant P. Petrus Faber, unus è primis Societatis Decem viris, & Pater Balthasar Alvarez: quibus in itinere totì dies perpetua erant Oratio. P. Alvarez eo nomine libentiùs apprehendebat occasiones itinerandi, quòd in via liberalior esset copia orandi: id est, cum DEO sermocinandi, & contra quorumvis hostium incursus nos muniendi. Oratio debet esse continua: ut sicut nunquam deficit pugna, sic nunquam deponamus arma: inquit S. Bonavent. Serm. 27. de Confess.

## DISTRACTIO II.

*Per piam Meditationem.*

**I**Tinerarium cum Litanijis est opportuna quædam præmunitio contra hostiles incursus & adversos, qui per diem occurrere possunt, casus. Sic muniti colligamus mentem à cæteris sese ingerentibus objectis, ad instituendam



tuendam piam Meditationem: in qua non solum cellis inciusi Ascetæ, sed etiam per orbem discurrentes Viatores probi, insignem cum uberrimo fructu experiri solent voluptatem. Nam, ut notavit S. Laurentius Justinianus, de casto connubio c. 22. *Ex ipsius assiduitate stabilitur mens, purgantur cogitationes, solitudo sapit, delectat DEUS, ingenium acuitur, castificatur sensus, illustratur ratio, loquela restringitur, & animus ad alta suspenditur Ipsa est spiritualis inua orationis, per quam Verbum ab ingredientibus agnoscitur, & puris manibus honoratur. Quamdiu mentis oratio veraciter possidetur: tanquam oculi pupilla custodienda est, & velut quoddam spirituale depositum seruanda.*

Mentalis orationis, id est, Meditationis piæ, propria sunt magnifica illa, pariterq; dulcissima encomia, quæ passim SS. Patres tribuunt Orationi. Ut cum S. Bernardus apud Lud. Graneten: lib. 3 de Orat. c. 8 dicit: Orando bibitur vinum spirituale lætificans cor hominis, Vinum scilicet Spiritus S. quod

*per piam Meditationem.* 35

quod inebriat mentem, & carnalium voluptatum infundit oblivionem *Et iterum*: Nihil est, quod dulcius in hac vita sentitur, majore cum gaudio percipitur, corda hominum fortius ab amore terrenorum disjungit; nihil animum munit potentiùs, nihil hominem ad quævis bona opera facienda, & quamvis tribulationem perferendâ, reddit alacriorem, studio Contemplationis.

Hæc est Sapientia illa, de qua Eccl 4. 22 dicitur: *Beatus vir, qui in Sapientia morabitur, & qui in justitia sua meditabitur, & in jensu cogitabit circumspeditionem* DEL. Et Sap. 8. 16. Salomon captus admiratione & amore illius, *Intrans in domum meam, inquit, conquiescam cum illa Non enim habet amaritudinem conversatio illius, nec tædium conviçtus illius sed lætitiâ & gaudium.* Experiuntur hanc lætitiâ & gaudium non solùm in Contemplatione defixi Antonij & Arsenij: verùm etiam Lignerantes complures, quorum dum corpora feruntur per terras, Spiritus & conversatio est in coelis

De S. Carolo Borromæo, Antistitum Sacrorum gloriâ & ideâ, tradit Novariensis Episc. lib. 7. vitæ c. 14. quòd Itineris tempus ita consumebat; ut nisi quis interim audiendus, vel cum aliquo esset colloquendum; in rebus Divinis semper animum defigeret, atque ita raperetur: ut pene sensuum intermitterentur officia. In Deciana via cùm iter noctu, densissimis tenebris, faceret, & in foveas quasdam delapsus esset, mulâ super eum jacente: ita nihilominus meditatione absorptus erat; ut ne quidem de exitu cogitaret; donec comites accensis facibus regressi, eum nihil querentem, aut dicentem, extraherent madidum ac lutulentum, hilarem tamen animo & vultu. Interdum mula, quâ vehebatur, ita offendebar, ut procumberet: ipse verò nisi corrueret, nihil plerumq; animadvertibat. Nimirum ut Tertullianus dixit: *Nihil crus sentit in nervo, cui animus fixus est in cælo.*

Isdem cœlestibus contemplationis voluptatibus animum pascebat India-  
rum

rum Apostolus, S. Franciscus Xaverius, in Itinetibus maximè arduis. Quantumvis inediâ & laboribus exhaustum esset corpusculum, humeros gravaret sarcina cum apparatu sacro & necessarijs libellis, pedes crebris cruentarentur offendiculis, capiti & vitæ imminerent latronum pericula: ibat nihilominus intrepidus & gaudens; quia animum levavit super se & super humana omnia, per assiduam Meditationem conjunctus DEO. Contigit Goæ, quam Lusitani metropolim imperij in India Orientali habent, ut à meridie Proregem aditurus, in viam se daret Xaverius. Sed abstractâ à terrenis per Meditationem mente, varias urbis pererravit plateas, donec appetente nocte, admonitu comitis ad se redijt & aberrare aliquando sensit. Tum ad socium conversus; Alio die, inquit, cum Prorege agemus: hunc enim diem sibi DEUS vendicavit. *Thursellinus in Vita lib. 3. c. 14.* Felices dies, qui sic impenduntur DEO! Quàm non inanes, sed opulento alveo fluunt

in Oceanum beatæ æternitatis; & in  
pias mentes refundunt rivulos quosdam  
coelestis voluptatis!

Tam avidæ, famelicæ & sitibundæ  
sunt hujusmodi Meditationum animæ,  
quæ aliquando gustarunt, & viderunt,  
quàm suavis sit Dominus: ut non modò  
ingens occurrentium variorum obje-  
ctorum turba ipsas non impediat:  
verùm etiam ad quævis ingruentia,  
incommoda, detrimenta, imò & tor-  
menta quodammodo insensibiles sint,  
præterquam dum à mentali oratione  
avocantur. Consummatâ virtute tyro  
Societatis, Beatus Stanislaus Kostka,  
ita ad omnem Superiorum nutum se  
exhibebat morigerum, promptum &  
alacrem: ut nihil unquam ei obla-  
tum fuerit difficile; nemo viderit te-  
tricum aut tardum; imò elogium  
*Omnipotentis* meruerit apud Rectorem  
suum Julium Fatium. Cum verò va-  
letudinis causâ temperare ejus inten-  
tam assiduè in DEUM cogitationem,  
necesse foret: eamque ob rem jussus;  
esset ipatia orandi contrahere: vilis est,  
eâ

eâ superioris dispositione tangi. Arduum enim valde videbatur Angelico Juveni: in eum non esse assidue fixum mente, quem olim ulnis suis commisisset Virgo Mater. Sed qua erat heroica indole, mox illi Rectoris voluntati tam placidè acquievit: ut animi ejus perpetua beataque tranquillitas nullatenus commoveretur. *Sacchinus hist. Soc. lib 4 n. 82.*

Non dissimulavit similem sensum Veteranus in Christi militia S. Franciscus Borgia. Commendata erat cura valetudinis ejus, multâ mortificatione admodum attritæ, Marco cuidam laico Religioso. Venerabatur hominem, Franciscus promptissimâ obedientiâ in ijs, quæ ad corporis valetudinem pertinebant, non aliter ac summum Moderatorem. Ubi tamen, post horas aliquot in Oratione consumptas, Marcus monebat; ut desisteret! blandè querulus rogabat; *ut diutalè adhuc sinneret.* Orationem enim suam vocabat centrum: ira ferebatur ad illam; ita quiescebat in illa, & ægrè avellebatur



batur ab eâdem. *Idem lib. 8. n. 137.*  
 Degustant nimirum in ea animæ DEO  
 devotiores absconditum quoddam man-  
 na, quod illis inducit grave aliarum  
 cogitationum fastidium. Quod quia  
 delibavit etiam Vir secundum cor DEI;  
 fastidians cætera, *Meditatio*, inquit,  
*cordis mei in conspectu tuo semper*,  
 Psal. 18. 15. Etiam inter negotia re-  
 gni, etiam inter expeditiones belli;  
 tam in strato meo, quàm in vijs omni-  
 bus, *Meditatio cordis mei*, non minus  
 affectuosa, quàm attenta, *in conspectu*  
*tuo semper.*

Quod attinet ad Materiam Medita-  
 tionis: ea sumi potest sive ex Perfe-  
 ctionibus Divinis; sive ex Mysterijs  
 Fidei Christianæ, sive ex Vita Salva-  
 toris nostri DEI, præsertim Itineran-  
 tis; sive ex Virtutibus, quibus ege-  
 mus; sive vitijs, in quæ his circum-  
 stantijs pronior est lapsus; sive ex ob-  
 jectis occurrentibus, montibus, campis,  
 agris, fluminibus, &c. &c. ascendendo  
 ex illis ad DEUM, & moralia quædam  
 ad usum nostrum decerpando; sive ex  
 Bre-

*per Sacrificium divinum.* 41

Breviario meo Ascetico, ubi in singulos Anni dies suppeditavi Meditationes de DEO, JESU & MARIA Denique servire poterunt: quas infrà hic trado in singulos hebdomadæ dies.

### DISTRACTIO III.

*Per Sacrificium Divinum.*

**S**acrificium, quod in Lege Gratiæ Majestati supremæ offertur, non minus solatij & liquidissimæ voluptatis, quàm sacri horroris plenum est. Cùm enim incruento modo repræsentet Mortem DEI-Hominis in ara crucis. appetitam: imò verè & propriè immoletur Christus; atque, ut observavit S. Chrysostomus lib. 6. de Sacerdot. c. 6. *Locus altari vicinus plenus sit Angelorum choris in honorem illius, qui immolatur:* Ecce unde horror, reverentiâ & terrore plenus; ut meritò Actionem hanc *Tremendum Mysterium* appellet Concilium Trident. Sess. 22. Ex alia parte, cùm totum, quod in tremendo hoc Sacrificio agitur, agatur non solum ad summum, & DEO dignum cultum, defe-

rendum : sed etiam ad supremam illam Majestatem, innumeris, nec levis noxis nostris offensam, nobis conciliandam, placandam & propitiandâ; insuper ad necessarias nobis varias gratias efficaciter impetrandas: ecce unde solatium. Deniq; cùm Divinum Christi Corpus & sanguis, dum Sacerdos facit ad aram, non solùm habeat rationem Sacrificij, sed etiam *Sacramenti*, in refectionem animarum nostrarum instituti: ecce unde liquidissima, copiosissima & planè Divina voluptas! Quidni igitur oblatio talis tantq; Sacrificij dici, & esse possit Itinerantium pia quædam & jucundissima Distractio!

Hinc Divini cultûs studiosiores, animabus juvandis addictiores, & lucrorum suorum spiritualium magis avari Viatores, non facîle committunt; imò omni diligentia contendunt: ne dies aliqua ipsis transeat, non factò, aut non audito, ubi possibile est, Sacro. De S Francisco Salesio testatur Episcopus Ebroicensis in ejus Vita: eum quotidie, etiam in Itinere, solitum facere,

cere ad aram, quantumvis sæpe non pauca, nec levia occurrerent impedimenta De S. Carolo Borromæo scribit Episcopus Novariensis in ejus Vita libr. 7. cap. 13 Missæ Sacrum facere nunquam omisit nisi morbi necessitare, eâque non quâvis, sed summâ coactus. Quâ perpetuâ S. Cardinalis consuetudine observatâ, idem de aliis quoque Præsulibus persuasum habebant Mediolanenses. Unde cùm non nemo advertisset: Episcopum quendam non facere, sed alterius Sacerdotis audire Missam; seriò rogavit: an is Præsul interdicto Ecclesiastico vetaretur celebrare Missam? Faciebat autem Sanctus Divinum hoc Sacrificium non facile in Sacello domestico, sed in publicis Ecclesijs propter ejusdem dignitatem. In itinere verò, impetratâ pro se & comitibus suis Sacerdotibus, speciali veniâ à summo Pontifice, unâ alterâve horâ ante auroram dicendi Missam, maturè divina expediebat: ne superveniente aliquo obice arctaretur postea, *Idem lib. 3. cap. 3.* Cardinali Stani-

Stanislao Hosio, viro non minùs sanctitate quàm dignitate & Doctrinâ Eminentissimo, eadem consuetudo fuit. Teste Rescio in Vita c. 16. & 19. usq; ad decrepitam ætatem Missam dicebat quotidie, vel audiebat, etiam in infirmitate. Quamobrem in ipso sæpe diluculo, quaecunq; tandem cœlum esset, ad Ecclesiam accedere consueverat. Ante missam nullis unquam negotiis operam dare volebat: soli meditationi vacabat, reliquis omnibus curis & cogitationibus animo pulsus.

Non minor cura fuit quotidiani Sacrificij sancto Francisco Borgiæ; de quo tradit Sacchinus tom. 3. lib. 8. histo. Soc. quòd Sacramentalem Communionem nullo unquam die ab inita Societate, nec valens, nec æger prætermiserit: quàmvis multis & longinquis arduisque itineribus sæpe impediretur. Sacrificij verò celebrandi tam fuit studiosus in itinere: ut illius causâ grave non duceret; unam alteramve leucam à via deflectere, vel locis de cætero parum commodis pernoctare. Cùm aliàs

aliàs nullo modo pateretur sæcularis fortunæ suæ mentionem fieri; si quando in via aliter copiam faciendi sacri impetrare non posset: tum denique comiter innuebat socio; *tempus esse sæcularis potestatis auxilium implorandi*, insinuando: quis olim fuisset.

P. Franciscus Suarez primi nominis è Societate JESU Theologus, cùm in itineribus versaretur; nihil pensi habebat, viæ spatium Sacrificij causâ producere: adeò, ut aliquando in Lusitania Ulyssiponem inter ac Eboram, profesto quàmvis die ad duodecim passuum millia, sacrificandi ut copiam nancisceretur, recto à tramite abscesserit. *Massejus in ejus vita cap. 20.* Idem dicenti cuidam, laboriosum esse, quotidie Sacrum facere, respondit: *Minimè. Quæ enim alia hora in vita plenior est solatij & voluptatis? Eâ quoties carere cogor: planè exarescit animus,* Lohn. tit. Sacrificium. Apostolicum hunc esse spiritum & morem, probe nòrunt Viri divino cultui addictiores. S. Andreas Aposto: cùm ab Ægea tyranno



46. *Distraçtio III*

ranno urgeretur, ut dijs sacrificaret, respondit: *Ego quotidie sacrifico Omnipotenti DEO, non boves & oves, sed Agnum immaculatum &c.*

Quod genus obsequij non rarò placuit Divinæ Majestati prodigiosis gratiis compensare. S. Isidorus ruricola impetraverat à Domino suo, ut quotidie Divino Sacrificio interesse posset: interim autem Angeli pro eo glebam versabant aratro Waltherus à Birbach, nobilis Belga, pietate eximius, pro solemnî hastiludio in civitatē profectus, in itinere divertit ad Ecclesiam, more suo Missam auditurus. Cùm verò etiam alteri sacrificio intentus moras traheret: Angelus ejus speciem indutus, magno cum plausu loco Waltheri confligit. Sacerdos sacra loca in Palæstina visitans, dum focii maturantes iter digrediuntur, perstitit solus Divinamq; hostiam immolavit inde iter ingressus, ab obvio equite rogatus est, ut pone se ascenderet eqvum. Ascendit: & eodem die ante fores domûs suæ, licet longi-

longissimè distitæ, substitit. *Cantiprat. lib. 2. apum ca. 40.* Sic mora facta sacrificij causâ, magnum est viæ compendium. Communi hominum sensu, hora pascendis jumentis data non est dispendium itineris: quantò minùs quæ impenditur reficiendæ animæ, & colendo Deo?

Magnum tenuis opellæ 'ad aram præstitæ pretium tulit Franciscus Mastrilli, nobilissimus in regno Neapolitano adolescens. Venit is aliquando in templum Domûs professæ Neapolitanæ S. J. die, quo juvenus literaria vacabat à studijs: offenditq; Sacerdotem accinctum ad Sacrum faciendum, sed ministro, ut subinde fit tali die, destitutum. Ergo liberaliter offert operam suam. Sed Sacerdos comiter abnuit, prætendens; Franciscum tardiùs venturum ad villam, animorum relaxationi destinaram; maximè cùm ipse in Missa facienda admodum prolixus esset. Sed his non absterrius adolescens, proposito suo insistit, & cunctantem deducit ad aram. In

*Memen-*

*Memento* igitur ministrum tam officiosum & religiosum remuneraturus celebrans Sacerdos instat ferventiùs apud Deum: ut tam piam promptamq; sibi præstitam operam ( non sine insigni sui victoria ) speciali aliquo favore remunerari gratiose dignetur. Auditus est. Nam Mastrillus Societatem ingressus, post multos annos Superiorum dispositione, & Sancti Xaverij manifestâ invitatione in Japoniam profectus ( ubi pro fide cæsus occubuit ) cùm Goæ in India ante sepulchrum S. Xaverij orans, miraretur: unde sibi ea gratia obvenisset, ut præ reliquis, se longè melioribus, magisq; idoneis, ipse Missionem Japonicam obtineret ? Respondit ei Sanctus: id factum fuisse in remuneratorem obsequii, quòd olim Neapoli exhibuerat, offerendo se tempore incommodo Sacerdoti in ministrum Divini Sacrificij *Mansi disc. 10 n. 3.* non ergo est dispendiũ (iterũ ingemino) morula impensa cultui divino præsertim per oblationem hostiæ Divinæ.

Cæte-

*Per Sacrificium Divinum.* 49.

Cæterùm etsi extraordinariæ hujusmodi gratiæ deessent: abunde sufficere nobis deberent communes fructus, qui ex hoc Sacrificio percipiuntur liberalissimè; de quibus Laurentius Justinianus lib de Obedien: *Nullus profectò, inquit, valet humano explicare eloquio, quàm locuples fructus, quantavè ex huj9 oblatione atq; perceptione Sacramenti Spiritualia exuberent dona.* Reconciliatur quippe peccator DEO, Justus autem justificatur adhuc, lætificantur Angeli, cumulatur merita, augètur virtutes, rescantur vitia, diaboli machinamenta superantur, sanantur egri, eriguntur iapsi, debiles refocillantur, famelici saturantur, & defuncti fideles istius Sacramenti liberantur effectu. Si enim exuberans Divina Bonitas multa & maxima etiam non petentibus & indignis largitur dona: quid negabit offerenti Christum? Non fuit temerarius, aut per jactantiam effusus Sacerdos è Societate nostra eximiæ virtutis, qui ingenè ferebatur: se vel uno Sacrificio oblato, impetrare à DEO quod vellet.

C

Sed

Sed demus : nihil omnino commodi in particulares personas nostras redundare ex Opere hoc Divino. Numquid homines divino cultui specialiter addicti, & ad id muneris consecrati, perpetuoq; charactere insigniti, fraudabimus per negligentiam nostram, vel per modicum aliquod impedimentum, Supremam Majestatem cultu, quem solum & unicum à nobis habere potest dignum se? Fraudabimus Divinarum Personarum Triadem illa suavitate & delicatissimo gustu, quem habet ex oblatione Sacrificij hujus? Fraudabimus Ecclesiam Triumphantem in cælis hoc Epulo, Militantem in terris hoc præsidio, Patientem in expiatorijs flammis hoc refrigerio?

Abfit à quovis cordato DEI cultore tam turpis incuria. Quin potius desiderio desideremus cum Christo Redemptore offerre, & manducare hoc Pascha; & coarctemur spiritu, donec perficiamus illud. Quod si quandoq; ejus copiam nullatenus habere possimus: ingemiscamus cum parvulis illis Thern: & qui fame sitiq; tabescentes,

*per Sacrificium divinum.* 51

*Matribus suis dixerunt: Ubi est vinum  
& triticum? Effundamur cum pijsimo  
Viatore, B. Stanislao Kostka, coram  
Patre cælesti, & DEI nostraque Matre  
in pias querelas: quòd Pane nostro  
quotidiano supersubstantiali ( ut habet  
S. Matthæus c. 6 II. ) destituti simus.  
Cum enim nobilissimus ille adolescens,  
Viennâ Romam admodum arduam su-  
scipisset peregrinationem; notabilem  
viæ partem emensus, ne deficeret,  
Pane fortium animam reficere optavit.  
Ingressus ergo in vicinum, ut puta-  
bat, templum, Divinum expectavit  
Sacrificium: in quo Angelorum escâ  
reficeretur. Nemine comparente, qui  
Sacrum faceret, Communionem Sacrâ  
expetiit. Sed neque hujus copia facta,  
eò quod hæreticorum id fanum esset.  
Quo comperto, Stanislaus in amaras  
effusus lachrymas infortunium suû de-  
ploravit. At non diu infortunatum  
esse sustinuit providus DEUS: quod  
ab hominibus habere non potuit, An-  
gelicis manibus iterum ei suppeditavit  
Epulum Divinum tantò dulcius; quan-  
tò magis desideratum, Sacchinus par. 3,*



*hist. Soc. lib. 4. n. 59.*

Nobis defectum opportunitatis Sacrum faciendi vel audiendi, utcunque compensare licebit, tum *Communione Spirituali*, ut vocant: id est desiderio fervente realis Eucharisticæ Communionis, ac simili, ut in illa solemus, animi præparatione ad percipiendos effectus illius: tum *Imitatione quadam Liturgiæ Ecclesiasticæ*; sive legendo, aut memoriter recitando devotè ea, quibus Missa (absq̃ue Consecratione) constat; v. g. Introitum, Orationes, Epistolam, Evangelium, Credo &c. sive nostris verbis eliciendo affectus & preces similes ijs, quæ in Missa adhibentur. v. g. Præparationem per Actus doloris & confessionis privatæ coram DEO: deinde Orationes aliquas, veluti collectas, fundendo: quibus etiam præmitti potest *Gloria in excelsis*; tum ex epistolis Sancti Pauli, & Evangelij sententiam aliquam affectuose expendendo; post hæc Symbolum sive Apostolorum, sive Nicænum pronuncians, Offerendo DEO omnia, quæcunq̃:  
per

per orbem universum celebrantur eo die Sacrificia, unà cum prompta voluntate sacrificandi, si opportunitas esset. Denique instituatur Communio Spiritualis, & opportuna preces quædam subjunctæ concludant Liturgiam privatæ devotionis.

*Missæ sicca* appellari solet hujusmodi Liturgia, in qua non fit Consecratio panis & vini: potest autem valde irrigua esse, cælitus demissis gratiarum & consolationū divinarū fluentis; si in ara cordis ferbuerit affectus devotionis. Talem Missam Christus ipse celebrari aliquando voluit à P. Dominico à JESU MARIA Carmelit. Discalc. Viro eximie Sanctitatis In quodam enim raptu vidit Christum D. cum V. Matre sua, & multa Angelorum, aliorumque Cælitum corona descendere de cælo & eum in splendidissimo throno cum Matre sua considerare. Audiit quoq; mandantem: ut Dominicus solemnem coram ipsis Missam celebraret Mox ab Angelis sacris vestibus pretiosissimis indutus, Ss. JOSEphum

& Franciscum ut Levitas lateri suo assistentes habuit. Deductus à Ministris Angelis ad aram, cùm transiret thronum, in quo confederant JESUS & MARIA, vidit ipsos reverenter sibi assurgentes, Angelos autem & Sanctos profundâ submissione se venerantes, in documentum: quæ reverentia debeatur Sacerdoti Sacrificanti; & quàm graviter, ac religiosè ipse agere debeat, dum personam Christi repræsentat. Peractæ ceremoniæ & orationes omnes absque Consecratione: siquidem Christus adfuit in persona propria. Communionem tamen Sacram Dominico dederunt Angeli sub speciebus panis: sanguis autem ex ipso Christi latere datus. Absolutâ Missâ ad fulgentissimum thronum à Ss Josepho & Francisco deductus fuit; eisdemq; impositum rursus Angeli & Sancti profundâ inclinatione sunt venerati. Christus verò humillimas pro ea dignatione agenti gratias, largam dedit benedictionem, monuitq;: ut humeros non uni, nec levi pararet cruci: siquidem

*per breves Aspirationes.* 55.  
dem ab ipso electus sit in salutem mul-  
torum. *Exvita impressa Viennæ An-*  
*nō 1678.* Quam gratum est DEO, &  
fructuosum nobis, ipsum reale Sacri-  
ficiū Miltæ: quando vel umbra ejus,  
seu externæ ceremoniæ tam sunt ac-  
ceptæ?

#### DISTRACTIO IV.

*Per breves, sed affectuosas Aspira-*  
*tiones ad DEUM & Sanctos.*

**P**Lurimum commendatas ab Asce-  
tis omnibus, & creberrimo usu  
receptas à Sanctis, hujusmodi Aspira-  
tiones, quas *faculatorias orationes* pas-  
sim vocant, Tertulianus Tr: de Orat:  
c. 1. appellat *Orationes sine agmine ver-*  
*borum*: commendavi & ego in Brevi-  
ario meo **A**scetico 31. Januarij, ex qua-  
druplici capite. 1. Quod facillimè eli-  
ciantur; & hominem non fatigent;  
imò sunt respirium quoddam fatigato.  
2. Quod non sint obnoxia tædio, di-  
stractionibus, & infestationibus dæmo-  
nis. 3. Quod plurimum conferant ad  
conservandam memoriam Præsentis

DEI, & alendum ignem fervoremq;  
Charitatis erga ipsum. 4. Quòd valde  
conducant ad facilitandum & promo-  
vendū quarūvis virtutum exercitium.

Unde tradit Cassianus lib.2. Instit:  
c. 10. veteres Ægypti Patres censuisse:  
*Vtilius breves orationes, sed creberrimas,*  
*fieri: ut frequentius Dominum deprecantes,*  
*jugiter eidem coherere possimus, ani-*  
*mo & corde ipsi conjuncti: & insi-*  
*diātis demonis jacula, quæ infligere nobis*  
*tunc præcipuè, cū oram9, insistit, succin-*  
*etâ brevitate vitemus.* Sic, addit S Jo-  
annes Climacus gradu 28. *uno verbo*  
*& publicanus ille ex Evangelio, & prodi-*  
*gus filius, DEUM sibi reconciliaverunt,*  
*unumq; fidele verbum salvavit latronem;*  
à Davide quoq; transtulit DEUS gran-  
de, idq; duplex, peccatum. Non  
quàm multa, sed quàm religiosa, &  
ferventia ad DEUM verba fundamus,  
refert.

Modus hic orandi vel maximè op-  
portunus est turbâ negotiorum distra-  
ctis, & Itinerantibus. Proinde Aspi-  
rationum & Orationum hujusmodi  
quasdam,

quasdam, præsertim Viatoribus accommodatas, hîc subungere juvat. (Plures dabuntur infrà parte 2.) præter universalem illam Apostoli & S. Pat. N. Ignatij: *Ad Majorem DEI Gloriam:* & illam Cardi. Stanislai Hosij; *Mane nobiscum Domine.*

Dum manè è somno evigilam9.

**B**enedicta sit S. Trinitas & individua Unitas, Pater, Filius, & Spiritus S. quia fecit nobiscum misericordiam suam.

*Surgam: & quæram quem diligit Anima mea. Can: 3.*

Dum nos vestimus.

*Indue me, Domine, viscera misericordie, benignitatem, humilitatem, modestiã. patientiã, & super omnia charitatem. Coloss. 3.*

*Indue me Domine, loricã fidei & charitatis, & galeã spei, in acquisitionem salutis, per Domi. nostrum JESUM Christum. Thess. 5.*

C5 Dum



Dum nos lavamus.

*Amplius lava me Domine ab iniquitate mea: & à peccato meo munda me. Psalm. 50.*

*Cor mundum crea in me DEUS: & Spiritum rectum innova in visceribus meis. Ibid.*

Dum iter aggredimur.

*Prosperum iter faciat nobis Deus salutarium nostrorum. Psal. 67.*

*JESUS & MARIA sit nobiscum in via.*

Dum Cælum aspicimus.

*Quàm dilecta tabernacula tua Domine virtutū! Concupiscit, & deficit anima mea in atria Domini. Ps. 83.*

*Tui sunt celi, tua est terra. Ps. 88.*

*Adjutorium nostrum in nomine Domini: qui fecit calum & terram. Psal. 123.*

In conspectu Solis.

*Vas admirabile: Opus excelsi!*

*Eccli-*

*per breves Aspirationes.* 59

*Eccli: 43. Quàm longè splendior, qui fecit illud?*

*A Solis ortu usq; ad occasum laudabile nomen Domini. Psal. 112.*

*In conspectu Lunæ.*

*Benedicite sol & luna Domino:  
Laudate & superexaltate eum in  
secula. Dan. 3.*

*Pulchra ut luna, electa ut Sol  
MARIA.*

*In conspectu Syderum.*

*Laudate Dominum omnes stellæ  
& lumen. Psal. 148.*

*Benedicite Stellæ cæli Dominum.  
Dan. 3.*

*In conspectu terræ.*

*Domini est Terra, & plenitudo  
ejus, orbis terrarum, & qui habi-  
tant in eo. Psal. 23.*

*Quid mihi est in cælo: & à te  
quid volui super terram?*

*In Conspectu Montium.*

*Benedicite Montes & colles Domino: Benedicite universa germinantia in terra Domino. Dani. 3.*

*Quis ascendet in Montem Domini? aut quis stabit in loco Sancto ejus? Psal. 23.*

*In conspectu Camporum.*

*Ascendunt montes & descendunt Campi, in locum, quem posuisti eis. Psal. 103.*

*Benedices coronæ anni benignitatis tuæ: & Campi tui replebuntur ubertate. Psal. 64.*

*In conspectu Aquarum.*

*Benedicite fontes Domino. Da. 3.*

*Benedicite cete, & omnia, quæ moventur in aquis Domino.*

*In conspectu Avium & Pecorum.*

*Benedicite omnes volucres calis Domino. Laudate & superexaltate eum in sæcula.*

*Bene-*

*per breves Aspirationes. 61*  
*Benedicite omnes bestia & peco-*  
*Domino: Laudate &c. Dan. 3.*

*In conspectu Hominum.*  
*Benedicite Filij hominum Domi-*  
*no: Laudate & superexalt: &c.*

*Benedicite Servi Dñi Dño: Be-*  
*nedicite sancti & humiles corde*  
*Domino. Dan. 3.*

*Ante Cibum & Potum*  
*Beati qui manducant panem in*  
*regno celorum. Luc. 14*

*Sitivit anima mea ad DEUM*  
*fontem vivum. Psal. 41.*

*Ante Somnum.*  
*Salva nos Domine vigilantes:*  
*custodi nos dormientes: ut vigile-*  
*mus cum Christo, & requiescam9*  
*in pace. Ecclesia:*

**F**Ximius in hujusmodi affectib9, aspi-  
rationib9 & orationib9 fuit P. Petro  
Faber, primus S. P. Nost. Ignatij Soci-  
us de quo in ejus Vita lib. 2. ca. 2.  
dicitur: Quidquid videret, audiretque  
C 7 lætum

lætum ac prosperum; erumpebat in voces confessionis ac laudis: cùm villarum amoenitatem, agrorum foecunditatem, olivetorum speciem, vinetorum pulchritudinem oculis peregrinando lustrabat; erectâ protinus ad DEUM mente, pro possessoribus ac dominis grates agebat; & pro iisdem petebat veniam, si fortè sui Largitoris obliti, unde bona illa acciperent, non sentirent. Sic ex aspectu creaturarum tam multâ varietate, tam vario usu conspicuarum, varia & efficacia habemus tum incentiva, tum fomenta piorum affectuum erga Deum.

## DISTRACTIO V.

*Per Colloquia Opportuna.*

**R**ECTÈ dixit Terentius: *Facundus comes in via pro vehiculo est.*

Sed advertendum: quòd sicut sermones institui possunt varij, læti & tristes, mundani & religiosi, boni & mali, pij & impij: sic ab itinerum comitibus varia nobis, aut ipsis à nobis, præberi possunt vehicula, quibus feramur  
yel

*per Colloquia opportuna.* 63

vel per spatiosam vitiorum, vel per arctam virtutum viam; ac tandem devehamur ad Cælum, vel Orcum. *Mors & vita in manibus lingvæ:* monet Spiritus S. Proverb. 18. Et Christus Matt. 12. *Ex verbis tuis justificaberis: & ex verbis tuis condemnaberis,* Unde sollicitus orat Ecclesiasticus. c. 22. *Quis dabit ori mea custodiam, & super labia mea signaculū certum; ut non cadam ab ipsis, & lingua mea perdat me?* In via vel maximè necessaria est accurata custodia lingvæ, & signaculum oris certum: cum ad levandas itineris molestias & liberiùs & confidentiùs cum socijs agere soleamus; & deficiente innoxia sermonis materiâ, pronus sit lapsus in nocivam vel certè infructuosam: prout contigit Eremico:is quibusdam S. Antonium Abb. invisentibus.

Conscenderant navim Fratres quidam eremi cultores, cum sene Abbate suo: ut Magnum illum eremicolarum Patriarcham Antonium inviserent, atq; aliquid spiritualis doctrinæ, utilisque exempli, inde referrent. Post  
huma-



humanitatis mutua officia, quæsit Antonius ex Sene: Abba; bonos habuisti Fratres ad comitatum? Sunt quidem boni, respondit ille: sed habitatio eorum non habet januam. Quicumq; enim vult, intrat in stabulum, & solvit abducitq; asinum. Hoc autem dicebat, notans garrulitatem eorum: quod sine delectu de quibusvis rebus obvijs passim loquerentur? ideoq; ora eorum assimilavit domui, seu stabulo non clauso. O quanta non rarò mephitis halat ex hujusmodi stabulis! *Major in Spec. Exemp. dist. 2. Ex. 97.*

Alius inter ascetas Magnus, cum Fratres inter se de scripturis loquebantur, vidit Ss. Angelos illis adstantes, & plurimum se colloquijs illis oblectantes: cum autem aliud aliquid loquerentur; statim Ss. Angeli longius recedebant, & porci sordidissimi veniebant, volutabantq; se inter illos. Est enim spirituum immundorum voluptas in vaniloquijs, ne dicam turpiloquijs hominum.

Quam verò grata sint Christo, Domino

*per Colloquia opportuna.* 65

mino nostro, pia colloquia: declaravit imprimis; quando ipsa gloriosa Resurrectionis die manifestum se præbuit duobus discipulis, euntibus in Emmaus. Nihil minus, quàm gratiam istam merebantur illi ob defectum fidei & spei suæ: sed quia in itinere mœstos animos non recreabant vanâ garulitate, sed pio de Christo sermone: meruerunt & visibilem præsentiam ipsius, & Scripturarum declarationem, & Eucharisticam Communionem de manibus Domini.

Wadingus in *Annal. S. Francisci ad annum 1212. n. 2.* refert: Dum S. Franciscus spiritualem quandam conferentiam instituisset cum Fratribus, ita: ut singuli ex tempore aliquid pij dicerent; Christus Dominus in specie pulcherrimi Juvenis apparuit inter ipsos, atq; singulis mirâ benignitate & cum sua magna voluptate benedixit.

Boverius quoq; in *Annal. Capuccinorum tom. 1. pag. 553. n. 8* scribit: Ad domum Caroli Filomarini, Nobilis Neapolitani, rus ad prædia sua curanda pro-

da profecti, duos Capucinos Fratres, eo absente, venisse; cùmque eum minimè offendissent, spiritualia colloquia cum ejus uxore miscuisse. Interea Carolus è rure sub vesperum in urbem rediens, cùm primùm domui appropinquat, musicam harmoniam è domo erumpentem percipit. Mirabatur ille: quid intempestiva illa symphonia, eo præsertim absente, portenderet: eoque magis admiratio augebatur, quò propiùs accedens, ea clariùs ab eo audiebatur. Quapropter ocyus domûs gradus ascendit, atq; ubi in aulam pervenit, symphonicum chorum in uxoris cubiculo concinentem animadvertit: quo amplius stupens, statim cubiculum ingressus, bonos tantùm Fratres Capucinos cum uxore de rebus divinis colloquentes offendit. Quamobrem suspicione in voluptatem conversâ, ipse quartus pijs illis musicis accessit.

Cælesti musicæ epulum accedat cæleste. Pro more tyronum Societatis Jesu peregrinabatur cum socijs duobus

*per Colloquia opportuna.* 67

duobus Petrus Bafius, eximius DEI-  
paræ V. cultor, prodigiosis etiam gra-  
tiji cælitus honoratus. Præter alias  
peregrinis præscriptas Leges, etiam  
illam ( Reg. Peregr. 3. ) observabant  
accuratè, qua jubemur interdum *piis*  
*colloquiis molestias itineris levare:* & ecce  
improvifi adsunt illis comites, Matro-  
na illustrissima, vir gravitate & ætate  
venerandus, cum Puero venustissimo,  
in cujus vultu Gratia omnes confedisse  
videbantur. Nec satis fuit pios via-  
tores hoc oculorum oblectamento pa-  
visse: canam insuper cælestibus ille-  
cebris conditam præbuerunt. Rogati  
denique; qui essent: & quas optarent  
grates? responderunt: *Nos fundavimus*  
*Societatem:* & videri desierunt. *Nadasi*  
*Anno dier. mem. 1. Martij.*

Alliciunt pia Colloquia cæli Princi-  
pes ac cives: ut hominum se misceant  
consortio, & frui gaudeant humanæ  
cælestisq; lingvæ harmoniâ; juxta il-  
lud Christi: *Ubi sunt duo vel tres con-*  
*gregati in nomine meo: ibi sum in me-*  
*dio eorum,* loquens eis *ad cor,* & colli-  
gens

gens de ore eorum favos mellis, botrosq; vini meracissimi Nam ut monet Sponsa Cant: 7. si sermo noster fuerit ex pietate, prudentia, & charitate rite compositus: *erunt verba oris tui, sicut odor malorum; guttur tuum sicut vinum optimum, dignum dilecto meo ad potandum:* in nos autem redundabit fructus Proverbio. 12. promissus; *De fructu oris sui unusquisque replebitur bonis:*

Materiam pijs sermonibus suppledat I. Ecclesiasticus cap. 9. *Omnis enarratio tua sit in Præceptis Altissimi.* Thesaurus indeficiens & pro contemplatione, & pro sermocinatione sunt Scripturæ Divinæ, in quibus nec apex est sine mysterio vel doctrinâ: & quò magis expenditur, eò plus reperitur ad expendendum & differendum. II. *Meditatio matutina:* in qua agnitæ ex lumine Divino Veritates, præsertim Practicæ, utilem præbent pio discursui materiam. III. *Objecta varia occurrentia* Ut enim homines garruli ex quibusvis rebus personisve obvijs sumunt

munt occasionem ineptiendi: ita  
pij, ut apiculæ argumentosæ, nō-  
runt capere argumenta discursibus  
pijs. IV *Amor DEI, JESU & MA-*  
*RIÆ.* Cū enim omnis amor indo-  
lis sit igneæ: celari diu non potest.  
Erumpit identidem non solum in su-  
spira, & aspirationes; sed etiam in ar-  
dentes voces & sermones. Cor igitur  
amantium DEUM, J. & M. facile  
eructat verbum bonum, juxta illud  
Luc. 6. *Bonus homo de bono thesauro*  
*cordis sui profert bonum: ex abundantia*  
*enim cordis os loquitur.* V. Negotia  
tractanda, quantumvis temporalia sint.  
Si enim per se honesta sunt, & pia  
præmittatur Intentio sermoni de ipsis:  
sermo talis jam non prophanus, sed  
pius, & apud DEUM meritorius est.  
*Omnia vilia cum charitate facta, sunt au-*  
*rea atq; divina:* inquit Anselmus in  
ca 13. ep. I ad Cor. VI. Quæ aliàs  
memoratu digna contigerunt in via,  
Deniq; Lectiones Spirituales & Histo-  
ricæ, etiam hic traditæ & tradendæ,  
commodam præbebunt occasionem ul-  
teriori



teriori diſcurſui: facileq; ſcriba doctus  
in regno cælorum addet de theſauro e-  
ruditionis ſuæ nova & vetera.

## DISTRACTIO VI.

*Per pias Cantilenas.*

**U** Sum piarum Cantionum, præ-  
fertim Pſalmorum Davidicorū,  
æquè diſertè ac prolîxè commendat  
S. Chryſoſtomus, exponens Pſalmum  
41. Cùm DEUS vidiffet, inquit: mul-  
tos homines eſſe ſocordiores, nec ad  
legenda ſpiritualia libenter accedere,  
nec qui inde percipitur, laborem tole-  
rare: volens gratiorem laborem effi-  
cere, admiscuit Prophetiam melodiæ;  
ut omnes verſus numero compoſiti,  
cum magna animi alacritate ac prom-  
ptitudine ſacros ei hymnos emittant.  
Nihil enim animam æquè erigit, &  
alutam quodamodo efficit, & à terra  
liberat, & exolvit à vinculis corporis,  
& amore ſapientiæ afficit, & ut res  
omnes ad hanc vitam perſinentes ir-  
rideat, perficit: ſicut verſus modula-  
tus, & Divinum Canticum numero  
compo-

compositum. Nostra certè natura usq; adeò delectatur canticis & carminibus, & tantam cum eis habet necessitudinem & convenientiam: ut vel infantes ab uberibus pendentes, si fleant, & afflictentur, ea ratione sopiantur. Nutrices quidem certè, quæ eos gestant in ulnis, sæpe abeuntes & redeuntes, & quædam puerilia eis carmina decantantes, supercilia eorum ita sopiunt. Quocirca sæpe quoq; Viatores meridie agentes jugalia animalia, hoc faciunt canentes, itineris molestiam illis canticis consolantes. Nec solum viatores, sed etiam agricolæ, uvas in torculari calcantes, vindemiantes, & vites colentes, & quodcunq; aliud opus facientes, sæpe cantant. Nautæ quoq; remos impellentes, hoc faciunt. Jam verò mulieres texentes, & confusa stamina radio discernentes, sæpe quidem & per se singulæ, sæpe autem etiam omnes concorditer, unam quandam melodiam concinunt. Hoc autem faciunt & mulieres, & Viatores, & agricolæ & nautæ laborem, qui ex  
opere

opere faciendo suscipitur, consolari volentes: utpote quòd anima, si carmen & canticum audierit, molesta & difficilia sit facilius toleratura. Quoniam ergo hoc genus delectationis est nostræ animæ valde cognatum & familiare: ne dæmones lasciva & meretricia cantica introducentes, omnia everterent; Psalmos DEUS opposuit, ut ex ea re simul caperetur voluptas & utilitas.

Hæc Chrysostomus. Pergit deinde suadere: ut etiam in convivij Psalmodum cantus adhibeatur: *ut si ex saturitate macula quedam in animam irrepsit; eam per illam modulationē abstergamus, & communiter omnes stātes dicamus: Delectastinos Domine in factura tua; & in operibus manuum tuarum exultabimus.* Addit deinde: quòd si ob aliquam causam in aliquo loco vel tempore, non possumus voce canere: *in omni loco, & in omni tempore liceat mente canere* Nam sive in foro ambules, sive iter ingrediaris, sive cum amicis confideas; licet excitare animum

ri  
r-  
t-  
-  
ft  
a-  
e-  
a  
t,  
&  
  
e  
o-  
-  
-  
-  
i-  
a  
-  
b  
a-  
in  
at  
n-  
m  
i-  
m

munum, licet vel tacenti clamare, eo modo, quo Exodi 14. v. 15. Moyſes tacitus clamabat, & DEUS audiebat. Et ſi fueris opifex, poteris in officina ſedens & operans pſallere. Et ſi miles ſis: aut ſedeas in iudicio: poteris hoc ipſum facere. Licet etiam ſine voce pſallere; cū mens intus reſonet. Non enim hominibus canimus, ſed Deo; qui poteſt vel corda audire, & in mentis noſtræ arcana ingredi.

Infuper alium oſtendit modum canendi & Deo pſallendi: ſi nimirum habere ſtudeamus corpus concordans rectæ rationi ſeu animæ; animam verò conſonam voluntati Divinæ. Hoc ſi habueris: *juxta ipſum David ſtare poteris. Hic non eſt opus citharâ, neq; nervis extenſis, neq; plectro, nec arte, nec ullis instrumentis: ſed ſi veis, te ipſum efficias citharam; cū carnis membra mortificaveris, & animæ cum corpore pulchrum concentum effeceris.*

Itinerantibus licet, omnibus his tribus modis pſallere; & voce ſonare, & mente devota & corporis mortifi-

D. catione

catione; seu sensuum cum recta ratione consensione. Quæ harmonia, ut DEum Divosque afficit jucundissimè; ita ipsismet nata est liquidissimam parere voluptatem cum insigni merito. In Revelat: S. Brigitæ lib. 4. ca. 32. DEIpara V. -dixit eidem de quodam, qui devoto cantu eam laudare solebat: *Dic illi; Deo placet coronas in cælo dare ipsi pro qualibet syllaba, quæ est in cantu: & dicetur de eo* (quando cælum gloriosus ingredietur; *Ecce venit laudator.*

Habent igitur in more positum pij Viatores: ut non solum dicant, sed canant DEO Divisque laudes; & ut majore virium contentione glorificent Sospitorem ac Protectorem suum, Divosque Tutelares. De primis S. P. Nostri Ignatij Socijs, Parisijs Romam tendentibus, scribit Orlandinus lib. 1. hist: Soc: n. 3. *In ipso itinere vel ex Psalmis decantabant aliquid, vel de Deo agitantur inter se dulcia colloquia: atqui hac perenni vicissitudine levabant tædia itineris.*

Materiam piæ modulationi, præter  
Psal-

*per Lectionem Historicam. 75*

Psalms, & Cantica Divinarum Scripturarum, dabunt Hymni & Rhythmi, quos infrà pro singulis hebdomadæ diebus suppeditabo. Qui si proprios non habuerint tonos: flecti poterunt ad normam eorum, cum quibus conveniunt in ratione metri, seu numeri. Cæterum ut non solum jucundè distrahamur; sed DEO sit jucunda decoraq; laudatio nostra modulata: audiendus sacer Psalter Psal. 45. invitans & admonens: *Psallite DEO nostro, psallite: Psallite Regi nostro, psallite. Quoniam Rex omnis terræ Deus: psallite sapienter.*

DISTRACTIO VII.

*Per Lectionem Historicam vel Geographicam.*

UT vinum generosum non indiget hæderâ cellæ vinariæ præfixâ: sic Lectio historica & Geographica commendatione prolixâ. Utilitatem & Jucunditatem suam quasi fronte præfert: nec plus requiritur ad eam prosequendam, quàm ut inchoetur.

D<sub>2</sub> Inchoata



Inchoata sic capit, tenetque ut magis  
abrumpi debeat, quàm finiri possit.  
Nec mirum. Est enim Historia juxta  
Cicer. li. 2. de Orat: *Tēstis temporum,*  
*Lux veritatis, Vita memoria, Magistra*  
*vite, & Vetustatis nuncia.* Quid por-  
rò jucundius ( ut nihil de Utilitate  
dicam ) quàm elapsa tot sæcula quo-  
dammodo, revocata cernere, Mundi  
numerare ætates, annos & dies; quid  
hoc illove sæculo vel anno actum, sine  
labore discere; tot regnorum status,  
imperatorum ortus & occasum, popu-  
lorum varietatem & multitudinem ve-  
lut uno intuitu complecti; præterita  
cum præsentibus comparare, alieno  
damno sapere, aliorum decora in pro-  
pria emolumenta convertere, virtu-  
tum vitiorumq; effectus velut in una  
tabula conspiciere? Quæ omnia, & his  
longè plura, exhibet, docetque Histo-  
ria & Geographia: nec alium, quam  
sedulam Lectionem, requirit laborem  
vel sumptum. Unde corporis vel ani-  
mi ægritudine pressi, aut mole cura-  
rum publicarum, vel insomnijs lassi,  
maxi-

maximi principes vix alibi jucundior-  
rem reperiunt distractionem, quàm in  
historica Lectione.

Distrahet igitur etiam Itinerantes,  
pari voluptatè ac utilitate; præsertim  
si feligatur historia, quæ non solam  
pascit curiositatem, sed unà cum nova  
eruditione instillet, augeátve pietatem,  
faciendo doctiores pariter ac meliores.  
Quamquam, si probè advertimus, vix  
occurret nobis memorabile aliquod  
factum, ex quo proficere non possimus,  
si volumus. Vel enim præclarè, vel  
ineptè seu nequiter, actum est. Si  
primùm: habemus quod æmulemur.  
Si posterius: cautos esse decet, ne ad  
eundem lapidem offendamus. Unde  
Diodorus Siculus iu proœm: Vit: Phi-  
lip: & Alex: *Nibil utilius jucundiusq;  
cogitari potest, quàm in humanæ vitæ  
theatro, quod Historia partibus omnibus  
mirè instructū habet, sedentem, periculis  
avorum sine suo periculo cautum, sapien-  
temq; fieri; exempla capere omnigena,  
quæ ad usum tuum utiliter qualibet in  
re traducas.*

Suppeditabo infra Patre 2. Lectiones aliquas Geographicas in singulos hebdomadæ dies. Hic unam alteramve historiam in Distractionem & cautelam Itinerantium subjungo.

Cardinalis Borbonius aliquando in Italiam proficiscens, ad Alpium pedem ob nives densissimas, plures dies coactus est in hospitio subsistere cum omni & quidem magno comitatu. Apertâ demum aliquantum viâ, abiturus voluit, ut erat humanus, Cardinalis hospiti loqui. Id fiebat sub mensæ finem, cum ejus eleemosynarius, gratijs de more DEO actis, consuetum etiam *Retribuere* subjungeret. Interim oeconomus Cardinalis rogat hospitem, quantum pro hospitio debeant. Ille negat se quidquam acceptare, idq; tam constanter: ut Cardinalis ratus latere arcanam causam, hospitem ad se evocârît, qui varias initio & officiosas causas prætexebat, tandem, cum urgeretur, sic ait: Ante annos aliquos duo Patres Capuccini divertebant: qui altero manè discessuri con-

conjugi meæ dixerunt: se pro symbola sua ei dare suum consuetum illud *Retribuere dignare &c.* Et uxor quidem acquieuit; ego verò superveniens, indignabundus eos insequor, & eis pallium aufero. Vix domum attigi: cum in maniam incido, instar furijs acti, nullâ mali remissione. Uxor coniciens mali causam, equitem versùs Fratres illos expedit, rogatq;: ut revertantur. Redeunt: ac precibus suis restituunt me mihi. Ego autem ad eorum pedes supplex accido, ac veniam errati postulo; voveoq;: nunquam accipere pretium ab illo hospite, qui in domo mea ad gratiarum actionem post mensam diceret: *Retribuere dignare &c.* Quod quia etiam eleemosynarius iste fecit, voti teneor. Laudavit Cardinalis pietatem hospitis, & ejus liberalitatem acceptavit, quia ex voto erat. Sed hospes nihil perdidit; postquam enim numerum & ætatem liberorum ejus intellexit Cardinalis, ac inter eos esse filium melioris ingenij, ad studia nati: assignavit eidem

quingenta scuta annua, & usum fructum unius è beneficijs suis, ut in Collegio aleretur; pollicitus insuper illi plura præstiturum, si se habilem ad ea faceret. *Rho. lib. 3. c. 11. n. 4.*

Quàm pium ac salutare sit, in itinere subinde divertere ad ædes sacras viæ propinquas, DEUM, DEIparamve salutandi gratiâ: sequens docet eventus. Prope Culmam, oppidum in Bohemia, invaluerant latrones, non vi tantum, sed fraudibus etiam grassantes. Quando in pagis & civitatibus, more gentis, publicæ dabantur saltationes: aderant & illi honestissimo splendidoq; vestitu personas honestas imò nobiles mentiti. Familiaritate cum puellis ditioribus contractâ per varia lenocinia, & liberalissima promissa, suadebant conjugium secum; nec paucis persvadebant, opulenta sua patrimonia jactantes, credulas urgebant deinde: ut compactis in sarcinam pretiosioribus cimelijs, paternâ domo unâ cum ipsis profugerent, relictis parentibus qui consensum licet non imparibus nuptijs,

nuptijs, daturi non essent. Sic tempore non modico seducebant simplices, eâdemque operâ & deprædabantur, & magnâ orbitate affligebant civitates integras, præsertim Egram ita; ut ejus cives indictâ publicâ supplicatione calamitatem deprecarentur à DEO, & noticiam aliquam de perditis filiabus peterent: quam tandem hâc occasione acceperunt. Vir nobilis domum suam ad pedem montis Culmensis sitam, repetens, ad Sacellum viæ vicinum deflexit, & post salutatam DEIPARAM iter reassumpsit. At ubi domum pervenit, non sine dolore mentem subiit; quòd tabulam lusoriam (in qua rex albus in atro, & ater in albo campo depugnant) in dicto Sacello reliquerit. Nox erat: ideoque metu vicinorum latronum nemo servorum adigi potuit, ut tabulam referret. Ancilla tandem, objurgatis meticulosis, se se obtulit; & Sacellum ingressa, non solum tabulam recepit, sed preces etiam Virgini Matri longiusculas fundere non dubitavit. Cum

repente audito supervenientium strepitu, vix in angulum aliquem obscuriorem deflectens, vidit latronem unâ cum virgine ( quam cimelia in sarcinam congesta onerabant ) ingressum in eandem ædem sacram. Imperat ille mox puellæ: ut ad mortem sine mora se disponat. Ella sponsum joculari rata, jocum reddit. At ubi seriorem agi didicit, quas quas poterat, adhibet blanditias, preces, & lachrymas, sed non profuturas. Ergo brevi oratione animâ DEO & DEIparæ V. commendatâ, ejulantem foras trahit latro, & paucis inde passibus, cultro immani jugulat. Quis animus fuerit ancillæ hæc omnia spectanti, non facile quis divinaverit: ex facto sequenti patet. Nam in præsentissimo vitæ periculo etiam furti cogitationem admisit: imò arreptâ unâ cum tabula lusoria, puellæ cæsæ sarcinâ, ( quam latro tantisper in templo reliquerat, dum cadaver utcunq; tumularet ) domum profugit, feliciterque pervenit, Superis tenebrisq; faventibus, latrone

verò



verò, ubi advertit abesse sarcinam, totis viribus insequente usq; ad ipsam aulae portam. Sic detecti homines nefarij, ut improvisò caperentur; altissimum domesticis omnibus silentium imposuit herus, dieq; designatâ publicam de more salutationē indixit. Adesse non sunt veriti etiam latrones: quin is ipse, qui recenter in Sacello Mariano tragoediam dederat, choragum agere, & eandem illam ancillam in splendido vestitu ex composito expositam in theatro, solitis lenocinijs procari cepit. Non abnuitt illa: sarcinam colligit & fugit cum sponso cruento, non ignara, quam herus pararet catastrophē. Ubi ad Sacellum illud ventum: impius sacrificulus jubet, ut antè, sponsam; se morti pararet. Facit illa non sine lachrymis, quas mentiebatur: jamq; cultrum parabat lanius; cū ecce ex insidijs cum pluribus armatis profilit herus, latronem capit; & mox convocatâ a matâ viciniâ, mons totus in quo spe æa latronum erant, coronâ cingitur, sex

## 84 *Distractio VIII.*

supra viginti comprehenduntur & meritas dant poenas. Inventæ ibidem sunt & fossæ duæ, altera opibus plena, altera cadaveribus. Pars opum, quæ discerni potuere, reddita dominis suis: ex residuis Sacellum Marianum in formam templi constructum, prodigiosis gratijs deinceps cælitus honorati. *Gumpenberg in Atlante Mar: Imagine 47.* Hinc habent viatores, quod imitentur in sacrarum ædium visitatione; habent boni, unde gaudeant de V. DEI paræ protectione; habent mali, quod metuant ob vindicis Justitiæ executionem.

## DISTRACTIO VIII.

*per Lectionem Libri Spiritualis.*

**A** Postolus instruens Timotheum suum, primo loco commendat ei Lectionem Spiritualem 1 Tim: 4. *Attende Lectioni, exhortationi & doctrinæ.* Nam & utilissima est, & jucundissima tam legenti, quàm audienti. Expertus est liquidissimam ejus voluptatem S. Joannes Apoc. c. 10. quando oblatum

oblatum sibi librum non degustavit tantum, sed ejus dulcedine captus, planè devoravit. *Et accepi librum de manu Angeli? & devoravi illum: & erat in ore meo tanquam mel dulce.*

Si tam dulcis est Lectio librorum profanorum; ut qui voluptatem in ijs reconditam delibârunt, ab ipsis àgrè avelli possint: quantò plus liquidiorum, & planè cælestium deliciarum reconditum sit oportet in libris spiritualibus, qui ex increatæ Sapientiæ officina prodierunt, & lectionem propinant non lutulentam vel carnem putridam olentem, sed aromatibus cælestium apothecarum conditam; unde & doctiores evadamus & saniores? Servire possunt equidem honestæ distractioni profani quoq; libri, si illimes sint: sed ea in illis tenenda moderatio; ne nobis è manibus expungant potiores, quibus spiritus instruatur & pascatur. Pelle luit, & quidem satis acerbè; S. Hieronymus nimiam profanæ lectionis aviditatem, & spiritualis neglectum. Rem describit ipsemet accurate

tè, in *Regul. Monast.*

Cùm ante annos plurimos, inquit, domo, parentibus, sororibus, & quod his difficilius est, consuetudine laudioris cibi, propter cœlorum regna me castrassem, & Jerosolymam militaturus pergerem: bibliotheca, quam mihi Romæ summo studio confeceram, carere non poteram. Itaq; miser ego lecturus Tullium jejuniabam. Post noctium crebras vigilias, post lacrymas, quæ præteritorum recordatione peccatorum ex intimis visceribus fluebant, Plautus sumebatur in manus. Si quando in memetipsum reversus Prophetam legere cœpissem, sermo horrebat incultus: & quia lumen cœcis oculis non videbam; non oculorum putabam culpam esse, sed Solis. Dum ita me antiquus serpens illuderet: in media ferme Quadragesima medullis insu a febris, corpus invasit exhaustum, sine ulla requie (quod dictu quoq; incredibile sit) infelicia membra depasta est; ut ossibus vix hærerem. Interim parantur exequiæ, & vitalis ani-

mæ

*per Lectionem Spiritualem*

animæ clamor, toto jam corpore frigescente, in solo tantum tepente corpusculo palpitabat: cum subito raptus in spiritu, ad tribunal Christi pertrahor; ubi tantum luminis erat & tantum ex circumstantium claritate fulgoris; ut projectus in terram sursum aspicere non auderem. Interrogatus de conditione, Christianum me esse, respondi. At ille, qui præsidebat; *Mentiris*, ait: *Ciceronianus es non Christianus. Ubi enim thesaurus tuus, ibi & cor tuum.* Illico obmutui, & inter verbera (nam cædi me jusserat) conscientix magis igne torquebar, illum mecum versiculum repetens: *In inferno autem, quis confitebitur tibi?* Clamare tamen cœpi, & ejulans dicere: *Miserere mei, Domine, Miserere mei.* Hæc vox inter flagella resonabat. Tandem ad præsidentis genua provoluti, qui adstiterant, precabantur: ut veniam tribueret adolescentiæ, & errori locum pœnitentiæ daret, exacturus deinde cruciatum, si gentilium aliquando literarum libros legissem. Ego  
qui

qui in tanto constrictus articulo, vellem etiam majora promittere, dejerare cœpi; & nomen ejus obtestans, dicere: Domine, si unquam habuero codices sæculares, aut si legero: te negavi. In hæc sacramenti verba dimissus, revertor ad superos, & mirantibus cunctis oculos aperui, tanto lacrymarum imbre perfusus; ut etiam incredulis fidem facerem ex dolore. Nec verò sopor ille fuerat aut vana somnia, quibus sæpe deludimur. Testis est Tribunal illud, ante quod jacui; Judicium testis, quod timui: Ita mihi nunquam contingat talem incidere quæstionem.

Notandum: quòd Hieronymus non lectitabat Nasonis Metamorphoses, & Artem amandi; nec in similibus paludibus piscabatur Veneres: non erat immerſus Tacito, ut juxta ejus maximas explicaret Evangelium, formaret Christianismum &c. crimen erat, *Ciceronianum* esse; id est, castigatissimo Authori immoderatum addixisse studium, & sacras asceticasq; neglexisse paginas.

ginas. Cautus igitur probusq; Viator  
ita suas moderabitur Lectiones: ne o-  
lim livido tergo solvere cogatur mi-  
nerval. Imitabitur & iter faciens, &  
domi residens Æthiopum reginæ mi-  
nistrum; qui Act. 8. Hierosolymâ re-  
diens, sacrâ Isaïæ Prophetæ lectione se  
diltrahebat; meruitq; legendo, quod  
non obtinuit orando, Apostolum Phi-  
lippum habere viæ comitem, fidei Ma-  
gistrum. Advertit ibid. S. Chrysosto-  
mus, & Conc. 3. de Lazaro: *Si Eunuchus ille in via præstitit diligentiam: co-  
gita qualis fuerit domi versans. Si tem-  
pore profectionis non sustinuit absq; le-  
ctione manere multò minùs domi sedens.  
Si nihil intelligens legebat, nec destitit  
à lectione; multò minùs postquam didi-  
cerat.* Indefessus hac in parte fuit S.  
Carolus Borromæus: qui etiam equi-  
tans, visitando Diocesim, legebat; ha-  
bebatq; appensum ephippio sacculum,  
libris plenum, quos per vices legebat;  
ut in ejus Vita scribit Giusanus.

Porro cum inter Libros Spirituales,  
qui itineranti serviant, opportunissimè  
sit



fit Libellus de Imitatione Christi, jam Thomæ Kemp: jam Gersoni Parisiensi adscriptus: ex eo Lectiones opportunas pro singulis Hebdomadæ diebus selegi ac infra suppeditabo. Tanti æstimavit illum quidam Maurorum, quos Algerianos vocant, Rex: ut cuidam è nostris PP. Algerij redemptionem captivorum promoventi, eundem in linguam Turcicam conversum ostentârit in Bibliotheca sua, affirmans: Pluris se se unicum illum facere, quàm omnes Mahometanos: *teste Henerico Sommalio in Epist: Dedicat: S. P. N. Ignatius*, ut accurratè observavit P. Lud: Conzalez, quotidie ante prandium Caput unum ex hoc libello leggebat, eo quo disposita sunt ordine: post prandium alterum, quod fortuita Codicis apertio dabat; inveneniebatq; in eo semper materiam præsentì statui convenientem. Unde & socijs author fuit: ut familiarem hanc praxim haberent.

*Nunquam de manu tua & oculis tuis  
recedat Liber: monet S. Hieron: ep. ad  
Rustic:*

DISTRA-

# DISTRACTIO IX.

*Per Conversationem comem, & pi-  
am in diversorijs & viis.*

**S**I facundus comes in via pro ve-  
hiculo est: Candor & comitas  
in conversando, par cygnorum est  
(quales Antiquitas junxit curru Mer-  
curij) quibus vehiculum hoc feratur  
suavissimè. Occurrunt non rarò in  
itineribus, & diversorijs lapides offen-  
sionis; impingimus in homines inhu-  
manos, asperos & injuriosos; quos  
nisi humanitate & comitate concilia-  
veris, non pauca devoranda sunt in-  
commoda. Comitas est non minùs  
prudens, quàm speciosa Abigail; ira-  
tos, & jam in cædem ruentes, placare  
doctissima; similis thaumaturgo Moy-  
si; qui *in verbis suis monstra placavit.*  
Eccli. 45.

In diversorijs subinde vel mensa non  
instruitur maturè, vel necessaria non  
suspenditantur, vel alia stomachum  
movent incommoda: comis conversa-  
tio cum comitibus itineris, cum alijs  
qui

qui ibidem reperiuntur, viatoribus, cum hospite & parvis ejus liberis, tollit moras, pellit tædia, conciliat amicos, acquirit necessaria, imò copiam rerum, juxta illud Eccli. 6. *Verbum dulce multiplicat amicos, & lingua eucharis bono in homine abundat.*

Incidimus subinde in homines, è quorum conscientia proscripta est cum Deo pietas: Comitas pia est sapiens illa Thecuitis, quæ novit proscriptos reducere in Jerusalem, & afflictiis atque periclitantibus reddere visionem pacis. Sic reddidit in Belgio viro cuidam nobili & opulento, de quo *Crombetius lib. 2. de stud. perfect. c. 2.* Admiserat is facinus quoddam, quod prodere, & auribus confessarij committere, morte & damnatione æternâ pejus ducebat. Agitabat tamen conscientia hominem, & requiem nullam dabat. Inaudierat fortè Antverpiæ pro concionè: neminem teneri ea peccata confiteri, quorum nulla esset memoria: hinc nihil non molitus est, ut peccatum illud è memoria deleret. Ivit per varia vo-  
lup-

luptatum genera, scelera sceleribus accumulans; vel ut antiquum illud obrueret; vel ut novis conscientiae tumultibus vetus ille tumultus, quasi clavus clavo pelleretur. Sed frustra omnia. Abijt ergo in exteras regiones, quasi seipsum relicturus esset in Belgio: verum & illic se reperit. Igitur animum applicuit studijs, quæ totum petunt hominem, ut sunt Disciplina Mathematicæ & aliæ affines: sed & hæc nihil profuerunt. Audit tandem peccata Contritione deleri. Ergo in hanc totis viribus incumbit, jejunia, cilicia, aliasq; mortificationes multiplicat, addit largas eleemosynas: nec sic animus conquiescit, quia deerat dolori propositum confitendi. Quid agat miser? Quanquam satis felix, quod tam diu à bono DEO toleratus. Tandem concludit, vitam violentè abrumperet: atque in eum finem rhedâ conscensâ, domum tendit. In via, per benignissimam DEI miserentis Providentiam, incidit in quendam è Patribus nostris. Ut igitur gravatum animum

mum ejus colloquio levaret nonnihil, invitat ad currum suum, urget, ac tandem evincit. Pater, captâ comiter occasione, suaviter sermonem injicit de DEO & Divinis, atque post alia ad Confessionem delabitur. Tetigit ea vox ulcus hominis: & Quid ais? inquit. Unde me nosti Pater? Cui iste: Nusquam te, Domine, vidi: sed nos de more ejusmodi sermones miscere solemus. Si qua in re ope mea eges: præstò sum. Juveris? inquit ille; sed quid si confiteri renuam? Advertit Pater latere ulcus aliquod, sed adhuc non satis maturum. Ergo cedendum tempori, & pio dolo utendum, ratus; spondet: se missâ Confessione remedium procuraturum. Arripit ille conditionem; ad omnia se liberalissimè offert, quantumvis dura: modò confiteri non cogatur. Interea ad aulam cum pervenissent; jubet Pater liberalius instrui epulum, & hilari mente, qua maximè egebat, coenare; omnia deinceps fore expedita, juvante DEO. Nocte quietè transactâ, Functâ quædam

dam ruminanda ei obtulit: deinde  
suaſit Conſcientiæ diligens examen,  
non ad faciendam Confeſſionem, ſed  
ut de ſingulis gravioribus noxis do-  
leat; deniq; cum in ſylvulam, quaſi  
temporis fallendi gratiâ, progreſſi ef-  
ſent, rogat: An ſatis diligenter con-  
ſcientiam diſcuſſerit, ? Ne tamen fortè  
quidpiam non adverterit, ſuggeſſurum  
ſe quædam dicit. Receniet igitur  
ſpecies quaſdam graviorum peccato-  
rum: ubi verò id, quòd maximè homi-  
nem premebat, attigit; perturbatus  
miſer, Illud eſt, inquit, illud truculen-  
tum, ſceleſtum, infandum, quod eloqui  
non audeo. Tum Pater: Jam ait,  
illud confeſſus es; neq; alia re opus eſt,  
quàm ut cætera prodas. Fecit ſine  
mora & fideliter; expertuſq; eſt ma-  
gno ſuo ſolatio & commodo: quanta  
ſic felicitas, in comem, pium, & pru-  
dentem itineris ſocium incidille. Ex-  
pertus quoq; bonus Religioſus; quàm  
fructuoſus ſic ſermo divinus humanitate  
conditus. *Qui dulcis eſt eloquio: com-  
mendatiorem reddit doctrinam.* Prov. 16.

Egregie

Egregiè in hoc dicendi agendique genere versati fuerunt primi S. P. N. Ignatij Socij, de quibus Orlandinus Hist: Soc: lib. 2. n. 4. scribit: *In hospitio mendicos, in itinere viatores instruebant.* Specialiter de P. Petro Fabro scribit lib. 3. n. 29. *Inter conjunctionem cum DEO atq; Celitibus, nullas prætermittebat occasiones ferendæ pietatis. Indagabat vias omnes omnibus consulendi, & quocunq; ingrediebatur, omnem pÿ sermonis occasionem intentâ mente captabat; in omni congressu atq; convictu in circulis atq; conventibus, in templis ac foris, in domibus atq; vijs, in convivijs & itineribus.* Cavendum autem: ne dum homines comitate captare studemus; in absonas quasdam levitates delabamur; aut illis præbeamus ansam, aliquid incôveniens in præsentia nostra loquendi vel agendi familiaritate nimia pariente contemptum. Unde de eodem P. Fabro tradit ultra Orlandinus. *Jam inde à principio imperaverat sibi: ne quid in conventu hominum conniveret, ne quid dissimularet; sed perpetuis de DEO, deq;*  
*virtute*



*virtute colloquiis, quid profiteretur, ostenderet; ut nemo se præsente auderet, aut minùs aliquid prudenter facere, aut mollè aliquem & delicatum inferre sermonem.*

De S. Francisco Xaverio in Indiam navigante, tradit Turfellinus libr. 1. vitæ, cap. 13. Eum nauticæ turbæ militumque, qui eâdem navi vehebantur, ad mille circiter capita, mores depravatos mirificè correxisse; redditq; rationem: *Erat in Xaverio perpetua oris hilaritas, omnium animos comitatis dulcedine alliciens. Itaq; homines quoq; flagitijs sceleribusq; cooperti, vulgò à Religiosorum virorum consuetudine congressuq; abhorrentes, jucundissimâ Francisci consuetudinem expetebant avidius. Et ille haud rudis cujusq; generis animos tractandi, paulatim eos benevolentia delinatos reflectebat à vitijs.*

Deniq; semper & ubique morem gerere oportet Apostolo monenti Coloss. 4. 6. *Sermo vester semper in gratia sale conditus sit; ut sciatis: quomodo oporteat vos unicuiq; respondere. Duo requirit: Ut scilicet sermo noster, sive sæ-*

98. *Distractio X.*

cularium sive religiosorum, sit *ingratia*; id est suavis & modestus; & insuper sit *sale prudentiæ conditus*; non mollis, ne dicam putidus; nec nimius vel intempestivus, aut inconveniens.

DISTRACTIO X.

*Cum Sapientia & Providentia  
Divina.*

**I**ucundissima inter omnes hæc est Distractio; quæ vel sola sufficere posset omnibus itineris molestijs levandis, & animi tædijs depellendis cum omni curarum nimiarum agmine. Nam providentissimæ Sapientiæ Divinæ & sapientissimæ providentiæ, conveniunt eminentissimè omnia magnificentissima, & voluptatis intimæ plenissima elogia, quæ in Divinis literis dantur Sapientiæ. Ut Proverb. 8. *Melior est Sapientia cunctis pretiosissimis; & omne desiderabile ei non potest comparari* Et Sapi. 7. *Latatus sum in omnibus: quoniam antecedeat me ista Sapientia.* - Preposui illam regnis & sedibus, & divitias nihil esse duxi in comparatione illius. &c.

Et

Et c. 8. *Non habet amaritudinem conversatio illius, nec tedium convictus illius: sed letitiam & gaudium.* Quæcunque enim ingruant incommoda, pericula, & calamitates: ex omnibus vel eripit amatores suos, vel luctantes roborat, & victores coronat; prout ibidem capit. 10. varijs exemplis declaratur. *Hæc profugum iræ fratris Justum (Patriarcham Jacob) deduxit per vias rectas, & ostendit illi regnum Dei, & dedit illi scientiam Sanctorum, honestavit illū in laborib9, & complevit labores illius. In fraude circumvenientium illum adfuit illi, & honestum fecit illum. Custodivit illum ab inimicis, & à se ductoribus tutavit illum; & certamen forte dedit illi, ut vinceret, & sciret, quoniam omnium potentior est Sapientia. Hæc venditum Justum (Joseph) non dereliquit, sed à peccatoribus liberavit eum: descenditq; cum illo in foveam, & in vinculis non dereliquit illum, donec afferret illi sceptrum regni &c.* Plura de Sapientia Divina videri possunt in Breviario meo Ascet: part: 3.

De Providentia Part: 4.

Recentiorum benignissimæ Providentiæ exemplorum præsertim erga Itinerantes, pleni sunt libri, plena etiam hodie viventium memoria. Pauca tango. S. Petrus de Alcantara in itinere oppressus nocte, ne etiam nivensissimâ cadente opprimeretur, tugurium obvium ingressus est: sed cum hoc sine tecto esset, Divina Providentia nives supra ipsum per modum fornicis suspendit, servavitque indemnem. *Breviar. Rom, 19, Octob.*

S. P. N. Ignatius initio Conversionis suæ susceptâ in terram Sanctam peregrinatione, Venetias sub noctem appulerat, cumque ignarus lingvæ hominem non haberet, qui Xenodochium monstraret; decrevit in foro publico noctem agere. At Divina Providentia voce disertâ inter quietem, pijsimum urbis Senatorem, Marcum Antonium Trevisanum monuit: *Tu in molliculitra & palatio noctem agis; Famulus & Amicus meus in foro sub dio? Profilijt ille, & repertum Ignatium.*  
huma-

*Cum Sapientia Divina.* 101  
humanissimè domi suæ habuit. *Bartoli in Vita.*

B. Stanislaum Kostkam, Viennâ Romanam petentem, eadem Providentia, ne ab insequentibus agnosceretur protexit; & famentem Eucharistico epulo per Angelos refecit. *Sacchinus in Vita.*

In Flandria tres rusticas puellas cum pecoribus pascendis in campum procedentes, improvise aggrediuntur tres, Veneris potius quàm Martis, Satel'ites, sollicitantq; ad scelus, imò vim parant. Illæ cum aliud non suppetere præsidium, procumbentes in genua Virginum Reginae se commendant. Et ecce geminum benignissimæ Providentiæ miraculum. Terra sensim dehiscit, & puellis velut in maternum sinum receptis, viridissimo cespite mox supra earum capita coalescit. Milites impuri fulmina meriti, lumine Divino perfunduntur, atq; re enarrarâ in sylvam se recipiunt condignos poenitentiae fructus acturi. *Atlas Marian. in B. V. Missinensi.*

B. Henrico Susoni in quadam Apo-

stolica expeditione, cùm nimiùm fessus progredi ampliùs non posset: suppeditavit Divina Providentia pulcherri-  
 mum eqvum, qui freno & fellâ instru-  
 ctus, è sylva cursu ad ipsum contendit,  
 atq; ante virum DEI constitit velut in-  
 vitans ad conscendendum. Actis DEO  
 gratijs conscendit Henricus, & suavis-  
 simè portatus cùm ad pagum quen-  
 dam pervenisset, dimisit humanissimum  
 bajulum: qui celerrimè ex oculis se sub-  
 ducens, docuit sessorem suum, unde ve-  
 nisset. *Surius in Vita.*

Quid? quòd eadem Providentia ip-  
 sos Orci satellites ad eam humanita-  
 tem compulerit: ut Joannem Parmen-  
 sem Ministrum Generalem Ord. Min:  
 cum socijs in sylva intempestâ nocte  
 oberrantem, æde repentè excitatâ ex-  
 ciperent, pedes peregrinis lavarent, &  
 lautâ coenâ famentes reficerent? *Va-  
 dingus in Annal. anno 1248.*

Anno 1570. ingens Oceani exunda-  
 tio noctu hausit aliquot Fœderati Bel-  
 gij insulas, & in sola Frisia 20. cir-  
 citer

citer hominum millia. Per dies frequentes missi cum cymbis, qui naufragij reliquias colligerent, in colle quodam repperunt Infan-tem, illuc cum fele cunis adve-ctum, placidissimèq; ve-lut in sinu Providentiæ Divinæ, dor-mientem. *Engelgr. Dom. 6. post Epiph.*

Non deseret ergo etiamnum viato-res sui amantes eadem Sapientissima Providentia, & providentissima Sapi-entia Divina: si familiari cum ipsa conversatione uti voluerint, & se to-tos cum filiali fiducia in maternum e-jus projecerint sinum. Porro occupari cum illa confidenter poterunt, non mi-nore sua voluptate, quàm commodo.


1. Elevando sæpius mentem ad il-lam, & recolendo: quomodo per or-bem universum, cælestem & terrestrem diffusa, omnia & singula perlustrat, disponit, moderatur, attingens à fine ad finem fortiter, & disponens omnia suaviter. 2. Admirando, laudando, & extollendo ipsam ex occasione obje-ctorum in oculos aliosve sensus incur-rentium. 3. Exaltando & superexal-



tando eam super omnem creatarum & creabilium mentium aciem, industriam potentiam & bonitatem. 4. Gratulando ipsi Identitatem cum reliquis omnibus perfectionibus Divinis: quòd non sit actus aliquis accidens DEO, sed verus & totus DEus. 5. Gaudendo: quòd in omni populo & in omni gente primatum habuit, & omnium excellentium & humilium corda virtute calcavit (Eccli: 24. ) capiens astutos in astutia sua, & de stercore elevans pauperes, ut solium gloriæ teneant. 6. Desiderando: ut omni mundanâ sapientiâ extinctâ, omnia procedant ad nutum Sapientiæ & Providentiæ Divinæ. 7. Subijciendo ipsi plenè nostra omnia & nos ipsos. 8. Orando: ut nos deducat per vias rectas, tum ad terminum præsentis itineris, tum in domum beatæ Æternitatis.

Sic occupatis & distractis elabetur, non dubito, Iter sine tædio, & cum uberrimo meritorum proventu: nec fallemus tempus, sed ipsum unâ cum beata lucrabimur Æternitate.

HEBDO-



# HEBDOMADA

*Piarum & Jucundarum*

DISTRACTIONUM

*Cum DEO & DJVJS.*

DIES DOMINICA

DEO UNI-TRINO

Sacra

MEDITATIO.

*De Itineribus varijs Personarum*

*Divinarum.*

I. **C**onsidera primum Iter Di-  
vinarum Personarum in-  
tra Infinitatem & Immensitatem  
Essentiæ Divinæ, per æternas &  
incomprehensibiles Processiones.  
A prima persona, prima rerum  
omnium Origine, procedit Se-  
cunda Viâ Intellectionis per ve-

Es

ram

ram generationem, ut verum VERBUM, pariterque ut propriè Filius. Ab hac & prima procedit Tertia, Viâ volitionis, ut verus Amor, & utrique illi consubstantialis Spiritus. Generationem illius, & spirationem hujus quis enarrabit? Credo, quod non capio. At à nobis quàm multa quidem, sed inania & informia procedunt verba Mentis & Oris? Quàm tepidum, ne dicam frigidum, erga DEUM spiramus amorem? Quàm ferventem & inordinatum erga creaturas?

II. **C**onsidera secundum Iter Divinarum personarum extra Essentiam Divinam (per Creaturarum productionem) viâ Omnipotentiae. Egressa est per hanc, & se mundo spectandam exhibuit Potentia Patris, Sapientia

tia Filij, Bonitas Spiritûs sancti. Quàm potens, qui omnia produxit verbo? Quàm Sapiens, qui tam scitè digessit & gubernat omnia? Quàm bonus, qui tam liberaliter se communicavit omnibus? Benedicite omnia opera Domini Domino: laudate & superexaltate eum in sæcula.

III. **C**onsidera tertium Iter Divinarum Personarum viâ Charitatis; non solum quando propter nimiam charitatem suam descenderunt ad opus Redemptionis nostræ, carnem assumente Filio, Patris obumbrante virtute, Spiritu S. in Virgine superveniente: sed etiam dum nunc diligentes se gratiosissime inuisunt, juxta illud Joann. 14. *Qui diligit me, Pater meus diliget eum, & ad eum veniemus, & man-*

*sionem apud eum faciemus. O diligam te Charitas infinita: nec aliud nisi propter Te!*

IV. **C**onsidera quartum Iter Divinarum Personarum viâ Justitiæ: ut quando descenderunt ad condemnandam & evertendam Sodomam, atq; dissipandos ædificantes turrim Babel. Universæ enim viæ Domini non solum Misericordia, sed etiam Veritas & Judicium. O Domine, dum veneris judicare: noli me condemnare. Dabo operam: ut dirigantur viæ meæ ad custodiendas justificationes tuas.

*Affectus pij*

erga SS. TRINITATEM.

**D***Eum verum, Vnum in Trinitate, & Trinitatem in Unitate, venite adoremus.*

*Te*

*Te invocamus, Te laudamus, Te adoramus, Te super omnia amamus, ò Beata Trinitas.*

*Spes nostra, Salus nostra, Honor noster, ò Beata Trinitas.*

*Gloria tibi Trinitas æqualis, una Deitas, & ante omnia secula & nunc & in perpetuum.*

*Ex quo omnia, per quem omnia, in quo omnia: ipsi gloria in secula.*

*Benedicamus Patrem & Filium cum S. Spiritu, laudemus & superexaltemus eum in secula.*

*Gloria Patri & Filio & Spiritui S., sicut erat in principio, & nunc & semper, & in secula seculorum Amen.*

*Benedicta sit S. Trinitas & individua Unitas, Pater, Filius & Spiritus S., quia fecit nobiscum misericordiam suam.*

*Adesto unus DEUS Omnipotens,*

*Pater, Filius & Spiritus S.*

*Te unum in substantia, Trinitatem in Personis profitemur.*

*Libera nos, Salva nos, vivifica nos ô Beata Trinitas.*

*Gratias tibi vera & una Trinitas, una & summa Deitas, Sancta & una Unitas.*

*Te DEUM, Patrem ingenitum, Te Filium Unigenitum, Te Spiritum Sanctum Paraclitum, Sanctam & Individuam Trinitatem, toto corde & ore confitemur, laudamus atq; benedicimus: Tibi gloria in Secula.*

*Benedicat nos DEus, DEus noster, benedicat nos DEus: & metuant cum omnes fines terra.*

*Hymni.*

de SS. TRINITATE,  
HYMNUS.

Ecclesiæ Matutinus

Sum-



**S**umme Parens clementia  
Mundi regis qui machinam  
Unius & Substantia,  
Trinusq; Personis DEUS:  
Da dexteram surgentibus,  
Exurgat ut mens sobria,  
Flagrans & in laudem DEI  
Grates rependat debitas.

Tu Trinitatis Unitas,  
Orbem potenter quæ regis,  
Attende laudis Canticum,  
Quod excubantes psallimus.  
Ortus refulget Lucifer,  
Præitq; solem nuncius;  
Cadunt tenebræ noctium;  
Lux Sancta nos illuminet.

DEO Patri sit gloria,  
Natoq; Patris unico  
Cum Spiritu Paraclito  
In sempiterna Secula. Amen;

H Y M N U S

vespertinus.

Iam

**J** Am sol recedit igneus;  
 Tu Lux perennis Unitas  
 Nostriſ beata Trinitas  
 Infunde amorem cordibus.

Te manè laudum carmine,  
 Te deprecamur vespere;  
 Digneris, ut Te supplices  
 Laudemus inter Calites.

**P**atri simulq, Filio  
 Tibiq, Sancte Spiritus,  
 Sicut fuit, sit jugiter  
 Sacrum per omne gloria. Amen.

### Ex Hymno

P. JOANNIS Nadas S. J.  
 de S. TRINITATE

pro impetrando ipsius amore.

**O** Trinitas! O Unitas!  
 O Unitatis Trinitas!  
 Tu cor petis, cor accipe;  
 Eiq, quod vis, præcipe.  
 O Una semper Trinitas!

Ô Trina semper Unitas!  
Ter optimi ter maximum  
Amoris ô mysterium!  
Te credo, spero, diligo:  
Amoris escam colligo  
Per cuncta quæ considero.  
Tibi cor meum offero.  
Da mi Deus Te diligam;  
Te diligam, me corrigam:  
Me corrigendo diligam,  
Te diligendo corrigam,  
Fac mi Deus, te, fac, amem;  
Amoris illam da famem:  
Ut esurire te sciam,  
Mundi famem fastidiam.  
Fac, ut timens te diligam,  
Et exequi non negligam  
Quod optimum putavero,  
Tibiq; gratum scivero.  
Doce, doce me, cernere,  
Quid sit semel te perdere.  
Qui peccat heu! mortaliter

Peri-

*Peribit immortaliter !*  
*Medulla felix Optimi,*  
*Idea pulchra Maximi,*  
*Quam pulcher es quàm dulcis es?*  
*Amore quanto dignus es?*  
*Ab pœnitet quòd Optimum*  
*Mihiq; præsentiſſimum,*  
*Offenderim Te, mi DEUS,*  
*Pater meus, Finis meus!*  
*Imple meum cor lachrymis*  
*Amore ſed pleniffimis:*  
*Cor iſtud à Te conditum*  
*In Te tene reconditum.*  
*Amor cor iſtud inſtruat,*  
*Maliq; fontem deſtruat:*  
*Et arte pœnitentie*  
*Pandat fluenta gratie. Amen.*

## LECTIO SPIRITUALIS

Ex THOMA Kempenſi de Init:  
 lib. 3. cap. 34.

*Quòd amanti ſapit DEUS*  
*ſuper omnia.*

Ecce

**E**Cce DEUS meus & Omnia:  
quid volo ampliùs & quid felicius desiderare possum? O Sapidum; & dulce Verbum! sed amanti Verbum; non mundum, nec ea, quæ in mundo sunt. Deus meus & Omnia! Intelligenti satis dictum est: & sæpe repetere, satis jucundum est amanti.

Te siquidem præsentem, jucunda sunt omnia: Te autem absente, fastidiunt cuncta. Tu facis cor tranquillum, & pacem magnam, lætitiàmq; festivam. Tu facis bene sentire de omnibus, & in omnibus Te laudare: nec potest aliquid sine te diu placere, sed si tibi debet gratum esse, & bene sapere: oportet gratiam tuam adesse, & condimento tuæ Sapientiæ condiri.

Cui tu sapis, quid ei rectè non

sa-

piet? Et cui non fapis, quid ei ad  
jucunditatem esse poterit? Sed  
deficiunt in Sapiaientia tua mundi  
sapientes, & qui carnem sapiunt:  
quia ibi plurima vanitas, & hic  
mors invenitur. Qui autem Te  
per contemptum mundanorum  
& carnis mortificationem sequū-  
tur, verè sapientes esse cogno-  
scuntur: quia de vanitate ad ve-  
ritatem, de carne ad Spiritum  
transferuntur. Istis sapit DEus:  
& quidquid boni invenitur in cre-  
aturis, totum ad laudem refe-  
runt sui Cōditoris. Dissimilis  
tamen, & multum dissimilis, sa-  
por Creatoris & creaturæ, Æ-  
ternitatis & temporis, Lucis in-  
creatæ, & lucis illuminatæ.

Ô Lux perpetua, cuncta cre-  
ata transcendens lumina, fulgu-  
ra coruscationem de sublimi, pe-  
ne

netrantem omnia cordis intima. Purifica, lætifica, clarifica, & vivifica Spiritum meum cum suis potentiis, ad inhærendum Tibi jubilosis excessibus, O quando veniet hæc beata, & desiderabilis hora; ut tuâ me saties præsentia, & sis mihi Omnia in omnibus! Quam diu hoc datum non fuerit: nec plenum gaudium erit.

## DIGRESSIO

*In Italiam & adjacentes Insulas.*

**U**T Oratores, ita Viatores, tædij vitandi gratiâ, opportunas amant digressiones. Et ecce circumspiciantibus prima occurrit in cultissima Europa florentissima Italia, quam meritò dixeris unam vastam Florentiam, cujus Longitudo 200 circiter miliaria magna, Germanica, complectitur, latitudo minima 32. Urbes in ea numeravit olim Ælianus 1166. inter quas Sybaris, quæ 300. hominum armatorû milia eduxit contra Crotoniatas; teste Diodoro



odoro & Strabone: sed jam vix nomine superstes est. Undecimo Christi sæculo Guido lib. de Italiæ urbibus numeravit civitates vastiores 700. hoc demum sæculo Ricciolus 434. quarum 300. sunt Episcopales. In his & tota Italia numeravit Boterus circiter novem hominum milliones; Sabellicus vix septem: Ricciolus in sua Geographia exclamat: *O Stupendam humane vicissitudinem mortalitatis: Italiam nunc totam ad eum numerum redactam esse, quem sola Roma sub Augusto implevit.*

Cæterùm defectus in hominum urbiumque numero abunde compensatur prærogativarum excessu, quæ ex elevata in Petri Sedem Urbe in universam derivantur regionem. Eo enim gloriæ provectam videmus; ut effecta gens sancta, populus electus, Civitas Sacerdotalis & regia, latius præsideat religione divinâ, quàm olim dominatione terrenâ. Quamvis enim multis aucta victoriis, jus Imperii sui terrâ marique protulerit: minùs tamen est, quod ei labor bellicus subdidit, quàm quod pax  
Chri-

Christiana subjecit: ut notavit magnus Leo. Cùm florentissima esset Veteris Romani Imperij fortuna, ad 1500. miliaria Germanica extendebatur à columnis Herculeis in Europa ad fluvium Tygrim in Asia; & Nicephoro teste, lib. 1. hist: Eccles. cap. 17. hominum 260. milliones numerabat: Ecclesiasticum summorum Pontificum imperium communes cum orbe terraqueo universo terminos habet, imò ad summa usque cælorum sese extendit, cùm illuc frequentes ducantur coloniæ, ad implendas cælestes ruinas; & terrestre Romanorum Pontificum judicium præjudicata sit autoritas in cælo: ita jubente Christo, & attestante D. Hilario ca. 6 Comment: in Matth.

Ex urbibus Italiæ vulgò dicitur Roma Sancta, Neapolis Nobilis, Venetiæ Opulentæ, Genua Superba ( ædificiorum splendore ) Mediolanum Amplum, Bononia Fertilis, Ravenna Vetus, Padua Docta, Florentia Pulchra. Addendum: Loretum floridum à S. Æde Nazarena, in qua radix Jesse Flore  
Divino

**Divino effloruit.**

Sancta est Roma Officio Sanctissimo Vicarij Christi, Ss. Apostolorum & aliorum præcipuorum Sanctorum Corporibus depositis, varijs alijs sacris Reliquijs, Innumerabilium Martyrum sanguine, Ecclesiarum & Religiosorum, multitudine, Constitutionum, quæ pro universa Ecclesia in materia fidei & morum inde emanant, sanctitate.

Nobilis est Neapolis tum ædificiorum structurâ tum Nobilium copiâ. In Regno Neapolitano. 19. Principes, 25. Duces, 37. Marchiones, 54. Comites, 1000. & ultra Barones, numerantur. Sed hanc nobilium copiâ obscurat aliquantum copia luforum, siquidem annuum vectigal à solis chartis luforiis importat 1530. aureos. Totius regni proventus annuus ad 2. milliones & 50000. aureos ascendit. Deliciis Campaniæ ne dissolvantur Neapolitani, còercet ignivomus Vesuvius, Vesuvio frigidam Sanguis S. Januarij Mart. affundit.

Venetias non opes tantum commendant, sed mira urbis structura, magno mil-

milliari avulsæ à continente . Canali-  
bus 450 . in Insulas 60 . distingvitur,  
& pontibus conjungitur 400 . In tem-  
plo primario S. Marci turris ad 250 .  
pedes Geometr. in altum ascendit, pa-  
vimentum speciosissimo marmore stra-  
tum, armamentarium visendum cum  
Cardinalis Bessarionis bibliotheca.

Genua sic ædificiis superbit : ut in-  
platea, quæ nova dicitur, nulla sit do-  
mus, in qua non possit rex, vel po-  
tentissimus quisque princeps hospitari  
pro dignitate . Similibus non paucis  
palatiis etiam suburbia gloriantur. Me-  
diolani amplitudinem Arx totius ferè  
orbis munitissima spectabiliorem fecit,  
sed magis rara Eminentiissimi Cardi-  
nalis & Archi-Episcopi S. Caroli Bor-  
romæi Sanctitas.

Laudantur marmor Ligusticum, cry-  
stallus Veneta, equi Neapolitani, Vi-  
num Setinense, Falernum, Albanum,  
Massicanum &c.

*Dominia in Italia sunt ad-  
modum varia.*

- I. **P**ontificis Romani : ad quem pertinet ea pars Italiæ, quæ *Status Ecclesiasticus* dicitur: in quo sunt
1. Latium seu Territorium Romanum, in quo caput orbis Roma, Tusculum, Alba, Trivoli, Ostia Tib. &c.
  2. Patrimonium S. Petri: in quo Viterbiũ, Civitas Vecchia, olim Centumcellæ, Perusia, Orvietum, Ducatus Castro, Braccianum &c.
  3. Ducatus Spoletanũ, seu Umbria, in quo Spoletum, Nuceria, Eugubium, Fulginium, Assisium, Interamna, Narnia, Mons Falconis, &c.
  4. Ducatus Urbinas, in quo Urbinum: Fanum, Pisaurum, Senogallia &c.
  5. Marchia Anconitana, in qua Ancona, Macerata, Loreto, Recanetum, Fabriano &c. Portus Anconæ tam celebris ibi est, ut proverbio locum dederit: *Unus Petrus in Roma, Una turris in Cremona, Unus Portus in Ancona.*
  6. Romaniola, olim Flaminia; in qua Ravenna, Ariminum, Forum Livij, seu Forlì, Imola, Cesena &c.
  7. Territorium Bononiense.
  8. Ducatus Ferrariensis. Habet præterea

terea Pontifex Romanus in regno Neapolitano Beneventum, in Gallia Ducatum Avenionensem &c.

II. Regis Hispaniæ est regnum Neapolitanum, Ducatus Mediolanensis: & quædam loca munita in Tuscia & statu Genuensi.

III. Reipub. Venetæ est Status Venetus, Marca Trevisana, Istria, Forum-Julium, & pars Lombardiæ.

IV. Magni Ducis Hetruriæ est Ducatus Florentinus cum territorio Pisano & Senensi.

V. Ducis Sabaudia præter Sabaudiam est Pedemontium.

VI. Genuensis Reip. præter Liguriam, est Corsica Insula. Reliqua possident Dux Parmensis, Mantuanus, Mutinensis, Mirandulanus, Archiduces Austriæ in Istria & Foro-Julio, Respublica Lucensis, Helveti, Rhæti &c.

Italiæ proxima est Insularum Mediterranei maris celeberrima, & maxima fertilissimaque, Sicilia, Regni honorem sortita, sed Regi Hispaniæ subiecta; olim Horreum Italiæ dicta. No-

bilitant eam Messina, Panormus, Syracusa, Catana, & complures aliæ Nobilissimæ civitates: sed non minùs Archimedes & Euclides Mathematici, Dædalus architectus, Sybillæ Cumanae, sed magis S. Agathæ Sepulchrum. Illustrat ignivomus Aetna; qui anno 1669: fluvium effudit ignitum latitudine duorum milliarium Italicorum, profunditate, ulnarum 6. ad cujus tamen radices generosissimum nascitur vinum. Infamât famosissima naufragiis in mari Siculo loca, Scylla & Charybdis, illa scopulis, hæc voragine metuenda. Memorabilem etiam faciunt *Sicula Vesperæ*, Gallis fatales. Sed ipsi Insulæ non rarò fatales incumbunt terræ motus: quorum horribilissimus fuit Anno 1693. quo conciderunt 70 Civitates, oppressa hominum circiter centū millia.

Sardinia Insula, Regni honore insignis; sed aurâ pestilente infamis est. Herbam alit dictam *Sardonica*: quæ nervos comedentium ita contrahit; ut morientes ridere videantur. Unde paroemia: *Risus Sardonicus*. Hispanis paret regibus.

Corfi-



Corfica, Sardinia vicina, Genuensium est. Raræ magnitudinis vertagos, & admodum pusillos gignit asellos.

Melita Equitum palæstrâ celeberrima, mole exigua, sed viris fortibus magna; ex quo S. Paulum Aposto: excepit hospitem, nulla parit venenata animalia: imò terra ejus amuletum est contra venena. Vulcanias Insulas celebrent Brontes, Steropesque, & nudus membra Piracmon.

## EXCURSIO

### *In Africam Septentrionalem.*

**E** Sicilia vel Sardinia facilis est in Africam trajectio. Et juvat tantum itineris suscipere: ut videamus, an quid novi parturierit famosa monstrorum Mater Africa? Tulit illa olim tum varia naturæ portenta, tum etiam illustria ingeniorum prodigia. Tertullianos, Cyprianos, Augustinos, Fulgentios, Arnobios &c. nunc ea parte, qua mari Mediterraneo alluitur, & primis Christi sæculis, tam literis quam pie-

tate cultissima fuit, in tantam abiit sylvam : ut totus ille tractus à freto Gaditano ad regnum Tunetanum, *Barbaria* appelletur, & sit. Complectitur autem hæc Barbaria regna Fessæ, Marrocci, Tunetanum, & Billedulgerit, præter Remp. Algerianam & Tripolitana, ac Prov. Barchanâ, cui adjacet Ægyptus. Ad semptemtrionalem Africam pertinent etiam Numidia, Nubia, Lybia & alia complura regna, horribili barbarie inculta. Ipsa Ægyptus, Africæ pars nobilissima, quæ priscorû Patrum, eremi Cultorum virtute & multitudine in Paradisum quendam transferat: jam nihil nisi Mahometismi lolia parit, & porcina monstra.

Quanquam placuit subinde Divinæ Sapientiæ, etiam his posterioribus sæculis, è media hac barbarie, velut ex vili glarea & saburra, pretiosissimas quasdam seligere gemmas, atq; Europæo orbi ostentare. sic anno 1645. regis Tunetani, *Amat Day*, filium primogenitum *Mamet Celebi* dictum, juvenem raris naturæ dotibus instructissimum

num, impulit arcanis inspirationibus: ut regno & sponsâ relictis, profugeret in Europam; Christo deinceps famulaturus, Audijt Mamet, paruitq; sine mora vocanti. Mirâ dexteritate navi se committens cū aliquot mancipijs Christianis, evasit feliciter in Siciliam, ibiq; Panormi maximâ solemnitate in sacro fonte est renatus. *Com. Harzard. in bist. Eccl. Afric. c. 6.*

Alteram ex eadem Barbaria collegit DEUS splendidissimam gemmam, an stellam, Anno 1654. Unigenitum regis Fessæ & Marocci, Principem naturæ & regijs dotibus tam ornatum: ut cū ivis maximo imperio par videretur. Annos quatuor supra decem eâ contentione & profectu se impendit Astronomiæ & Alcorani Mahometici studio: ut Arabum peritissimos superaret. Tredecim variarum lingvarum peritus, in variarum scientiarum materia sedecim justa conscripsit vulgavitque volumina. Nec minore facilitate felicitateque tractabat gladium, ac stylum literarium, profligatis hostium copiis,

duobusque regnis paterno adjectis, tempore modico, sed gloria apud suos maxima. Unde à patre, Muley Abdalvabrid, in consortem throni adlectus, pari humanitate & authoritate subditorum corda devincta tenebat. Incidit subindè juveni huic principi, *Muley Mahomet Atafi Serif* nominato, importuna, at divinæ providentiæ opportuna cogitatio ( ut non minus religiosum, quàm literatum, & bellicosum se probaret ) visitandi sepulchrum Pseudo prophetæ sui Mahometis in Arabia. At assensum patris, licèt diu sollicitati, impetrare nunquam potuit. Ergo incito illo navigia aliquot in vicina Insula parari jussit, & assumptis circiter 500. viæ comitibus, corporisque custodibus, viæ se dedit. In itinere deflexit ad regem Tunetanum, foederatū patris sui à quo insuper alio auctus navigio opportuniore, munito nimirum chirographo securitatis à piratis Christianis, profectus est susceptam peregrinationem.

Sed ô altitudo Sapientiæ & Misericordiæ

cordiæ Divinæ! vix altero aut tertio  
milliari provectus in altum, incidit in  
Melitenſium claſſem, à qua tentus, &  
à ſuis navibus deſertus ( quæ periculo  
ſe eripientes longiùs antecellerant. )  
ductus eſt Melitam captivus. De lytro  
ubi actum, conventum eſt in centum  
auréorum millia: quæ poſtquam ſine  
mora numeravit rex Tunetanus; dimiſ-  
ſus honorificè princeps Muley, Feſſam  
verſùs vela dedit, neglectâ ulteriore  
peregrinatione. Sed Deo viſum eſt, nō  
dimittere hanc prædam. Non procul  
proceſſerat ab inſula; cū ecce tam  
turbida eum invadit cogitatio: ut cre-  
deret inevitabile ſibi imminere nau-  
fragium, & ſe non aquis tantū ſed  
ſulphuris ardentis pelago haurien-  
dum; ſimul vocem audit jubentis, *Re-  
vertere, baptizare. Mihi ſamulaberis:  
ego te deſeram nunquam*. Jubet igitur  
navarchum momento eodem vertere  
vela: & Melitam redire: ubi ſtupenti-  
bus Equitibus, rectâ ad templum ten-  
dens, ante aram & effigiem Deiparæ  
V. proſtratus, geminas inter ardentif-

simasuspiria traduxit horas, petiitque  
instanter baptismum. Sed monitus de  
præmittenda necessaria Instructione,  
totum se Rectori Collegij Societatis JE-  
SU commisit; cujus doctrinam tam ca-  
paci complectebatur mente, tam pro-  
no corde: ut intra breve tempus facto  
fonti fuerit admotus. Cum autem co-  
mitibus suis nobilitate & fide in se ex-  
imiis, daret copiam redeundi in pa-  
triam: ex omni 35. numero, vix duo,  
qui redire voluerint, sunt inventi: re-  
liqui & principi suo & Christo fidi  
adhæserunt. Ipse princeps in aquis lu-  
stralibus non aliud assumere voluit  
nomen, quàm *Balthasaris Mendez*; il-  
lius nimirum Equitis, qui ipsum duxe-  
rat captivum. Hunc enim post Deum  
asserebat primum æternæ felicitatis suæ  
authorem. At cum deinde Societatem  
ingressus esset Romæ, Alexander VII.  
Ponti. Maxi. vocari eum voluit, *Bal-  
thasar Loyola Mendez*. In Societate  
religiosis & Theologicis disciplinis e-  
ximio profectu excultus, & Sacerdo-  
tio initiatus, ardentissimè petiit Missi-  
onem

onem in Africam, vel Indias Orientales ad Magni Mogoris imperium Mahometanæ Sectæ ( quam scitissimè refutabat P. Balthasar ) deditum : Ad hoc destinatus, dum in Italia, Gallia, ac demum Hispania copiam navigij sollicitus quærit; ac ubique Mauros & Saracenos captivos summâ comitate, & mirâ dexteritate atque efficaciâ ad Christum traducit: placuit Huic Apostolicos ejus conatus ( ultra duo millia Maurorum Africanorum jam converterat, etiam è primariis ) coronare Madriti, post vitam decennio in Societate actam singulari innocentia, usque ad famam Sanctitatis. *Hazard. lib. cit, cap. 7.*

Sic Deus etiam in media barbarie, quærit, & invenit Electos suos: & ne videatur barbaros illos Afros necessario ad fidem destituisse subsidio; Algerianis, Tripolitanis, alijsque earum gentium piratis, non raram permittit è Christianis prædam, à quibus & redemptionem eorum procurantibus Religiosis, innotescit ipsis Christus. Hispani



nis insuper munita quædam, in ora  
 Africæ maritima, tradidit & conser-  
 vat loca, ut Septam, seu Ceutam, La-  
 racham Mazaquibir, Oranum, Melilam,  
 frustra frementibus barbaris.

Fessæ magnifica duo Collegia, do-  
 cendæ Medicinæ & Iuri cùm erexis-  
 set Habu Henon rex, & in oblati-  
 Expensorum libris advertisset! qua-  
 dringenta & octoginta millia aureo-  
 rum impensa esse? librum projecit in  
 fluvium præterfluentem dicens: *Quod*  
*pulchrum & gratum est, non constat*  
*multo.*

## FERIA II.

S. ANGELO CUSTODI.

Sacra

## MEDITATIO.

*De varijs Itineribus S. An-  
 geli Custodis.*

I. **C**onsidera: S. Angelos Cu-  
 stodes nostros, in statu  
 viæ ad Beatitudinem Æternam,  
 valde exiguo tempore fuisse;  
 paucis

paucis scilicet momentis : & tamen tam magnam in cœlis gloriam sibi meruisse, fideliter adhærendo Deo, & fortiter pugnando contra Luciferum & assecclas ejus pro DEO : quantam homines multis annis vix merentur. Non quàm diu, sed quàm celeriter cucurreris, quàm fortiter pugnaveris, refert. Quot iam annis in stadio vitæ sumus, & in virtute quàm parum progressi?

II. **C**onsidera secundum Iter Ss. Angelorum Custodum de cœlo in terram ad adorandũ Christum, cum reliquis omnibus Angelis & Archangelis : ut cum Sancto Chrysostomo docet Cornelius à Lapide sive id contigerit in Nativitate, sive in Resurrectione ejus. Quantâ alacritate & promptitudine susceperunt hoc

iter? Turpis est tergiversatio, ubi Dei causa agitur.

III. **C**onsidera: tertium iter  
 Ss. Angelorum Custodū  
 de cœlo descendantium ad nostram custodiam. Si nostro essent ingenio; non pauca ipsos avertere possent ab hoc Itinere: at quia ad omnem nutum Divinum non currunt, sed volant aquilis velociore; promptissimi descendunt, non solum ut in omnibus vijs nostris nos custodiant, sed in manibus suis ferant.

O magni Principes cœli, quanta est hæc dignatio vestra ac imprimis gratiosissimi DEI nostri? Quam promptos nos esse decet ad obsequia & cultum vestrum?

IV. **C**onsidera: Quam indivi-  
 duī comites Sancti Angeli nos comitantur in omnibus  
 vijs

vijs nostris per omnem vitam: quamvis nos experiatur plerumque non solum incurios honoris ipsorum, & ingratos pro beneficiis; sed etiam injuriosos in Majestatem Divinam. Vide, ut ita vivas: ut te concive in cœlesti Jerusalem æternum gaudere possint. Summo ipsis solatio est: suos clientes ad altissimum gloriæ gradum in cœlo, deducere. Nunc autem rependamus ipsis cum S. Bernardo Reverentiam pro præsentia, Devotionem pro benevolentia, Fiduciam pro custodia.

## AFFECTUS PII.

erga S. ANGELUM

Custodem.

**S** *Ancte Angele Dei, qui Custos es mei, me tibi commissum hac die (vel nocte) ac maxime horâ extremâ, rege, custodi, illumina*

&c

*Et gubernat.*

*Angele mi Custos, tu me fac cernere justos.*

*Afflictum clementissime favore tuo recrea.*

*Ad virtutis officia semisopitū excita.  
A celi errantem semita ad celi viam revoca.*

*In conspectu Angelorum psallam  
tibi Deus meus.*

*Benedictus Deus, qui misit Angelum suum, Et eruit servos suos, qui crediderunt in eum.*

*Laudate Deum omnes Angeli ejus,  
Laudate eū omnes virtutes ejus.*

*Angele sancte, Amare cælum, me doce: Amare mundum dedoce.*

*Fac, ut Deum sic diligam: Ut semper illud eligam, quod est ei gratissimum, Tibique jucundissimum.*

*Benedictus Deus meus, qui misit Angelum suum, Et conclusit ora  
leonum*

leonum, & non nocuerunt mihi.  
Flagello pigrum excita, & relu-  
ctantem increpa: in vitæ brevi  
spatio solertiores facito.  
Sancti Angeli Custodes nostri, de-  
fendite nos in prælio: ne perea-  
mus in tremendo Dei iudicio.

## HYMNUS MATUTINUS.

**Æ** Ternè Rector siderum,  
Qui, quidquid est, potentiâ  
Magnâ creasti, nec regis  
Minore providentiâ.

Adesto supplicantium

Tibi reorum cœtui,

Lucisq; sub crepusculum,

Lucem novam da mentibus.

Tuusq; nobis Angelus

Electus ad custodiam,

Hic adsit, à contagio

Ut criminum nos protegat.

Nobis draconis amulz

Versu-

*Versutias exterminet,  
 Ne rete fraudulentia  
 Incanta necet pectora.  
 Metum repellat hostium  
 Nostris procul de finibus:  
 Pacem procuret civium,  
 Fugetq; pestilentiam.  
 Deo Patri sit gloria,  
 Qui, quos redemit Filius,  
 Et Sanctus unxit Spiritus,  
 Per Angelos custodiat. Amen.*

## HYMNUS VESPERTIN⁹

**C**ustodes hominum psallimus  
 Angelos,  
 Naturæ fragili quos Pater ad-  
 didit.  
 Cælestis comites, insidiantibus  
 Ne succumberet hostibus.  
 Nam quòd corruerit proditor An-  
 gelus,  
 Concessis merito pulsus hono-  
 ribus



*ribus,**Ardens invidià, pellere nititur**Quos calo Deus advocat.**Huc Custos igitur pervigil advola.**Avertens patria de tibi credita.**Tam morbos animi, quàm requi-  
escere**Quid quid non sinit incolas.**Sanctæ sit Triadi laus pia jugiter,**Cujus perpetuo numine machina**Triples hæc regitur, cuj9 in omnia**Regnat gloria sæcula. Amen.**LECTIO SPIRITUALIS.**Ex Capit. 22. lib. 3. Thomæ**Kempfen:**De recordatione multiplicium Bene-  
ficiorum DEI: inter quæ non in-  
fimum est custodia Angelorum.**O Mnia, quæ in anima & cor-  
pore habemus; & quæcunq;  
interiùs vel exteriùs, naturaliter  
vel*

vel supernaturaliter possidemus: tua sunt beneficia, Domine, & te beneficium, pium ac bonum commendant, à quo bona cuncta accepimus. Et si alius plura, alius pauciora accepit: omnia tamen tua sunt; & sine Te, nec minimum potest haberi. Ille qui majora accepit, non potest meritò gloriari, neq; super alios extolli, nec minori insultare: quia ille major & melior, qui sibi minus adscribit, & in regratiando humilior est, atq; devotior. Et qui omnibus viliores se existimat & indigniores se judicat, aptior est ad percipienda majora.

Qui autem pauciora accepit, contristari non debet, nec indignanter ferre, neq; ditiori invidere, sed Te potius attendere, & tuam bonitatem maximè laudare quòd

quòd tam affluenter, tam gratis  
& libenter, sine personarum ac-  
ceptione, tua munera largiris.  
Omnia exte: & ideo in omnib;  
es laudandus. Tu scis, quid uni-  
cuiq; donari expediat; & cur iste  
minus, ille amplius habeat. Non  
nostrum, sed tuum est, hoc di-  
scernere; apud quem singulorum  
definita sunt metita.

Nihil ergo amatorem tuum, &  
cognitorem beneficiorum tuorum  
ita lætificare debet, sicut volun-  
tas tua in eo, & beneplacitum  
æternæ dispositionis tuæ, de qua  
tantum contentari debet,  
& consolari.

## DIGRESSIO

*In Germaniam.*

**I**N Germaniam invitant nos Imperij  
Romani dignitas, cultissimæ regio-  
nis amplitudo, Principum copia & po-  
tentia

tentia, Cleri divitiæ, militum fortitudo, artificum industria, soli ubertas, indigenarum candor &c. Divisit Germaniam universam Carolus Magnus in Superiorem & Inferiorem. *Superiori* dedit Helvetiam, Alsatiam, Sueviam, Ducatum Vittenbergensem, Bavariam, Franconi-  
*am*, Palatinum Rheni, Bohemiam, Moraviam, Austriam, Styriam, Carinthiam, Carnioliam, Tyrolim. *Inferiori* attribuit Belgicas omnes 17. provincias, Episcopatum Leodiensem, Lotharingiam Juliam, Cliviam, Vestphali-  
*am*, Hassiam, Thuringiam, Saxoniam, Misniam, Lusatiam, Silesiam, Marchiam Brandenburgicam, Pomeraniam, Ducatum Mecklenburgensem & Hol-  
*fatiam*, præter tres Archiepiscopatus, Moguntinum, Coloniensem, Trevirensem. Hodie Germaniæ Inferioris nomine fere solum Belgium venit. Germaniæ universæ 20 circiter milliones hominum tribuunt periti.

Sæculo post Christum decimo Romanam Imperium pervenit ad Germanos, delatâ à Joanne XII. Imperiali

do, ali coronâ Ottoni I. regi Germaniæ,  
ge- de stirpe Ducum Saxonix: Gregorius  
am verò V. Ottonis III. Impe. ex sorore  
io- nepos, Apostolicâ Constitutione san-  
Hel- xit: ut Jus eligendi Imperatorem de-  
um inceps esset apud principes Germaniæ.  
co- Ne verò multitudo Electorum pareret  
am, confusionem & turbas: ad septem vi-  
rin- ros redacta est ea potestas, scilicet  
iori Mogutinum, Coloniensem, & Trevi-  
nci- rensem Archi-Episcopos; Regem Bo-  
a- hemiæ, Saxonix Ducem, Marchionem  
ali- Brandeburgicum, & Palatinum Rhe-  
am, ni: quibus deinde accessit Dux Bava-  
chi- riæ, & his annis Dux Hannoveren-  
n, sis; quorum est ea amplitudo ditionum  
Hol- & potentia: ut non minimis regibus  
tus, sint pares, & meritò à regibus Fra-  
virè- trum nomine honorentur; ab omnib9  
no- regali titulo *Serenissimi*.

Ger- Præter hos ornant Germaniam  
ones complures alii tam Spirituales (Epi-  
Ro- scopi & Abbates) quàm sæculares. *Sa-*  
er- *crici Romani Imperij Principes*: qui ho-  
peri- nor subinde Imperatorum favore ex-  
ali tenditur etiam ad externos; quemad-  
modum

modum eodem gaudent nostri Illustrissimi Varmienſes Epilcopi. Principum, numeroſam coronam ſeqvuntur ſexaginta Sacri Romani Imperij Comites & Barones, 63 inſignes & liberae Civitates Imperiales, Nobilium ingens copia, inter quos illi eximij, qui dicuntur *Immediata Imperij Nobilitas*, pariſque cum Comitibus immunitate gaudent. Ordinum Militarium ſuperſunt Supremi Magiſtri duo.

Academijs compluribus floret Germania: quarum praeſcipuae ſunt Vienneſis, Pragenſis, Colonienſis: Lovanienſis, Mogūzina, Leedienſis, Lipſienſis, Baſileenſis, Trevirenſis, Olomucenſis, Friburgenſis, Argentoratenſis, Dilingana, Ingolſtadienſis, Herbipolenſis, Francoturtenſis ad Oderam &c.

Inter Urbes Germaniae ſuperioris fertur Vienna munitiſſima, Ulma ditiſſima, Auguſta elegantiſſima; Praga maxima, Francofordia ad Moenum emporio nobiliſſima, Norimberga artificum ſolertiâ, Treviri vetuſtate inſignes. Colonia Agrippina pro Germania

niæ Roma habetur ob mœnium, 83 turribus munitorum, amplitudinem, ædificiorum splendorem, templorum multitudinem, Sacrorum lipsanorum copiam. (præsertim Trium Ss. Regum Orientalium, & undecim millium Virginum) & immunitatem ab hæresi longè lateq; circumfusa. Unde & Sanctæ nomen meritò obtinuit. Tempла numerantur ibidem tot, quot dies anni, Diocesis Colonienfis sub Imperatore Sigismundo habuit paræcias 1760 Monasteria 330 Sacerdotes 17000.

Pontes in Germania celebriores sunt Ratisbonensis supra Danubium ingentis operis, Misnienfis ferè pensilis, Basileensis supra Rhenum marmoreus, Pragenfis lapideus supra Maldavam, ulnarum 872.

Turres famosæ sunt, Viennensis ad Basilicam S. Stephani, pedum 4343 cum dimidio; Hildeshemiensis ad Ecclesiam Cathedralem auro solido tecta, Pragenfis insigni horologio instructa, Monasteriensis ad Ecclesiam S. Lamberti; è qua turri pender è cavea rex Anabapti-



starum obsidione captus.

Germania inferior, Seu Belgium intra spatium milliarium Germ: 250 continet urbes 208 oppida 150. pagos circiter 63000 totaq; Flandria videtur una Urbs continua. Ex 17. ejus Provincijs, septem se in libertatem asseruerunt, Hollandia, Zelandia, Zutphania, Frisia, Ultrajectum Transisalaniam & Groninga (quæ dicuntur. *Belgium Fœderatum*) & pars Geldriæ. Hispanis manserunt Brabantia, Flandria, Duc: Limburgen & Lucenburgen? Comitatus Namurci, Hannoniæ, Artesiæ, & pars Geldriæ. Scissionem hanc fecit non tam crudelitas, ut ajunt, Ducis Albani, quàm insolentia Evangelij Lutherani & Calviniani.

## EXCURSIO

*In Africam Australem.*

**L**ustravimus heri Africam mari Mediterraneo viciniorē, & populosiorē, tractusq; ejus alios, eò gratiores quò rariores in barbarie illa inculta. Qua parte à Tropico Cancrī ad Meridi-

em protenditur, in interioribus suis rariore gaudet habitatore, & desertis squallet (incolæ olim Troglodytæ, Garamantes & Getuli dicebantur) fuitq; veteribus ferè incognita, & credita omnino inhabitabilis sub Zona torrida & Equatore Sed negotiatorum modernorum, præsertim regum Lusitanorum, solertia & diligentia, amplissimas & valdè populosas in Africa Australi & Orientali detexit regiones maximè in partibus Oceano Æthiopico propinquioribus: ut Gualatam, Biasaram, Guineam, Loango, Congo, Angolam, Cassariam, &c. Omnes earum regionum incolæ nigerri ni corpore & animo.

Usq; ad Annum Christi 1400 terminus navigationis in mari Atlantico fuerant radices montis Atlantis & famolium promontorium malignantis naturæ vocabulo NON appellatum, eò quòd illuc appulsæ naves non revertantur, sed certis naufragiis interibant: ideoq; ad illud accedere, nedum ultra progredi non licebat ob immanes tempestates ventorum à promontorio illo

G. . . . . refra-

refractorum. Incidit tandem Anno 1410 Henrico, Principi Lusitaniæ, Filio Joannis I: Lusitan: regis, heroica cogitatio, ut tentaret navigationem ultra promontorium NON., lustraretq; Australem Africam, ad invehendum illi Evangelium Christi. Imò divinitus de hoc monitus dicebatur; famamq; credibilem fecit eximia ejus pietas & morum integritas in vita cælibe

Parata igitur ac rite instructa classe, vela dantur ventis, auspice DEo & Virgine DEipara: fuitq; tam felix prima excursio: ut ultra promontorium *Non* 60 circiter milliaria sint provecti Argonautæ illi. Sed rursus crescentibus in vicinia alterius promontorii, *Ganariviam* vocant, æstibus vadisq; ad reditum compulsi sunt; multum egisse visi, quòd ultra *Non* se fuisset, affirmare possent. Non fregit, sed crexit, magnanimo principi animos periculum illud novum. Alias atq; alias, toto decennio, expeditit naves, quamvis aliis aliisq; repellerentur obstaculis ulteriore progressu; donec anno 1420 duo viri

in albo Argonautarum auro scribendi, Gonzalus Zarco, & Tristanus Vaz, seu Vascus, decreverunt: non jam, ut hactenus, legere litora, tempestatibus infestissima; sed ducere in altum, & immensa Oceani tentare.

Sic animatos, & aliquantum provectos, ultra quam volebant, abstulit felix tempestas detulitq; ad insulam quandam, reficiendis navibus opportunissimam, quam *Portum Sanctum* dixerunt. Inde digressi, cum nihilominus ad Australia Africæ flecterent clavum, in aliam, eamq; longè vastiorem inciderunt insulam, sed omni habitatore destitutam & densissimâ sylvâ virentem; quam propterea *Maderam* seu *Materiam* vocarunt. Visum illis est, non modicum fore operæ pretium ( prout arborum densitas, & glebæ bonitas probebat ) si excoleretur ea insula. Contractis ergo ex Lusitania pluribus operis, ferro & igni eam purgare sunt aggressi. Tenuit integrum septennium constantissimus labor: cui tanta frugum omnis generis, ac potissimum sac-

chari, respondit ubertas: ut nomen *Paradisi Lusitani* meruerit. Fructus certè *Paradisum* sapere videntur, uvæ ad 3 & 4 palmos extenduntur, sacchari proveni-  
t9 ad 8 librarū *milliones* colligi dicitur.

His fructibus refectæ *Optimi Principis Henrici* curæ in novos assurrexerunt ausus, & conatus. Anno 1446 repertæ sunt 12 *Insulæ*, *Hesperides* & *Gorgades* dictæ, in mari Atlantico, factæq; juris *Lusitanorum*. Alia rursus post aliam instituta expeditio: donec annorum 50 laborioso & sumptuoso cursu perventum est usq; ad promontorium *Capo verde*, seu *Caput viride* dictum, ac de-  
mum ad *Montem Leana* (27 gradibus distantem à freto *Herculeo*, seu *Gaditano*) seu *Sierra Lioa* Quibus felicissimè gestis *Henricus princeps* portui be-  
atæ æternitatis est invecus anno 1460.

Conatus *Henrici* strenuè profecutus est *Alphonso V. Rex Lusitan*: ac post illum *Joannes II.* detectæq; sunt in *Australi Africæ* plaga regna complura vastissima & valdè populosa, regnum *Guineæ*, *Congo*, *Banzæ*, *Toræ*, *Cassariæ*  
&c.

&c. cum amplissimis Imperijs Abassy-  
niæ & Monomotapæ In omnibus exce-  
pto imperio Abalynorum, vel cole-  
bantur idola, vel regnabant Mahome-  
tis errores.

Regnum *Congo* primum Ecclesiæ  
Christi aggregatum est, operâ PP Ord.  
Præd. numeravitq; usq; ad annum 1587  
novem reges Christianos, Regnum *An-  
gola* excolendum susceperunt anno 1598  
Missionarij Soc. J. Fructuosissimè ibi-  
dem & in adjacentibus regnis laboravit  
P. Balthasar Barreyra, baptizato cum  
magna subditorum copia rege Banzæ,  
rege Toræ, rege Guinæ, Principibus  
Benæ, Mocumbæ &c. placuitq; Divinæ  
Bonitati in eodem P. Balthasare reno-  
vare prodigiosam Moyfis orantis vi-  
ctoriam. Lusitani enim 150 paucis fidis  
Æthiopibus stipati cum aliquot cente-  
nis Angolanorum millibus congressi,  
orante in vicino colle P Balthasare e-  
levatis ad DEum manibus, vincebant;  
desistente eodem ab oratione, vince-  
bantur. Reassumptâ igitur & constan-  
ter productâ oratione, grandi clade

profligati sunt barbari.

In regno Biafaræ insigni fructu de-  
ludârunt PP. Carmelitæ. Commendant  
Barbaris Mauris Europæos ipsæ fero-  
cissimæ bestię. Nam in Guinea tigri-  
des, quæ ibi sævissimæ sunt, in nigros  
tantum homines sæviunt, albis parcent.  
Idem faciunt in provincia Bamba. Rex  
Berbecinorum consultaturus cum Opti-  
matibus suis de bello, secedit cum ipsis  
in profundam sylvam, ubi circa foveam  
paratam consistentes in coronam, ca-  
pite in foveam inclinato quisq; senten-  
tiam suam dicit. Consultatione peractâ  
impletur fovea ingestâ humo, asseve-  
rante rege: eam nulli prodituram con-  
silia ipsorum.

Regnum, seu Imperium Monomo-  
tapæ amplissimum est, & auro, quod  
non latet in visceribus terræ, sed ruti-  
lat in fluviis, dives. Quidam putant:  
ipsum esse regionem Ophir, ex qua  
classis Salomonis aurum vehebat. Im-  
perator vocat se *Regem auri*: sed man-  
cipium est impurissimi Mahometis. Ad  
Christum conversus cum matre sua &



300 proceribus à P. Gonsalvo Silveria S. J. anno 1561 : paulò pòst instigantibus Mahometanis Sacrificulis, eundem strangulari curavit Sacrilegus apostata.

Abassynorum Æthiòpum imperium in tota Africa maximum est, cujus imperatorem Pretè-Jannem dicunt. Christianos se jactant: sed schismatici sunt, & erroribus Dioscori ac Eutichetis infecti. In reducendis ad Ecclesiam multum laborarunt nostri: sed illi omnem luserunt operam; ac tandem tormenta & cædes rependerunt.

## FERIA III.

## DIVIS TUTELARIBUS

in Sacra

## MEDITATIO

*De varijs Sanctorum Itineribus.*

I. **C**onsidera: quomodo Sancti, specialiter Tutelares tui, in via mandatorum Divinorum impigrè decurrerint: & quidem aliqui inoffenso pede; alij,

si quando offenderunt, moras traxerunt vel deviârunt; tantâ deinde contentione hoc iter sunt profecuti, ut multos præverterint. Inspice, & consule pedes affectuum tuorum.

II. **C**onsidera: quantos fecerint progressus in via Consiliorum Evangelicorum & Perfecti-  
onis, tum Christianis omnibus communis, tum propriæ statûs sui & muneris. Quò magis impedita, magisq; ardua occurebat via? eò magis exultabant ad eam currendam, & quidem gigantæ-  
is passibus. Nos quomodo currimus, aut procedimus vel lassî deficimus in hac via? Fortè nec ingredi eam audemus?

III. **C**onsidera: Quàm feliciter confecerint duram & periculorum plenam è terris ad astra

stra viam. Varia ipsis impedimenta obiebat Satan, mundus & caro: sed illi tantò gloriosius, calcatis omnibus, cursum consummârunt, atq; ad repositam sibi coronam Justitiæ evolarunt in cælum, nullâ ad Purgatorium ergastulum factâ digressionem. O si & nobis fors tam felix contingeret! Continget: modò, ut illi, curramus.

IV. **C**onsidera: Sanctos, præsertim quorum tutelæ nos impensius commendamus, non solum precibus rem nostram agere apud DEum: sed etiam, ubi opus fuerit, vel expedierit, personaliter ad nos iuvandos accurrere: ut multa docent exempla. Proinde & nobis satis esse non debet: quòd multas preces fundamus ad ipsos: verùm & laborem

allquem suscipi, & sumptum impendi,convenit, in cultum & honorem ipsorum facilius conciliare solent dona Patronos.

# AFFECTUS. PII

erga Divos Tutelares.

**S**ANCTA MARIA & omnes Sancti DEI, praesertim Tutelares mei, intercedite pro nobis ad Dominum: ut nos mereamur ab eo adjuvari & salvari: qui vivit & regnat in saecula saeculorum, Amen.

Omnes Sancti & Sanctae DEI praesertim NN. intercedite pro nobis  
Subvenite Sancti & Sanctae DEI,  
succurrite omnes SS. Patroni mei.

Letamini in Domino, & exultate Justi: & gloriamini omnes recti corde.

Nimis honorati sunt Amici tui  
DEus nimis, confortatus est principatus eorum. Per merita ipsorum  
parce

*parce nobis, libera nos.*

*Gloria & Honore coronavit vos Dominus; & constituit super opera manuum suarum: adjuvate nos, ferte quam potestis, opem.*

*Exultantes in Gloria Sancti DEi respicite periclitantes minores fratres vestros.*

*Recordare Domine gloriose Virginis Matris tue, & Electorum tuorum NN. Patronorum meorum: ut eorum pia intercessione ab omnibus semper protegar adversis.*

*Cum palma ad regna pervenerunt Sancti: coronas decoris meruerunt de manu DEi.*

*Isti sunt viri Sancti, quos elegit Dominus in charitate non ficta & dedit eis gloriam sempiternam.*

*In caelestibus regnis Sanctorum habitatio est, & in aeternum requies eorum:*

## HYMNUS MATUTINUS

**S**alutis aeternæ Dator  
Jesu redemptis subveni :  
Virgo Parens clementiæ  
Dona salutem servulis.

Vos Angelorum millia ,  
Patrumq; cœtus , agmina  
Canora Vatum : vos reis  
Precemini indulgentiam.

Baptista Christi prævius ,  
Summiq; celi Claviger ,  
Cum cæteris Apostolis  
Nexus resolvant criminum.

Cohors triumphans Martyrum,  
Almus Sacerdotum Chorus,  
Et virginalis castitas  
Nostros reatus abluant.

Quicumq; in alta siderum  
Regnatis aula Principes ,  
Favete votis supplicum ,  
Qui dona celi flagitant.

Virtus, honor, laus, gloria,

*Deo Patri cum Filio,  
Sancto simul Paraclito  
In seculorum secula. Amen.*

### HYMNUS VESPERTINUS.

**P***Lacare, Christe, servulis,  
Quibus Patris clementiam  
Tua ad Tribunal gratia  
Patrona Virgo postulat.*

*Et vos beata, per novem  
Distincta gyros, Agmina;  
Antiqua cum presentibus,  
Futura damna pellite.*

*Apostoli cum Vatribus,  
Apud severum Judicem,  
Veris reorum fletibus  
Exposcite indulgentiam.*

*Vos purpurati Martyres,  
Vos candidati premio  
Confessionis, exules  
Vocate nos in patriam.*

*Chorea casta Virginum,  
Et quos Eremus incolas*

*Trans-*



*Transmisit astris, Celitumque  
Locate nos in sedibus.*

*Auferte gentem perfidam  
Credientium de finibus,  
Ut unus omnes unicum  
Ovile nos Pastor regat.*

*DEO Patri sit gloria,  
Natoque Patris unico,  
Sancto simul Paraclito,  
In sempiterna secula. Amen.*

# LECTIO SPIRITUALIS.

*Ex Capite 18. lib. 1. de Imitat:  
Christi. Thom: Kemp.*

*De Exemplis Sanctorum.*

**I**Ntuere Sanctorum vivida e-  
xempla, in quibus vera perfe-  
ctio refulsit, & religio: & vide-  
bis, quàm modicum sit, & pene  
nihil, quod nos agimus. Heu!  
quid est vita nostra, si illis fue-  
rit comparata? Sancti & Amici  
Christi Domino servierunt in fa-

me & siti, in frigore & nuditate, in labore & fatigatione, in vigiliis & jejuniis, in orationibus & meditationibus Sanctis, in persecutionibus & opprobriis multis.

O quàm multas & graves tribulationes passi sunt Apostoli, Martyres, Confessores, Virgines, & reliqui omnes, qui Christi vestigia voluerunt sequi! Nam animas suas in hoc mundo oderunt, ut in æternam vitam eas possiderent. O quàm strictam & abdicant vitam in eremo sancti Patres duxerunt! Quàm longas & graves tentationes pertulerunt! Quàm forte bellum adversus edomationem vitiorum gesserunt?

Mundo erant alieni: sed DEo proximi, & familiares amici. Sibi ipsis videbantur tanquam nihili, & huic mundo despecti, sed erant

rant in oculis DEi pretiosi, & dilecti. In vera humilitate stabant, in simplici obedientia vivebant, in Charitate & Patientia ambulabant: & ideo quotidie in Spiritu proficiebant, & magnam apud DEum gratiam obtinebant.

*Et cap. 25 ibid.* Ubique profectum tuum capias: ut si bona exempla videas, vel audias, ad imitandum accendaris. Si quid autem reprehensibile consideraveris, cave, ne id facias: aut si aliquando fecisti; citius emendare te stude. Sicut oculus tuus alienos considerat: sic iterum ab alijs notaris. Quàm jucundum & dulce est, videre fervidos, & devotos fratres, bene morigeratos & disciplinatos! Quàm triste est, & grave, videre inordinate ambulantes: qui ea, ad quæ vocati

cati sunt, non exercent! Quàm nocivum est, negligere vocat[i]onis suæ propositum, & ad non commissam sensum inclinare! Memor esto arrepti propositi, & Imaginem tibi propone Crucifixi, *Sancti Sanctorum, qui est & Idea, & Corona Sanctorum omnium.*

DIGRESSIO

*in Galliam.*

**G**Alliam commendant cultissima incolarum comitas, fides erga reges suos & amor, numerus quoq; ingens. Nam Henrico II. regnante ad 15. milliones ascenderunt. Sola Luteria circiter sex-enta civium millia censet. Ricciolus Gallia, absq; Lotharingia, Alsatia, Artesia, & Rulcionensi tractu, 20 milliones hominum tribuit. Civitates numerantur 865. Archiepiscopatus 15 Episcopatus 110 Reditus Ecclesiae Gallicanae ad 104 milliones extendit Ricciolus Insuper Galliam commendant eximia in Sedem Apostoli-

cam officia Cleri eruditio, Universitas Parisiensis, Monarchiæ à 1200 annis constans duratio, Lutetia ipsa, non tam urbs, quàm orbis compendium; Religiosarum familiarum Origines, ut Cisterciensis, Præmonstratensis, Carthusianæ, S. Antonij, Ss Trinitatis seu Redemptionis Captivorum, & Societatis JESU.

Regum Galliæ prærogativæ sunt. 1. quòd Chrysmate cælitus allato ad S. Remigium ungantur in reges. 2. Solotactu scrofulas curant. 3. Auristammam, ut vocant, seu Crucem illam rutilantem, quæ Rhemis asservatur, & stemma Liliòrum divinitus acceperunt. 4. Ipso inaugurationis suæ die sub utraq; specie communicant. 5. Non solum in manibus & humeris, ut cæteri reges sed in capite unguntur. 6. Primogeniti Ecclesiæ & Christianissimi vocantur.

Regi assistunt 12. Optimates, dicti *Parès Francia*, quòd pari inter se sint dignitate; nimirum sex Ecclesiastici, & sex Laici, à Carolo M. instituti. Re-

gis Primogenitus *Delphinus* vocatur à Provincia Delphinatus, quæ eâ conditione regibus Galliæ donata est, ut ab illa denominaretur Primogenitus regis. Parlamenti Parisiensis, quod 80 deputatis à rege, constat, præcipua est auctoritas, non rarò etiam regibus gravis.

Tolosæ in cœmeterio PP. Franciscanorum cadavera non putrescunt. Avinionæ septies septem notanda feruntur: 7. urbis portæ, 7. Xenodochia, 7. urbis paraciæ, 7. Monialium monasteria, 7. Religiosorum Conventus, 7. Collegia, 7. Palatia. Metis tam firma domorum sunt tecta; ut tormenta per ea vehi possint. Carnoti antiquissimæ colitur Imago DEiparæ V. prodigiis clara, quam multo ante Christum natum Druidæ veteres consecrarunt *Virgini pariturae*. Lugdunum celebre est arâ illâ, ad quam à Caligula Imp: certamen institutum Græcæ Latinæq; facundia, quo victi scripta sua, loco spongiæ, lingvâ propriâ delere debebant; aliàs ferulis castigabantur, vel Rhodano mergebantur. In ponte Aurelia-

relianensi statuam equestrem habuit Joanna Darcia, puella Pastoritia, quæ Anglis totâ fere Galliâ subactâ insolescentibus, & in civitate Aurelianensi Regem obsidentibus: divinitus iussa militem profiteri, per gradus militiæ ad ducendos exercitus ascendit, Anglos varijs cladibus fregit, & Aureliam obsidione liberavit. Supra Rhodanum, fluvium rapacissimum, puer pastoritius pontem sumptuosissimum lapideum struxit.

## EXCURSIO

*in Americam Australem.*

**Q**uartâ pars orbis terrestris America est, etiam India Occidentalis & Novus Orbis dicta. A quo quomodo, & quando sit detecta; videre licebit Excursione sequente. Australis America à civitate regni Mexicani, Carthago dicta, porrigitur usque ad Fretum Magellanicum, & vastissimas complectitur regiones, Peruanam, Chilensem, Magellanicam, Terram Firmam Paraguarâ, & Brauniam; quæ omnes regi-



regibus Hispaniæ subjectæ sunt, exceptâ Brasiliâ, quæ Lusitanorum juris est.

Peru, seu Peruvia cæteris omnibus in universa America antecellit divitiis, ob auri argentiq; opulentissimas fodinas, præcipue circa Potosium civitatem quæ etiam Argyropolis dicitur: Ipsa autem Peruvia *Castelle Aureæ* nomine honorata est. Nec in montium tantum visceribus scrutari oportet hujusmodi thesauros; ipsa terra alicubi arenas & lapillos purissimi auri egerit, & quidem in spatio multorum milliarium. Unde in palatiis antiquorum regum, & templis deorum parietes & tabulata solidis auri laminis tegebantur, vasorumq; aureorum etiam apud non opulentos usus frequens erat. Nunnio Valboæ Hispanorum Praefecto, Princeps quidam Peruanus tantam copiam argenteorum aureorumq; vasorum obtulit dono, ut ea 60 viri vix asportare potuerint. Anno 1595 argenti purissimi 85 milliones in Hispaniam devecti traduntur. Solet autem regibus Hispaniæ tantum quinta pars proven-  
tuum

tuum annuorum ex illis regionibus transmitti Rex Peruanus Agatualpa. Francisco Pizarro prælio victus, in lytrum pro libertate sua obtulit tantum auri purissimi, quantum caperet conclave in quo detinebatur. Habebat autem hoc in longitudine pedes 22 in latitudine 16 altitudinem tantam, ut maximus virorum extento gladio tabulatum ejus ægrè attingeret. Argenti verò obtulit duplo tantum.

Lapidum quoq; pretiosorum ( & in mari margaritarum ) præcipue smaragdorum, incredibilis ibi copia. Idem Pizarrus initio expeditionis suæ in Peruviam vim tantam smaragdorum aliarumq; gemmarum collegerat: ut 20 millia Almagro amico suo miserit. Magnetem quoq; optimum & multos medicos lapides ibidem terra parit.

In vallis cujusdam, Petaguelê dictæ piscina inveniuntur elegantes lapilli, quorum singuli perfecta Cruce, magnitudine unius pollicis, insigniti sunt: qui si concutiantur, in singulis, etiam exiguis partibus similiter crux reperitur.

Unde

Unde Christiani ex hujusmodi lapillis Rosaria sua conficere solent. In quibusdam locis, uti etiam in prædio Collegij nostri propè Cuzcum urbem, piscinæ à die Cinerum usq; ad Sabbatum Sanctum omnis generis piscibus abundant, etiamsi nullus sit immixtus: cum alio tempore nec minimus deprehendatur pisciculus.

Frugum tam fertilis terra, ut passim in vallibus centesimum, alicubi etiam trecentesimum fructum ferat. In valle Truxilli flos regnat, qui in uno stipite exhibet 20 aut 30 varij coloris & speciei flores speciosissimos. In provincia de las Charcas arbor est admodum procera, cujus fructus latent in foliis per modum libri compositis; in singulis autem foliis deprehenditur figura cordis humani, in corde autem signum Crucis expressum. In tercia quæ Mala nominantur, ficus est, cujus rami Austrum versus fructus ferunt valdè salubres: qui verò septentrionem respiciunt, inorriferos.

Peruanorum hoc regnum, tanquam

naturæ gazophylacium opulentissimū,  
ut regibus suis, & Christianæ Fidei  
subjicerent; conspirarunt tres Hispani  
negotiatores civitatis Panamæ, anno  
1525. Franciscus Pizarrus, Didacus de  
Almagro, Ferdinandus de Luque, ea  
conditione: ut Almagrus, tanquam o-  
pulentior: naves militesq; compararet,  
Pizarrus expeditionem in interiora Pe-  
ruviæ susciperet, Luque utriusq; ne-  
gotia interim Panamæ procuraret. Fe-  
rè ineluctabiles difficultates offendit,  
& per aliquot annos sustinuit Pizarrus:  
donec unum prælium non minus for-  
titer quàm feliciter gestum Carolo Im-  
per: asseruit Americam Australem, ipsi  
Pizarro Vices regis ibidem. Sed do-  
mitis barbaris, ipsos Hispanos inter se  
internecino bello commisit invidia &  
ambitio; gestumq; est aliquot annis à  
Didaco de Almagro contra Pizarrum,  
nuper amicorum intimum, ferè usq;  
ad excidium omnium Hispanorum, &  
necem duorum circiter millionum ex  
Indis, quos in suas quisq; partes tra-  
xerat: donec & ipsi æmuli occumbe-  
rent

rent cruenti, partasq; terras ac opes  
relinquerent aliis.

Deprehensa est apud Peruanos noti-  
tia DEI Conditoris cœli & terræ: post  
quem etiam Soli divinos deferabant  
honores, cujus sumptuosissimum tem-  
plum, totum aureis solidis laminis ve-  
stitum, videbatur Cuzci. Lima nunc  
ejus regni metropolis est, & Sedes Ar-  
chiepiscopi, atq; Proregis, patria S. Ro-  
sæ V. Nec aurum solum cum gemmis  
commendant Peruviam, sed etiam stra-  
men. Tradit enim Josephus Acosta l. 6.  
c. 14. supra vastum flumen Pontem esse  
stratum ex meris straminis & junci fa-  
sciculis dextrimè colligatis, pedum  
Geom. 300 non hominum tantum, sed  
etiam jumentorum onustorum patien-  
tem. Incolæ artifices sunt valdè indu-  
strij, & corpore non nigri.

Chilensis regni longitudo est 415:  
latitudo 120 milliarium. Ferax etiam  
est auri, vini, mellis, struthionum & li-  
gni Brasili, quamvis certis temporibus  
rigeat frigoribus acerrimis. Metropo-  
lis ejus est civitas S Jacobi.

Paraquaria regio est amplissima & foecundissima, quam ingens fluvius, *Argentens* dictus, dividit. Partem illius occuparunt Hispani, alia sui juris est: in qua Missionarij nostri ex sylvis & speluncis eductos homines ad politicam societatem instituerunt, pagos, quos Reductiones vocant, condiderunt, in quorũ singulis 8 vel 10 millia incolarum, eosq; non solum in religionis Christianæ officijs, sed etiam variis artificiois & agricultura exercent. Indolis sunt mansuetioris, ingenij autem singularis. Nam invenire ipsi nihil possunt, imitari autem dexterrimè quidquid factum vident. Ventris Ingluvie maximã laborant. Scribit inde recentius P. Sepp, quod cum quidam Patrum exerceret maritum cum uxore in agrostivã subigendo, ac postea se recepisset ad Ecclesiam pro Sacrificio divino faciendõ: illi concisum bovem grandem pro jentaculo abligurierunt, vix quartã parte relicta. Vorant autem carnes erudas ( nec assasieri possunt ad coctas ) fumo tantum non nihil perstri-

ctas.

Ætas. Cæterum ad pietatem valdè sunt  
proni & doctes

Brasiliam magnà parte circumarunt  
Lusitani, fideiq; lumine illustrarunt.  
Vastas in ea possident Provincias, & po-  
pulosas civitates, quarum aliquas, cum  
Lusitania esset sub Hispano rege occu-  
parunt Hollandi, sed inde paulò post  
pulsæ. Anno 1500 primum Brasiliam a-  
dierunt Lusitani: sed à barbaris pleriq;  
devorati. Altera expeditio anno 1549.  
felicior fuit; & jam non minùs fide-  
lium animarum, quàm cannarum sac-  
chari ferax est hæc patria.

FERIA IV.

S. JOSEPHO

*Sponsi D. Eipara Virginis*

Sacra

MEDITATIO

*De varijs S. JOSEPHI Itineribus.*

I. **C**onsidera S. Josephum cum  
desponsata sibi Virgine par-  
tui vicina proficiscentem ex ci-

H3

vitae



vitae Nazareth in Bethlehem. Causa profectiois fuit obedientia exhibenda Cæsari Augusto orbis censum agenti. Iter erat tridui & amplius, pedibus emensum ab utroq;. Inter incommoditates, illa Virum optimum gravissimè afficiebat: quòd parituræ Virgini locus non esset in oppidi etiam publico diversorio; ideoq; DEUS natus in stabulo, reclinandus fuerit inter jumenta in præsepio. Suscipienda promptè, quæ obedientia imponit itinera: & patienter ferenda pro diversoriis etiam stabula.

II. **C**ONSID: Iter S. Josephi in Ægyptum, postquam in somnis intellexit ex Angelo periculum imminens parvulo IESU. Non prætendit sive potentiam, sive incommoda Infantis, vel  
Ma-

Matris ejus: non expectavit diem, sed sine mora *consurgens accepit Puerum & Matrem ejus nocte, & secessit in Ægyptum*. Verus obediens opere loquitur *victorias* sui ipsius, non prætensiones vel excusationes.

III. **C**onf:reditū S. Josephi cum JESU & MARIA ex Ægypto post annos aliquot satis incommodè ibi transactos. Patientissimè interim expectabat ibi Angelum, tempus reditūs denuntiaturum, ac se Divinæ voluntati plenè conformabat. Non est DEUS opportunè importunè trahendus in sententiam nostram & commoda, sed patienter ferendus, etiam cū tardaverit.

IV. **C**onfid: S. Josephi iter annum Hierosolymitanum secundū legem, tempore Paschæ

chæ. Quàmvis enim non nesciret: se domi habere, quem adoraret, DEUM: legi tamen id deferendum censuit Vir Justus, nec quærenda in negotio divini cultûs compendia. Amissum aliquando in eo itinere JESUM, quò acerbius doluit: eò jucundius recepit, inventum in templo inter Doctores. Subditum deinde semper habuit, & benè precantem abeunti ad Patres. Quo cultu non prosequemur, quem sic coluit JESUS.

## AFFECTUS PII

erga S JOSEPHUM.

**S**alve Patriarcharum Apex, cui  
DEUS Omnipotens omni benedictione Spirituali in celestibus benedixit.

Salve amatorum Christi ardentissime, quem constituit Dominus  
super

*super familiam suam universam.*

*Salve Magni Consilij Adjutor & Custos fidelissime: cui Dominus credidit maximi mysterij arcanum.*

*Salve fidelissime Ecclesie Sanctae DEi Oeconome: cui frumentum Electorum & Panem vitae conservasti*

*Salve castissime Virginis Matris Sponse; cujus florem & fructum benedictum custodire tuæ Dominus commisit.*

*Salve Paterfamilias providentissime; qui sudore vultus tui Victimam salutis nostrae aluisti.*

*Salve Sanctorum Gratiosissime: quem dulci Patris nomine honoravit Mater & Filius DEi.*

*S JOSEPH patrum familias Ideæ & Provisor, tribue victui nostro temporali & spiritali necessaria.*

*Castissime JOSEPH, munda &*

*HS con-*

*conserva corda nostra in torum iuncundum Agno, qui pascitur inter lilia.*

*S. JOSEPH morientium Patrone fidelissime, adesto periclitantibus coram tribunali Divino.*

*JOSEPH, cum JESU & MARIA, sit nobis comes in via.*

*JOSEPH, ô S. Patrone, sis mihi præsens in agone.*

### HYMNUS MATUTINUS

**C**Ælitū Joseph decus, atq; nostra  
Certa spes vitæ, Columenq; mūdi  
Quas tibi leti canimus, benignus  
Suscipe laudes.

*Te Sator rerum statuit pudicæ  
Virginis Sponsum, voluit VERBI  
Te Patrem dici; dedit & ministrum  
Esse salutis.*

*Tu Redemptorem stabulo jacentem,  
Quem chorus Vatum cecinit futurū  
Aspicias gaudens, humilisq; natum  
Numen adoras. Rex*

*Rex D<sup>e</sup>us regū, & dominator orbis  
Cujus ad nutum tremunt Inferorum,  
Turba, cui pronus famulatur æther,  
Se tibi subdit.*

*Laus sit excelsæ Triadi perennis,  
Quæ tibi præbens superos honores,  
Det tuis nobis meritis beatæ*

*Munera vitæ. Amen.*

**ALIUS.**

**I***ste, quem lati colimus fideles,  
Cujus excelsos canimus triūphos,  
Hac die Joseph meruit perennis,  
Gaudia vitæ.*

*O nimis felix, nimis ò beatus,  
Cujus extremum vigiles ad horam,  
Christus & Virgo simul adstiterunt  
Ore sereno.*

*Hinc stygis victor, laqueo solutus  
Carnis, ad sedes placido sopore,  
Migrat aternas, rutilisq; cingit  
Tempora fertis.*

*Ergo regnantem flagitemus omnes*

*Adsit ut nobis, veniamq; nostris  
Obtinens culpis, tribuat superna  
Munera pacis.*

*Sint tibi plausus, tibi sint honores,  
Trine, qui regnas DEUS, & coronas  
Aureas seruo tribuis fidei,*

*Omne per ævum. Amen.*

### HYMNUS VESPERTINUS

*Te Joseph celebrent agmina Calitū  
Te cuncti resonent Christi adū chori,  
Qui clarus meritis, junctus es inclytæ  
Casto fœdere Virgini.*

*Almo cum tumidâ germine conjugē  
Admirans, dubio tangeris anxius,  
Afflatu superi Flaminis, Angelus*

*Conceptum Puerum docet  
Tu natū Dominū stringis, ad exteros  
Ægypti profugū tu sequeris plagas:  
Amissum Solymis, quæris, & invenis  
Miscens gaudia fletibus.*

*Post mortem reliquos mors pia con-  
secrat,*



*Palma mę, emeritos gloria suscipit:  
Tū vivens, Superis par, frueris Deo,  
Mirā sorte beatior.*

*Nobis sūma Trias parce precantib9.  
Da Joseph meritis sidera scandere:  
Ut tandem liceat nos tibi perpetim  
Gratum promere Canticū. Amen.*

LECTIO SPIRITUALIS

Ex Cap. 13. Thomę Kemp. lib.  
1. de Initat: Christi.

*Resistendū diligenter Tentationib9.*

**Q**uamdiu in mundo vivimus,  
sine tribulatione & tentati-  
one esse non possumus. Unde in  
Job scriptum est: Tentatio est vi-  
ta hominis super terram. Ideo  
unusquisq; sollicitus esse deberet  
circa tentationes suas, & vigilare  
in orationibus: ne diabolus locum  
inveniret decipiendi, qui nun-  
quam dormit, sed circuit, quæ-  
rens quem devoret. Nemo tam

perfectus & Sanctus est, qui non habeat aliquando tentationes: & plenè eis carere non possumus.

Sunt tamen tentationes homini sæpe valde utiles; licet molestæ sint & graves: quia in illis homo humiliatur & purgatur, & eruditur. Omnes Sancti per multas tribulationes & tentationes, (*prout etiã patet in S. Ioseph utroq;*) transierunt & profecerunt. Multi quærunt tentationes fugere, & gravius incidunt in eas. Per solam fugam non possumus vincere sed per Patientiam, & veram humilitatem omnibus hostibus efficiamur fortiores.

Vigilandum est præcipuè circa initium tentationis: quia tunc facilius hostis vincitur, si ostium mentis nullatenus intrare sinitur: sed extra limen, statim ut pullaverit,

verit, illi obviatur. Unde quidam dixit: *Principijs obsta, serò medicina paratur.*

DIGRESSIO

*in Hispaniam.*

**H**ispaniæ gloria est 1 quod ejus Rex *Catholici* elogio honoretur. 2 Quod in ejusdem ditione sol nunquam occidat; & juxta dictum regis Persarum solem pro galero habeat 3 nullus unquam regum vel Imperatorum tam amplam habuit ditionem: nemo tam distantam tam feliciter gubernavit 4 Hispania dum arma longè lateq; circumfert, ipsa à multo tempore in pace est; in confinibus solum Galliæ inquietatur. 5. In omnibus 4 orbis partibus latè dominatur. 6. In America non minus Apostolatum, quàm mercatum exercet. In solo Occidente supra septuaginta millia templorum ab Hispaniæ regibus erecta, scribit Lohnerus in Bibliot: V. *Templum*: à Jacobo verò rege in Hispania duo millia. 7 Elogium datum olim Hiberniæ, quod sit *Patria*  
*San-*

*Sanctorum*, jam occupavit Hispania.

Dividebatur olim in Regna complura; ut Legionense, Castellæ veteris & Novæ, Arragoniæ, Portugalliæ seu Lusitaniæ, Navarræ, Granatæ, Valentia, Toleti, Gallaciæ, Algarbionū, Murcia, & Cordubæ: quæ jam in unam Monarchiam coaluerunt, exceptâ Lusitaniâ. In America, præter multas amplissimas Insulas, tantum terrarum pertinet ad Monarchiam Hispanicam: ut mericò *Novus orbis* ille tractus dicatur. Illud valde mirum: quomodo natio non admodum populosa suffecerit tot populis subigendis, & in officio continendis. Nam Boterus & Nicolosius vix decem milliones hominum ipsi tribuunt: è quibus 179000 Religiosi & Ecclesiastici sunt. Matriti censentur homines circiter 150000, Granatæ 180000, Hispali aliquantò plures. Granata in ambitu suo mille circiter turribus eminet. Hispali magnificentissimum DEI paræ V. templum in redditus annuos habet 120000, aureorum, quibus aluntur Ecclesiastici

ci 400. Archiepiscopus Toletanus annum proventum dicitur habere ducenta millia ducatorum, ac insuper sexaginta millia. Hispalensis centum millia duc. Valentiaæ asservatur Calix Cœnæ Dominicæ. Jactat Hispania tria mirabilia: Civitatem igne circumdatam, Madritum scilicet, cujus muri è silicibus constructi. 2. Pontem, supra quem decem millia pecorum pascuntur: quia fluvius *Guadiana* tot milliaribus infra terram fluit, ac tandem erumpit iterum: 3. Fluvium supra pontem manantem; scilicet aquæductum copiosum Segobiae.

Lusitania seu Portugallia proprium regem nata est circa annum D. 1100 Alphonsum I. ex comite Lotharingiaë & filia regis Castellæ natum. Suas in Europa angustias, studio dilatandæ religionis dilatavit amplissimè in Indijs Occidentalibus (ubi amplissimam possidet Brasiliam in America) & Orientalibus, ubi complures easq; opulentas numerat provincias, præter varias Insulas in Oceano, & emporia

ria in Africa.

Felicitatem hanc regnorum Hispaniæ & Lusitaniæ portendisse videtur Nubes illa lucidissima, quæ nascente Christo D. noctem mediam sic per totam Hisp: illustravit: ut dies meridianus videretur. Sequens dies tres soles, æquali luce & orbe splendentes, & postea in unum còcuntes, vidit. *Isidor in Chron.*

## EXCURSIO

*in Americam Septentrionalem.*

**N**on relinquimus Hispaniam, dum in Americam excurrimus: cum & ipsa juris sit Hispanici majore ex parte, & Novam quandam nobis exhibeat Hispaniam, novam Granatam, novam, eamq; auream, Castellam &c. An quartam hanc orbis terrestris partem vel eminus conspexerint veteres Europæi aut Africanî, nondum constat: quàmvis aliqua indicia præbeat Plato in Timæo, eam vocans *Atlantidem* insulam, & Diodorus Siculus.

*Excursio in Amer. Sept. 187*

Primus illam detexit Chrystophorus Columbus Genuensis, acceptis à Ferdinando rege Castellæ in eam expeditionem tribus navigijs, virisq; 120. anno 1492 Prima se ei obtulit Hispaniola insula, ac inde alia post aliam. Edocturus igitur regem de felici navigatione, & novas copias impetraturus, redijt in Hispaniam, ductis secum decem captivis Americanis, & magna vi auri. Recreatus hoc nuncio Ferdinandus, iterum anno 1493 Columbum, ut olim Nòë columbam expedit cum Admiralij titulo & potestate, additis tribus navibus maximis, minoribus 14. & viris 1500. Progressus hic (post acrem pugnam navalem cum classe, quam mulier quædam barbara ductabat) ultra Hispaniolam, detexit Cubam & Jamaicam insulas majores præter 46 minores, & plures alias iterum iterumq; repetitâ navigatione.

Ipsam vastissimam Indiæ Occidentalis Continentem adiit tandem anno 1497. Americus Vesputius Florenti-



rentinus ( auspicijs sumptuq; regis Hispaniæ ) à quo deinceps dicta est. *America*. Magis Australes ejus partes, & celebre fretum, detexit Ferdinandus Magellanes anno 1519. Regiones complures, cum regno Mexicano populis, auro, gemmisq; refertissimas insigni fortitudine & rarâ felicitate subegit Ferdinandus Cortesius sub idem tempus. Advertit Ricciolus in Geograph. lib. 3. c. 22. DEUM opulentissimas has terras consignasse in manus regum Hispaniæ: ob ejectos totâ Hispania Mauros ( ac postea Judæos ) nullâ habitâ ratione temporalis emolumenti.

Regnum Mexicanum, à Mexico vastissima metropoli sua dictum, primum est in America Septentrionali: cujus regi subjecti erant triginta alij reges quorum quavis minimum centum millia armatorum educere poterat in aciem. In ipsa urbe 60 millia domorum numerabantur. Et tamen quadringenti Hispani, duce Ferdinando Cortesio, ausi sunt non solum cogitare de occupando tanto regno: sed

sed in ipsam Metropolim, fere temerario ausu, penetrârunt, regem duxerunt captivum, & paucis stipati Indis, contra 150 millia hostium ingenti prælio victores, de regno Mexicano totaq; septemtrionali America triumphare fecerunt Coralum V. Imp. anno 1521. Longitudini Mexicani regni assignat Josephus à Costa 800. latitudini minimæ 180 milliaria Hisp. Pecorum ibi tanta copia, ut inter opulentos Hispanos non censeatur, qui in bonis suis 40. & amplius millia boum non numerat. Rem Christianam non minore, quàm politicam, studio promoverunt ibi Hispani reges. Archiepiscopus Mexicanus præest decem Suffraganeis Episcopis, amplissimis proventibus donatis. Religiosorum non minor ibi copia, quàm in aliqua Europæ provincia: ut jam in Mexico non minus floreat religio Christiana, ac olim cultus idolorum, quibus in singulos annos 20. millia hominum, præsertim infantium, cadebantur in victimam. Advertit Flo-

rim:

rim: Remundus lib. 1. c. 4. eodem tempore, quo religiosus apostata Martinus Luther grande damnum inferre coepit Ecclesiæ Christi in Europa; alium Martinum, de Valencia dictum, Ord. S. Francisci, cum undecim socijs, largè jacturam illam compensasse in Mexico & vicinis provincijs! ubi intra paucos annos supra 20 milliones ab ipsis baptizati traduntur, Quid si addantur conversi ab alijs Religiosis, S. Dominici, Soc- JESU &c.?

Præter regnum Mexicanum, quod etiam *Nova Hispania* dicitur, completitur America Septentrionalis amplissimas alias regiones, Floridam, Novam Granatam Californiam, Canadam, Terram Labradonis & plures alias Polum arcticum versus, nondum satis cognitæ: Vastas quoq; insulas, Hispaniolam Cubam, Jamaicam, Terram novam, præter innumeras minores.

*Florida* incolas habet valde feros, cum quibus Hispani & Galli diu luctati sunt, sed exiguo fructu. Nec felici-

feliciores fuerunt operarij Evangelici? nisi quòd sibi Martyrum palmas & laureolas messuerint octo è Societate JESU.

*Canada* longè amplior, & cultura patientior est regio. Continet. *Novam Franciam*, Galliaë regibus subiectam. *Novam Angliam*, & *Virginiam* subditam Anglis Habent in ea partes etiam Hollandi & Sveci Nec frugibus, nec metallis æquat Canado alias Americaë terras. Hurones & Algonquini parent Gallis, & Christianis accesserunt: sed implacabiles patiuntur hostes Iroquæos, indomitos barbaros, cum quibus negotiantur Hollandi. Jucundum est, quod contigit novo Canadaë Gubernatori: qui cùm anno 1665. appulisset è Gallia, & à primoribus illarum regionum, subjectionem testantibus, varijs honoraretur muneribus; Huronum quidam ætate & dignitate provector, pyxidem fuligine plenam obtulit novo Gubernatori inter hanc orationem: *Quandoquidem, Domine, hic adestit, ut nos contra ferinos*

*vinos hostes nostros tueamini, nativa vero hac gratiosissimi oris vestri species militem non spiret: accipite unguentum hoc, & vultum vobis appingite, quem & Iroquæi & tigrides formident.* Ipsi enim Hurones, licet à naturæ non formosi, congressuri cum hostibus, foedissimè se commaculant, ad illorum terrorem.

Inter complures è nostris ab Iroquæis immanibus tormentis interfectis, insigniores sunt, P. Isaacus Joques, Gabriel Lallemant, & Joannes Brebeuf: quorum postremo evulsi è digitis ungues, corpus per singulas partes sadibus delumbatum, præcise manus, os contusum lapidibus, lingua adusta, axillis & renibus candentes secures admoæ, ignita è collo appensa collaria, adjectum cingulum accensum è pice & resinatis corticibus: incipienti loqui de Divinis oblectum os directo, labris concepta, truncatus natus; in proprobium baptismi fervente aqua percutus, detracta superior pelvis e capite, amputati pedes, caro à coxis ad ossa usq; avulsa, & depasta, mandibula securi diuisa, fer-

ferro ustæ plagæ & lingua orantis pro inimicis suis: deniq; pectus viventi adhuc dissectum, cor evulsum ac devoratum, sanguine sibi invicem à barbaris propinato. P. Lallemant præter similia tolerata tormenta, horis 15. lento igne tostus occubuit. P. Isaacus Jogves post incredibilia tormenta morti ereptus, cùm reductus esset in Galliam, cohiberi non potuit, quin iterum rediret in Canadam charissimam: ubi post paucos dies quæsitam adeptus est palmam.

FERIA V.

JESU EUCHARISTICO

Sacra

MEDITATIO.

*De Christo adeunte species Eucharisticas, & Cōmunicantes homines.*

- I. **C**onsidera: quomodo Christus residens in gloria Patris, ad nutum Sacerdotis consecrantis, quantumvis flagitiosi,  
I eodem

eodem momento præsentem se  
sistit per stupendam non trans-  
migrationem, sed transubstan-  
tiationem; idque in ineffabile  
commodum nostrum. Num-  
quid nos ad ipsius cultum tam  
prompti sumus?

II **C**onsidera Regem æter-  
næ summæq; gloriæ in  
tabernaculo Eucharistico, non  
ut in throno suo vel palatio do-  
minantem, nec ut honestum vi-  
atorem in diversorio comodo  
ac decente hospitantem: sed po-  
tius ut captivum quendam in  
tenebrosam carcerem detrusum.  
Et sanè Captivus est, sed Amo-  
ris. Amor nostri Potentissimum  
& gloriosissimum orbis utriusq;  
Monarcham sic captivavit. Quid  
simile præstat, vel præstabit  
circa nos noster erga illū Amor?

III Con-



III. **C**onfid: Quàm dispari affectu adit ora & pe-  
tora Communicantium Eucha-  
risticus JESUS. Ad quoddam  
gaudio gestiens se proripit: ad  
alios manibus pedibusq; relu-  
ctans intrudi visus est: & qui  
semel se permisit Judæ & Ju-  
dæis, quotidie se non negat im-  
probis Christianis. Sed vide, vi-  
de anima mea; quomodo sumas  
Dominum. Sumunt boni, su-  
munt mali, sorte tamen in-  
æquali vitæ vel interitûs.

IV. **C**onfid: Quàm miserum  
habeat hospitium Eucha-  
risticus JESUS etiam apud pro-  
bos non paucos. Vix susceptus  
est; & mox deseritur. Nec horæ  
quadrantem cum tanto hospite  
conversari sustinemus: ut mirum  
non sit, tam infructuosam nobis

esse præsentiam ejus. Ignosce  
Gratiosissime Hóspes. Promitto  
meliora.

## AFFECTUS PII

erga Venerab: Eucharistiam.

**O** quàm suavis est Domine Spi-  
ritus tuus: qui, ut dulcedinem  
tuam in filios demonstrares Pane  
suavissimo, de celo prædito, esu-  
rientes imples bonis!

Misericors & miserator Domi-  
nus escam dedit timentibus se in  
memoriam suorum mirabilium!

Panem celi dedit nobis. Alleluja  
Panem Angelorum manducavit ho-  
mo. Alleluja.

Parasti in conspectu tuo men-  
sam, adversus eos, qui tribulant me  
Cibavit nos ex adipe frumenti,  
& de Petra melle saturavit nos.  
Alleluja.

Ex altari tuo Domine Christum  
sumi-

*sumimus: in quem cor & caro nostra exultant.*

*Laudetur Sanctissimum Sacramentum.*

*Non est alia natio tam grandis, quæ habeat Deos appropinquantes sibi, sicut DEus noster adest nobis.*

*Panem de cælo præstitit nobis Alleluja. Omne delectamentum in se habentem. Alleluja.*

*O Sacrum Convivium, in quo Christus sumitur: recolitur memoria passionis ejus; mens impletur gratia, & futura gloriæ nobis pignus datur. Alleluja.*

*Tantum ergo Sacramentum veneremur cernui.*

### *HYMNUS MATUTINUS.*

**V***erbum supernum prodiens,  
Nec Patris linguens dexteram,  
Ad opus suum exiens,  
Venit ad vitæ vesperam.*

*In mortem à discipulo  
Suis tradendus æmulis,  
Prius in vitæ ferculo  
Se tradidit discipulis.*

*Quibus sub bina specie  
Carnem dedit & sanguinem:  
Ut duplicis substantia  
Totum cibaret hominem.*

*Se nascens dedit socium,  
Convalescens in edulium,  
Se moriens in pretium,  
Se regnans dat in præmium.*

*O salutaris Hostia,  
Quæ cæli pandis ostium:  
Bella premunt hostilia,  
Da robur fer auxilium.*

*Ilmi trinoq; Domino  
Sit sempiterna gloria:  
Qui vitam sine termino  
Nobis donet in patria. Amen.*

## HYMNUS VESPERTINUS

**M**eum tu gaudium o JESU es!  
14 Meum

*Meum solatium o JESU es!*

*Quantumvis omnia perdidero,  
Si JESUM, satis est, servavero.*

*Vilescunt omnia terrestria,  
Dum JESUM cogito & celestia,  
Amo te JESU mi, quia dignus es.*

*Amo te JESU mi, quia DEUS es.*

*Amo te JESU mi, quia es, qui es,  
~~Si tu me diligas, te diligo:~~*

*Et si me deseras, te diligo.*

*Et si me crucies, amabo Te,  
O JESU, JESU mi, semper amo Te,  
O si te homines cognoscerent.*

*Nunquam Te, Domine, offenderent!*

### LECTIO SPIRITUALIS

*Ex lib. 2. cap. 8. Thomæ Kemp.  
de Imitat. Christi.*

*De familiari amicitia JESU.*

**Q**UANDO JESUS adest: totum  
bonum est, nec quidquam dif-  
ficile videtur: quando verò JE-  
SUS non adest, totum durum

est. Quàm aridus & durus es sine JESU! Quàm insipiens & vanus, si cupis aliquid extra JESUM! Nonne hoc est majus damnum, quàm si totum mundũ perderes?

Quid potest tibi mundus conferre sine JESU? Esse sine JESU gravis est infernus: & esse cum JESU dulcis Paradisus. Si fuerit tecum JESUS, nullus poterit nocere inimicus. Qui invenit JESUM, invenit thesaurum bonum, imò bonum super omne bonum, & qui perdit JESUM, perdit nimis multum, & plũs quàm totum mundũ.

Magna ars est, scire cum JESU conversari: & scire JESUM tenere; magna prudentia. Esto humilis & pacificus: & erit tecum JESUS. Sis devotus & quietus, & manebit tecum JESUS. Potes citò fugare JESUM, & gratiam ejus perde-

perdere: si volueris ad exteriora  
declinare. Eligendum est magis,  
totum mundum habere contra-  
rium, quàm Iesum offensum. Ex  
omnibus ergo charis, Iesus so-  
lus dilectus specialis. Diligantur  
omnes propter Iesum; Iesus au-  
tem propter seipsum. Propter i-  
psam, & in ipso, tam amici, quàm  
inimici tibi sint chari: & pro o-  
mnibus his exorandus est, ut o-  
mnes ipsū cognoscant & diligant.

*Et lib. 4. c. 1.* O invisibilis Con-  
ditor mundi DEUS, quàm mira-  
biliter agis nobiscum! Quàm sua-  
viter & gratiosè eum electis tuis  
disponis, quibus temetipsum in  
Sacramento sumendum propo-  
nis! Hoc namq; omnem intel-  
lectum superat, hoc specialiter  
devotorum corda trahit & accen-  
dit affectum, Heu cæcitas & du-



ritia cordis humani: ad tã ineffabile donum non magis attendere!

## DIGRESSIO

*In Angliam, Scotiam Hiberniam.*

**A**lbionem Insulam partiuntur duo regna. Partem meridionalem, eamq; majorem, occupat *Anglia*, quæ etiam *Britannia major* dicitur, ut distinguatur ab ea, quæ est Provincia *Halliæ*: Aliam partem obtinet regnum *Scotiæ*. Regebatur utrumq; proprijs regibus, donec initio præteriti sæculi *Jacobus VI.* rex *Scotiæ*, *Angliæ* quoq; coronam est consecutus. Celebriores *Angliæ* provinciæ sunt *Wallia* seu *Bambria* in qua *Dehembartia*, *Povisia*, *Venedotia*: deinde *Nortumbria*, *Eastanglia*, *Westfexia*, in qua *Cornuvalia*, & *Eastfexia*. *Scotiæ* Provinciæ sunt *Albania* & *Calcedonia*. *Anglia* civitates habet 323. quarum metropolis *Londinum*: *Scotia* 94. cum territorijs 45. Toti *Angliæ* tribuit *Boterus* hominum *milliones tres* *Bangoræ* olim cœnobium monachos

*Digressio in Angliam, Scot.* 203

1200 aiebat Commertium annuum Angliæ ad milliones 12 extenditur: in varijs emporijs mille & ampliùs naves commercij causâ versantur. Ex sola lana selquimillionem quotannis colligunt. Laudatissimum est Cornuwalliæ Stannum. In tota Anglia nulli sunt lupi, præter eos, qui in Catholicos sæviunt. Londini supra Tamisim, vastum fluvium ( qui immotus stetit, dum odio fidei Catholicæ suspenderetur Edmundus Campianus è Soc. JESU ) pons est totius Europæ præstantissimus, longus 330 passus, & utrinq; magnificis ædibus ita ornatus: ut vicus potiùs, quàm pons videatur.

In Angliá S. Jacobum & S. Petrum Apostolos primùm prædicasse fidem, volunt quidam. Notabilior hujus insulæ conversio fuit sæculo secundo post Christum natum, sub S. Lucio Rege Angliæ. Relapsam ad superstitiones avitas S. Gregorius M. Papa, Misso S. Augustino cum 40. Socijs, reducit ad fidem: quam quar-

to sæculo Scoti & Hiberni ample-  
xi sunt, prædicante S. Patricio. Flo-  
rentem amœnissimè in his regnīs suc-  
cidit, ac pene extirpavit, Henricus  
VIII. ex defensore factus Everfor Fi-  
dei, Inde crudeli lanienâ sævitum in  
Orthodoxos: nec parsum summis vi-  
ris, Joanni Fischero & alijs Episco-  
pis, Thomæ Moro Cancellario regni  
& innumeris Religiosis. Horum cum  
sanguinem gustasset, etiam regiun-  
sitijt, & bibit Anglia.

In Scotia nulla domus distat am-  
pliùs à mari, quàm 20 leucis In Ca-  
ricta sunt ingentes boves, quorum  
pingvedo non concrefcit, sed instar  
olei diffluit. In Loumondo Tacu pi-  
sces carent pinnis. In Orcadum in-  
sula una certæ arboris folia in a-  
mnem prolapsa in volucres verti fe-  
runtur. Lapidibus utuntur Scoti pro  
lignis, quos etiam eleemosynæ nomi-  
ne dant pauperibus.

In Hybernia, vicina Angliæ insula  
ea fidelium fuerat pietas, tam eximia  
virtus ut Sanctorum Patria dicere-  
tur.

tur. Nultum in ea reperitur animal noxium, nec araneus quidem, aut rana? & aliunde illatum, illico moritur. Hiberniæ vaccæ lac non dant, nisi præsentē vitulo, aut ejus simulacro. In Insulis Arram corpora sub diu jacent incorrupta. Fons est, quo loti canescunt. Insula est in lacu, prope antrum S. Patricij, in qua ægri mori non possunt nisi deferantur ad aliud litus.

## EXCURSIO

*in Asiam usq; ad Gangem.*

**I**N Asiam nos evocant famosissimæ & prærogativis eximijs honoratæ regiones ipsius. In ejus sinu & ex ipsius terra condidit DEUS primos homines, plantavit hortum voluptatis, operatus est, & consummavit grande opus Redemptionis nostræ. Ibi Palæstina, & in ea Hierusalem divino sanguine tincta, Dominico Sepulchro gloriosa, maximorum, quæ in ea gesta sunt, mysteriorum confecta. ibi Assyria primo orbis Impe-

rio inclÿta, ibi Armenia triumphantis Arcæ Nòc bajula, ibi Arabia magis pietate trium illorum Infantis DEL cultorum, quàm thure suo fragrans, ibi Chaldæa turri Babel & lingvarum confusione famosa, ibi Persia Sophorum regnum, vastum Magni Mogolis imperium, regnum Decan urbe Goâ & Xaveriano Sepulchro eximium, regna Bilnagar & Malabar elephantum patriæ, regnum Zeilanum Paradisus alter, Natolia, seu Asia minor, in qua Chalcedon, Ephesus, Smyrna, & olim Troja &c. quæ omnia, ac insuper Tartariæ Magnæ partem, cum parte Tartariæ minoris, quæ est intra Tanàem fluvium, Pontum Euxinum, & mare Caspium ( alia Tartariæ minoris pars cum Taurica Chersoneso pertinet ad Europam ) complectitur Asia cis Gangem, & fluvium Tartariæ magnæ Ochandum.

Ultra Gangem & Ochandum est Tartariæ magnæ pars potior, in qua regnum Cathayæ (cujus magnus Cham

Cham etiam Imperio Chinensi jam dominatur) insuper amplissima, populosissima, ordinatissima, & jam magna ex parte Christiana, China, aliaq; vasta regna Tunquin, Cochinchina, Pegu, Siam, Cambodia &c. Insulæ quoq; vastæ & florentissimæ, Japon, Philippinæ seu Lusoniæ, Celebes, Molucenses, Borneo, Java, Summana & peninsula Malaca quæ Chersonesus aurea dicitur.

Tot tantasq; terras, post diluvium in prima orbis terrarum divisione obtinuit Sem filius Nòè nam major, occupante Africam Chamo, Europam Japheto. In Americam an ex Asia, Africa vel America pervenerint homines: non constat. Multiplicati sunt autem in Asia tam copiose: ut post 300 à diluvio annos, teste Diodoro lib. 3. Ninus monarchiæ Assyriorum conditor contra Zoroastrem Bactrianorum regem eduxerit decies septies centena millia peditum, equitum verò millia ducenta, currus falcatos ad decem millia & sexcentos. Quibus

bus copijs non nimium inferiores oportuit fuisse Zoroastris: siquidem diu ancipiti Marte pugnatum est.

Ricciolus lib. 12. Geograph. satis probabiliter toti Asiæ tribuit hominû quingentos circiter milliones, Americæ ducentos, Africæ centum, totidemq; Europæ; & concludit: multitudinem hominum hoc tempore habitantium supra faciem terræ non excedere mille milliones. Utinam autem sic multiplicatis hominibus magnificata esset DEO lætitia; & non potius ob effrenem plerorumq; licentiam tangeretur dolore cordis intrinsecus! Hara enim ibi foetet impurissimi Mahometis, & in Terra Sancta heu! quanta abominatio desolationis! Idololatria quàm late fusa, quàm insana? Zeilanis albus quidam simius pro DEO erat: pridem extincti dens in pretiosissimo scrinio, saphiris & pyropis gravi, servabatur, religiosissimâ superstitione colebatur. Armis Lusitanorum occupatâ eâ insulâ à Constantino Prorege Indiæ, cessit victori cum dente scrinium illud anno



1560. Major hinc luctus apud omnes indigenas, quàm ex amissis thesauris omnibus & injecta servitute. Missi subinde ad Proregem legati, qui 300 aureorum millibus, imò si opus foret, millione auri redimerent dentem. Sed tam sincera & ab omni avaritia aliena erat Constantinè religio, ut in conspectu legatorum & totius aulæ dentem illum in mortarium miserit, jussitq; in tenuissimos conteri pulveres, hos vivis carbonibus insperatos consumi *Bartoli lib. 7. hist. Asiat.*

Religioni Christianæ in regno Magni Mogoris egregiè servivit simius alter, bestia ob admirandam sagacitatem ibidem famosissima. Selymus rex jussèrat Brachmanes suos, nomina præcipuorū 12. legislatorum, inter quos Moyse, Mahomet & Christus, in schedis distinctis conscribi; conscripta misit coram proceribus suis in urnam, innuens finio: ut ejus nomen eximeret, cujus religio esset verior & melior, Hic sine mora exemit nomen Christi, & omnibus spectandum exhibuit.

*Jussit*

Iussit iterum rex, secretis & soli aulæ  
notis characteribus eadem nomina  
conscribi, diligenter permixta immit-  
ti urnæ: sed simius iterum idem Sal-  
vatoris nostri eduxit nomen. Proce-  
rum quidam, cum tertio esset idem  
periculum faciendum, cæterorum no-  
mina immisit urnæ, Christi abscon-  
dit secretò. Simius jussus repetere  
delectum, diu versatis schedis, nullam  
educere voluit. Ad acriorem regis  
comminationem infremuit, arreptasq;  
schedas omnes dilaceravit: apprehen-  
sa proceris illius manu, Christi no-  
men eduxit exhibuitq;. Stupuit rex  
cum tota præsentium, ultra tria mil-  
lia aderant, corona, multumq; accessit  
æstimationi Nominis Christiani ex hoc  
non tam simii, quàm summi Numinis  
suffragio. Refert hoc *Thomas Rôé An-  
glus in descript. legationis suæ ad regem  
Magor* Meritò hic rex, seu Imperator  
dicitur Magnus Mogor, seu Mogol, tum  
ob amplitudinem imperij sui etiam Chi-  
nensi vastioris; tum ob potentiam &  
opulentiam, quæ ad 1500. milliones a-  
scen-

scendere fertur. Ex sola metropoli Agra educere potest ducenta millia armatorum. Refert genus suum ad magnum Tamerlanem: ditio ipsius à Persia ultra Indum & Gangem extenditur. Laboravit, strenuè in eo regno à Mahomete & idolis ad Christum adducendo, inter alios P. Hieronymus Xaverius S. J. sanguine proximè junctus Magno Indiarum Apostolo & Franc. Xaverio.

Persia, olim ab Hellesponto usq; ultra Indum porrecta; non longè angustioribus clauditur terminis à Turcis circumcisa, cum quibus de Babylone frequens concertatio. Patitur tamen non paucos Missionarios Catholicos. Paret Persis etiam regnum Ormusi, cujus metropolis, Ormusium, sita in insula Sinus Persici, quàmvis ita sit sterilis, ut nec urticam ferat, opulentissimum tamen emporium est. Æstu sulphureo ita torretur, ut homines noctu sub dio somnum capere cogantur loco lectorum in conchis ligneis seu lintribus extensi, & capite tenus aquæ immersi. Illud insuper singulare: quòd quo ma-

jor

jor est solis ardor, eò pluribus se operiant vestibus, & jucundiùs refrigerentur. *Bartoli lib. 5. hist. Asiat.* Expugnavit hanc urbem, regiù; Lusitano subjecit Magnus Albuquerqueius præter Goam, Malacam &c. sed eam anno 1622. regi Persarum vindicarunt Angli.

Hollandi quoq; ditionem Lusitanorum, adeoq; progressus felicissimos conversionis gentium, valdè arctârunt occupato regno Zeilano opulentissimo, Aurêâ Chersoneso, Malaccâ anno 1641 & anno 1663 Cananore, Couletto, Cranganore, Coccino &c. &c. An præterquam florentissimis hisce regionibus, etiam Paradiso terrestri adhuc gaudeat Asia: controvertunt Interpretes

Sacrarum Literarum.

FERIA VI.

CHRISTO PASSO

Sacra

MEDITATIO

*De Itineribus Christi in negotio  
salutis nostræ.*

I. **C**onsidera: Cùm in concilio  
Divi-

Divinarum Personarum quæ-  
retur; *Quem mittam; & quis i-  
bit nobis?* scilicet ad salvandum  
genus humanum: Unigenitus  
DEi sine mora, alacritate sum-  
mâ ad ærumnosissimam expedi-  
tionem se se obtulit, promptius  
multò quàm Haïas c. 6. *Ecce ego,  
mitte me.* Accepto assensu, exul-  
tavit ut gigas ad currendam vi-  
am asperrimam, cruentis vesti-  
giis signandam. Nobis iter est  
non è cælo in terram, sed è ter-  
ra in cælum: & quàm lentè fe-  
stinamus quàm sæpè respicimus,  
imò aliorum divertimus?

II. **C**onsidera: Itinera Christi  
Infantis, Pueri, Juvenis &  
viri maximè tempore prædicati-  
onis. Qua intentione suscepit il-  
la, quo fervore agebat, qua con-  
stantiâ consummabat! Comites  
indivi-

individui adhærebant illi Paupertas, ærurnæ, calumniæ, persecutiones gravissimæ. Nos quoque, & apparatu agimus iter?

III. **C**onsidera: Itinera Christi tempore Passionis. Quo fervore Spiritûs ante Pascha ascendit Hierosolymam, post Cœnam ultimam se contulit ad hortum, post orationem cruentam properavit obviam Judæ & Satellitibus! Quomodo raptatus est in urbem, & ad varia tribunalia; quomodo cruce onustus exivit in montem Calvariæ &c. Nos, dum alicubi quidpiam patiendum est, imitamur Christum an profugos discipulos?

IV. **C**onsidera: quis terminus fuerit viarum Christi? Mons latronum suppliciiis infamis. Quis lectulus pro ultima quie-

quiete? Crux. Quæ refectio las-  
so? Fel & acetum. Quæ conso-  
latio cœlitus? Derelictio summa.  
Quis nobis animus est, ad se-  
quendum hunc Viatorem. Ma-  
gister noster est, Dominus &  
DEus noster. Nostrâ causâ hoc  
iter suscepit & sic peragit. Quid  
nos ipsius causâ?

## AFFECTUS PII

erga Christum Passum.

**R**ecordare Jesu pie; quod sum  
causa tuæ Viæ; ne me perdas  
illa die.

*Quærens me sedisti lassus: rede-  
misti crucem passus: Tantis labor  
non sit casus.*

*Adoramus Te Christe, & bene-  
dicimus Tibi: quia per mortem  
crucis & acerbissimam Agoniam  
redemisti mundum.*

*O Crucifixe mi Amor, ne dese-*



ras me nunc, & in ultima mortis luctu,  
 Et a, à qua tota pendet aeternitas,

Domine Jesu Christe, Deus cordis mei, rogo te per illa quinq; Vulnera, quæ tibi nostri amor in cruce inflixit; famulis tuis subveni, quos pretioso Sanguine redemisti.  
 S. Xaverius.

Amor meus Crucifixus est. S.  
 Ignat: M.

Deus meus pendet in patibulo:  
 & ego voluptati operam dabo? S.  
 Bernard.

Non decet sub spinoso Capite  
 membrum esse delicatum.

Nolo, Domine, nolo vivere sine  
 vulnere: quia Te video vulneratum. S. Bonavent:

Totus mihi figatur in corde, qui  
 totus pro me fixus fuit in cruce.  
 S. Augustin.

Dilexisti me Domine, plus quàm  
 Te;

Te; quia mori voluisti pro me. Idem.

O bone JESU exaudi me: intra  
vulnera tua Sanctissima absconde  
me. S. Ignat.

O Amor, Amor, Amor! Quid a-  
liud Te Crucifixe JESU, quam A-  
morem appellem? S. Magd. de Paz-  
zis.

Qui passus pro nobis, JESU  
Christe, miserere nobis.

In fide vivo Filij DEI, qui dile-  
xit me, & tradidit semetipsum pro  
me. S. Paulus ad Gal. 2.

Non moriar sed vivam: & nar-  
rabo opera Domini.

Dilectus meus condidus & ru-  
bicundus.

Dilectus meus mihi laborem,  
contemptum, vulnera, sanguinem  
& mortem: Et ego illi fidem, de-  
votionem, honorem & amorem,  
vitam & mortem, & quid non?

## HYMNUS MATUTINUS

1. **A** Moris ô incendium  
Divine Rex amorum!

Omnis boni compendium

O Christe, Vir dolorum.

2. Ah! parce, quod deliquerim,  
Ignoscere jam dolenti!

Quod te cruci confixerim

Ah; parce pœnitenti.

3. Per ista sacra Vulnera,

Et sanguinem fluentem,

Rogo; meum cor vulnera,

Absolve pœnitentem.

4. Infige menti supplici

Clavum tui timoris.

Cor ure flammâ duplici

Doloris ac Amoris.

## HYMNUS VESPERTINUS

**J**ESU nostra Redemptio,

Amor & desiderium,

DEUS, Creator omnium,

Homo in fine temporum.

*Qua*

*Quæ te vicit clementia,  
Ut nostra ferret crimina,  
Crudelem mortem patiens,  
Ut nos à morte tolleres.*

*Ipsa te cogat pietas;  
Ut mala nostra superes  
Parcendo & voti compotes,  
Nos tuo vultu saties. Amen.*

## LECTIO SPIRITUALIS

Ex Thoma Kemp. lib. 2. de Imitat: Christi cap. 12.

*De Via Regia Sanctæ Crucis.*

**D**Urus multis videtur hic sermo: Abnega te metipsum, tolle Crucem tuam & sequere JESUM. Sed multò durius erit, audire illud extremum verbum: Discedite à me maledicti in ignem æternum. Qui enim modò libenter audiunt & sequuntur verbum crucis: tunc non timebunt ab auditione eternæ damnationis

nis. Hoc signum Crucis erit in cælo, cū Dominus ad iudicandum venerit. Tunc omnes Servi Crucis, qui se Crucifixo conformaverunt in vita, accedent ad Christum iudicem cum magna fiducia.

Quid igitur times tollere Crucem, per quam itur ad regnum? In cruce salus, in cruce infusio supernæ suavitatis, in cruce robur mentis, in cruce gaudium spiritûs, in cruce summa virtutis, in cruce perfectio sanctitatis. Non est salus animæ, nec spes æternæ vitæ nisi in cruce. Quia si commortuus fueris: etiam cum illo pariter vives. Et si socius fueris pœnæ; eris & gloriæ.

Ecce in Cruce totum constat, & in moriendo totum jacet: & non

non est alia via ad vitam & ad veram internam pacem, nisi via Sanctæ Crucis, & quotidianæ mortificationis. Ambula ubi vis, quære, quodcumq; volueris; & non invenies altiorem viam supra, nec securiorem viam infra, nisi viam S. Crucis. Dispone, & ordina omnia secundum tuum velle & videre: & non invenies, nisi semper aliquid pati debere, aut sponte, aut invitè: & ita crucem semper invenies. Aut enim in corpore dolorem senties; aut in anima Spiritûs tribulationem sustinebis.

### DIGRESSIO

*in Daniam, Sveciam, & Moschoviã*

**I**Nvitat nos Dania: ut ex Anglia, & Oceano Germanico, per fretû *Sundt*, liberi à vectigali ( quòd ibi omnes onerariæ solvunt ) in mare Balthicum il-

labamur, & exscensione facta, invifamus provincias ejus Jutiam, Zelandiam, Fioniam & Seaniam. Zelandia, infularum pulcherrima, tredecim hodie monftrat urbes, amplitudine fpectandas, elegantia decoras, & munitione robustas: atq; inter has Haffniam metropolim, æquè elegantem & munitam, ac opulentam. Jutia (aliàs *Norvegia & Cimbrica Chersonesus*) veterum Cimbrorum patria eft; qui maris exundatione pulfi fedibus fuis, Italiam inundârunt, eamq; primùm Romano fanguine largè tinxerunt; mox fuo. Ducenta enim, & ampliùs, eorum millia concidit C Marius, Romamq; ingeni trepidatione & periculo liberavit Maxima hic, mense Januario, eft captura falpæ: qui pifcis eft de genere afellorum; frigore duratur, non calente fole, & in varias regiones afportatur farmentis, feur affulis ligneis non melior, nifi fcitè paretur.

Equos alit Dania generofos & caftellos Melitæos admodum delicatos. Boum quinquaginta millia quotannis



in Germaniam mittit. In monte Alberg monumenta gigantum visuntur. Helcâ & Heclâ ignivomis montibus claret: Piscis Nahual ibi capitur, longus 40 ulnas, qui in fronte dentem, (an cornu) habet 7. cubitos prominentem, & venenis medentem.

Ut æmulam Daniæ Sveciam quoq; lustremus: ipsa suadet vicinia. Finno-marchia & Lappia regiones hominibus, frigore & rupibus admodum rigidæ, fere arcent hospites. Gothia humanior est & amœnior. Metropolis regni Stockholmia loco palustri, instar Venetiarum, fixis palis insidet: unde & nomen trahit. Upsallia, civitas Archiepiscopalis, gloriabatur olim & Præsulibus aureis, & templo magnificentissimo intus auro circumquaq; tecto. In lacu Mos serpens aliquando apparet longus cubitos 56. unde sinistri quidpiam augurantur. Litus maris Norvegiæ ambientis obnoxium est balænis: contra quarum furias utuntur nautæ castoreo pharmaco; quod ubi in mare projecerunt, monstra hinc omnia ad

imum recedunt. Gothi audito tonitru, olim jaculabantur in cælum, quasi Diis opitulaturi, quos credebant oppugnari.

E Svecia in Moschoviam expeditum est iter, vel per mare Glaciale ad portum Archangeli famosissimum tendendo; quo commercij causâ frequentes conveniunt Angli potissimum & Hollandi: vel terrestri itinere Livoniâ radendo, prope Narvam, munitionem non contemnendam. Provinciæ præcipuæ se offerunt Volodimiria, Rezanum, Novogrodia, Ducatus Smolenscensis (cujus metropolis insigni mœnium crassitie gloriatur) & Kijovienfis, ubi Græca Academia, & ingentes subterraneæ cryptæ, Monachorumq; copia. Inde amplissimam Sibiriam, Zobellarum vivarium & regna Cazan atq; Astracan invisere licebit, ac per Magni Ducis ditiones usq; ad confinia Tartaro-Sinensis Imperij excurrere:

# EXCURSIO

*in Terram Sanctam:*

**D**ies Parienti DEO sacer evocat nos in Palaſtinam, ad luſtranda & veneranda loca, in quibus operatus eſt ſalutem noſtram. Nobiliſſima hæc Syriæ regio eſt, aliàs Chanaanæ, ſeu Terræ Chanaan dicta, à Chanaan filio Cham, filij Nòè, DEI juffu & potentia ſubegit eam Jolve occiſis 31. regibus, diſiſq; 12. Tribubus filiorum Iſrael. Amplitudo ejus ſatis exigua, ſed prærogativæ ampliſſimæ. Longitudo, ab Aſſilonari civitate Dan, ad radices montis Libani ſita, meridiem verſus uſq; ad Eſſabæe civitatem, vix excedit miliaria 67. quæ ſingula unius horæ itinere conſici poliunt. Latitudo ab Occidente & mari magno, ſeu mediterraneo, in Orientem uſq; ad Jordanem fluvium, non excedit ſimilia milliaria 18 teſtibus Brocardo & Adrichomio. Ultra Germanica igitur & Polonica milliaria 30, non excurrit. Longitudo Terræ Sanctæ. Sed intra

terminorum tantas angustias infinitum continebat populum, arenæ, quæ est in litore maris, sæpius in Divinis Literis comparatum.

Idonei Authores apud Lanciciam Opusc. 20. n. 58. tempore David, solum Sacerdotum numerant ibi plura quàm centum viginti millia: Sacerdotum verò & reliquorum Levitarum plura quàm septies centena millia & 20 millia. Quod regnum Christianum, licet decuplo majus, totalit Christi Ministros? Et tamen queruntur polliciti: regna gravari multitudine Spiritualium, eorumq; nimias esse opes. Sacerdotum & Levitarum illorum longè fuisse majores, demonstrat idem Lancici. à n. 61 productis 20 speciebus variorum proventuum, jure Divino ipsis assignatorum. Non divitiæ Spiritualium, sed avaritia Sæcularium, luxus, fraudes & rapinæ exhauriunt, & exinaniant regna.

Elogium *Terræ lacte & melle manantis* sortita est Palestina ab ipso DEO, ob singularem cæli temperiem,  
aëris

àëris salubritatem, pecorum, avium, piscium, frumenti, vini, olei, sacchari, balsami, ficuum, malorum granatorum copiam, amœnissimorum camporum, montium, fluviorum, nemorum, urbium, castellorum, pagorum, hominum frequentiam, omnium deniq; rerum abundantiam: ut cum ipso Paradiso in certamen venire potuerit; siquidem, illi nec Lignum vitæ defuit, Crux nempe vivifica Salvatoris.

At sublimius est elogium *Terræ Sanctæ*, quo beatissima illa regio celebratur, eò, quòd non solum Patriarcharum fuerit colonia, Prophætaram domicilium & sanctissimorum regum patria: sed ipsum Caro factum DEum exceperit nascentem aluerit natum, cum hominibus conversantem portaverit; quòd sedenti solium, oranti scabellum, dormienti culcitra & cervical fuerit; quòd sola mysteriorum maximorum conscia, divinis & lachrymis & sudoribus, & sanguineis fontibus sanctificari meruerit; quòd

quem vivum velut ulnis portaverat, mortuum triduo visceribus suis gestaverit, & rursus vivum mundo restituerit, deniq; gloriosissimum Triumphatorem cœlo reddiderit, pro ipso Divinum Paracletum receperit, & Apostolorum prædicatione virtutibus, miraculisq; prima fuerit exculta & illustrata.

Tam nobilis, & ad invidiam usq; totius orbis terrarum honoratæ regionis, flos, gemma & corona fuit Hierosolyma: Civitas DEI electa, fundata in montibus sanctis, felicissima cœli soliq; bonitate, ædificiorum splendore admiranda, Domina gentium à rivulo Ægypti usq; ad fluvium magnum, seu Euphratem; deniq; divino oraculo *Urbs perfecti decoris*, *Gaudium universæ terræ* Thren. 2. Figura militantis & Triumphantis Ecclesiæ. Apoc. 21. Condita primum fertur à Melchisedech rege & Sacerdote, atque Hebraicè dicta *Salem* Græcè *Solyma*; quam deinde occupârunt Jebusæi, possederuntque annis

nīs 800. & amplius, donec à Davide rege & populo Israel expugnaretur. Arcem munitissimam & amplissimam in ea ædificavit rex David, Templum admirandum & opulentissimum Salomon, alij reges palatijs, turribus, ædificijs, quorum pleraquē ex candido marmore erant, ita exornarunt: ut inter totius orbis urbes miraculum esset, inquit Adrichomius, additq; in suo Theatro Terræ Sanctæ

Hoc ornatu & splendore floruit Hierosolyma annis 400 & ultra, habens circuitum quinquaginta stadiorum, & per gyrum urbis fossam in lapide excavatam, 60 pedum profunditate, latitudine verò 250. in qua commorabantur hominum circiter 150 millia. Per impietatem populi occupavit eam, & funditus everit Nabuchodonosor rex Babylonis ita, ut arx Sion quasi ager araretur, & Hierusalem unus lapidum acervus esset: mons in quo templum tuerat, abierit in sylvam & teste Hieronymo,



nec avis volaverit, nec bestia transferit per eam. Post 70. annorum desolationem, favente Cyro Persarum & Medorum rege, urbs restaurata est à Neemia, & postea à Machabæis & Herode magnificè exornata una cum Templo; floruitq; gloriosa, donec in vindictam Divini Sangvinis, à Tito Vespasiano everteretur funditus, cæsis undecies centenis Judæorum millibus. Tres solùm integræ relictæ sunt turres speciosissimæ ab Herode extractæ; ut monumentum essent perpetuum fortitudinis Romanorum, & impietatis Judæorū. Sed has ipsas post annos 65. rebellantibus Judæis domitis, diruit Ælius Adrianus Imp. jussitq; locum civitatis aspergi sale. Aliam tamen priori vicinam ædificavit civitatem, intra ejus mænia includendo montem Calvariæ & Sepulchrum Domini, quam *Aliam Capitolinam* vocari voluit. In fronte portæ, qua Bethlehem ibatur, suam in marmore sculpsit ad ignominiam Judæorum: quibus

quibus & edicto prohibuit: ne urbem illam amplius introirent, aut ex loco aliquo eminentiore aspicerent,

Devenit ea' postea in potestatem Christianorum & jam tempore Constantini M. Episcopum habebat Macarium, ad quem ejusdem Constantini literæ de extruenda Basilica magnificentissima in loco Sepulchri Dominici, extant apud Baronium anno 326 n. 31 ex Eusebio: sublatoquè *Æliæ Capitolinæ* nomine, *Hierosolyma* est dicta, atquè Patriarchali Sede honorata. Sed anno Christi 636 à Saracenis Ægyptiacis occupata, & possessa fuit: donec anno 1099 à Christianis, duce Godefrido de Bullion, recuperata fuit, feria 6 hora 9 qua Christus expiravit. Sed non diuturna fuit Christianis ea felicitas. Post 88 annos nova illa Jerusalem, à Saladino Ægypti Soldano deditione occupata est: anno autem Christi 1517. à Selimo Turcarum Imp. subacta est. Vocatur à Turcis *Cuzumobe-*

*mobarech* seu *Codsbarich* id est Urbs  
sacra.

*Veteris Hierosolymæ Loca cele-  
briora fuerunt.*

I. **M**ons Sion, alias Mons Do-  
mini, & mons Sanctus; qui  
cæteris omnibus montibus eminebat  
& Australem urbis tractum occupa-  
bat. In solida rupe fundatus, veri-  
cem habebat insigni plantis ar-  
borum, in quo David sibi Arcem, &  
Foribus, seu Heroibus suis civitatem  
ædificavit dictam *Civitas David*, mœ-  
nibus, turribus, & horribilibus præ-  
cipitijs mentulam, solaq; fame  
subigendam: sed à Tito Vespasiano  
sine ulla sanguinis effusione subacta  
est, Judæis consternatis diffugientibus.  
In hac Civitate David seu superio-  
re, erat Cenaculum illud magnum  
& stratum, in quo cum discipulis su-  
is Christus ultimam coenam sumpsit,  
Sacramentum V. Eucharistiæ institu-  
it, post Resurrectionem discipulis ap-  
paruit, & postea Spiritum S. misit.

Ibi-

Ibidem erat Domus Annæ & palatium Caiphæ Pontificum; Domus in qua DEIPARA V. post Christi mortem cum S. Joanne Evang. habitavit; Sepulchrum Davidis & aliorum regum Judæ; Tabernaculum Sion pellibus tectum, in quo Arca deposita fuit ante templum constructum; Torcularia regis ad exprimendum vinum regium &c.

II. **C**ivitas Inferior, quæ ingentitate David, dividebatur, in scripturis sacris passim appellata *Filia Sion*, occupabat medium totius urbis. Nam à meridie habebat Civitatem David, à septentrione Civitates Secundam & Novam, de quibus infrà. In ea Civitate videbatur 1. Mons Moria, in quo Abraham filium Isaac immolare jussus erat, 2. Templum Salomonis in eodem monte constructum, operâ 153 millium hominum, 3. Domus Saltus Libani cum amœnissimo nemore, viridarijs, fontibus, piscinis &c. à Salomone constructa, 4. Piscina

na probatica, in qua victimæ litandæ lavabantur, & ægri ad commotionem aquæ ab Angelo, sanabantur; pro quorum commoditate porticus habebat opportunas. 5. Palatium Salomonis sumptuosissimum: & prope illud Palatium reginæ, filię Pharaonis. 6. Palatium Machabæorum loco præcelso 7. Palatium, seu Prætorium Pilati, aliorumq; præsidum Romanorum, in loco ita eminente situm, ut 28 gradibus marmoreis ad illud ascenderetur: per quos cum Christus D. in Passione sua bis ascenderit, descenderitq;, & partem etiam aliquam Sangvine suo, post flagellationem & spineam coronationem tinxerit (quæ nunc cancellis est inclusa) Romam translati sunt, & prope Basilicam S Joannis Lateranensis constituti, magna piorum devotione flexis genibus ascenduntur, atq; *Scala Sancta* appellantur. Huic palatio contiguus est Xystus, seu ambulacrum lapideum præaltis columnis impositum per modum portis; per quod  
ad Ar-

ad Arcem Antoniam erat transitus è Prætorio. Ex hoc Xysto solebat Præses alloqui populum infrà collectum; & Pilatus monstravit JESUM dirissimè flagellatum, *Ecce homo* 8. Ars Antonia; quam ex palatio Hyrcani Machabæi in Arcem munitissimam vertit Herodes, & in gratiam Martij Antonij sibi amicissimi, Antoniam appellavit 9. Amphitheatrum amplissimum, capax 80 millium spectantium ab eodem Herode de Ascalonita, constructum. 10. Curia 70 Seniorum, seu Concilij Sanhedrim. &c.

III. **C**ivitas secunda, à latere Septentrionali Filiæ Sion posita, & ab eadem muro turrito sejuncta: quam potissimum commendabat magnificentissimum Palatium Herodis Ascalonitæ; in quo Christus præsentatus fuit Herodi Antipæ, tetrarchæ Galilææ, ab eo illusus.

VI. **C**ivitas Nova, dicta *Bezetha* Herb. adjacens Civitati Secundæ Septentrionem versus, muro & turribus ab eadem distincta. Hanc potissi-

potissimum incolebant Iudei venientes,  
res, fabi ætarii, alijq; artifices, et q;  
ibi vestium mercatus.

V. **V**la Crucis: quem scilicet Chri-  
stus morti adjudicatus à  
Pretorio Pilati, cruentis gressibus,  
utq; ad montem Calvarie confecit.  
Huic viatores Christianos vel maxi-  
mè intentos esse oportet. Describere-  
am Adrichomius sic: Incipiens Salva-  
tor à palatio Pilati, per 26 gressus  
qui faciunt 65 pedes ad locum pro-  
cessit, ubi crux ei imposita est. Inde  
processit versus Calvariam inter Se-  
ptemtrionem & Occidentem sitam,  
per 80 gressus, seu ducentos pedes,  
ubi primò cum Cruce cecidisse, tra-  
ditur. Ultra progressus per 60 gressus  
& tres pedes, seu 153 pedes; obviam  
habuit SS. Matrem suam cum S. Jo-  
anne Rursus per 71 gressus & ses-  
quipedem, sive 179 pedes procedens,  
pervenit ad trivium quoddam; ubi  
Simon Cirenæus coactus est cru-  
em portare post eum. Confecit  
inde 191, gressibus cum semipede, seu



478 pedibus, ab occurrente Veronica sudarium accepit. Postea per 336. gressus & duos pedes, seu 842 pedibus, attigit portam Judiciariam, in ipsius Urbis moenibus sitam, ubi rursum cum cruce lapsus fertur. Inde Saxosâ & paulatim ascendente viâ septentrionem versûs processit extra urbem per 348 gressus & duos pedes, seu 872, pedes, ad bivium quoddam, ubi mulieres plorantes allocutus est. Tandem per 161 gressus & sesquipedem seu 404 pedes, accessit ad radicem montis Calvariæ ubi ultimò cecidit. Mox per 18 gressus, seu 45 pedes, attigit locum in quo à lictoribus vestibus spoliatus, & vino myrrhato, felle mixto, potatus est. Dehinc post 12. gressus sive 30. pedes, clavis cruci affixus est. Denique per 14 gressus, seu 35. pedes, delatus est ad locum, ubi cruce in foramine rupis fixâ, sublatus est in altum JESUS, spectaculum inauditum futurus DEO, Angelis & hominibus A palatio itaque Pilati usq; ad locum crucis sunt gressus 1321, seu pedes,

pedes, 3303. Porrò in pede sexies continetur: sequens linea juxta Adrich.

VI. **E** Xtra Urbem celebriora loca fuerunt 1. Torrens & Vallis Cedron, quæ etiam *Vallis Josaphat*. inter Urbem & Montem Oliveti sita, 2. Fons *Siloe* ex radice montis Sion scaturiens collectus in piscinam seu *Natatoriam Siloe* 3. Hortus Regius in suburbanis, qui & Conclusus dicebatur 4. Mons Oliveri, seu Olivarum ad latus urbis Orientale ad cujus radices erat *villa Gethsemani*, ultra quam vicinus, sed paulò eminentior, *Hortus Oliveti*, 5. Bethania, castellum Lazari, paulò ultra montem Oliveti, 6. Ad latus urbis Septentrionale mons Calvariae, eiq; propinquum Sepulchrū Domini, qui est super omnia DEUS gloriosus in sæcula.

S A B B A T U M.

D E I P A R Æ V I R G I N I

Sacrū

M E D I T A T I O.

De va-

*De varijs DElparæ Virginis Itineribus.*

I. **C**onsidera: Iter Virginis par-  
tui proximæ, ex civitate  
Nazareth in Bethlehem, dolore  
pariter ac gaudio plenum, ob na-  
tum mundo Salvatorem, sed lo-  
co & tempore incommodissimo.  
Et nobis itinerantibus passim oc-  
currit varia dolendi atq; gau-  
dendi materia. Ferenda utraq;  
moderatè.

II. **C**onsidera: Quo animo DEi-  
para V. acceperit perse-  
cutionem Herodis, profecta sit  
in Ægyptum, & post annos ali-  
quot commorationis inter idolo-  
latras, redierit in patriam. Po-  
terant inde variæ cogitationes &  
affectus ascendere in corde ipsi-  
us: ac illa in omnibus suspicie-  
bat Sapientissimam Providenti-  
am

am Divinam, eiq; plenè acquiescebat: prout & nos decet.

III. **C**onsidera dolorem ejus in itinere Hierosolymitano de amisso Filio, solitudinem in eodem quærendo, gaudium de invento. Sic in humanis constanti vicissitudine alternant tristitia & læta. Maturè parandus utriq; animus. Summa curarum nostrarum sit: ne amittamus JESUM; amissum recipiamus quantoocyus.

IV. **C**onsidera comitantem sæpè, tempore prædicationis, Filium; variis una cum ipso à Judæis appetitam conviciis & persecutionibus; occurrentem Filio, bajulanti sibi crucem; ascendentem cum ipso montem Calvariæ, & morienti in cruce interlatrones (ô quale quantumq; obje-

objectum!) assistentem; tandem post emensum mortalitatis iter, tam arduum, gloriosissimè in cælum migrantem, atq; ad Filii dexteram confidentem. Si similem viæ vitæ nostræ optamus terminum: simili passu itinerandum. Tu, ô Gratosissima, iter paratum: ut videntes JESUM semper collætetur.

*AFFECTUS PII*

erga DEiparam Virginem.

**J**ESUS & MARIA *dulcissimi*  
*Amores mei. Patiar ego, mori-*  
*ar ego, amore vestri. Totus sim*  
*vester, nullus meus.*

*Dum vixero, Te diligam cum*  
*Filio MARIA.*

*O pulcherrima inter mulieres,*  
*omnes mei amores ardent Tibi.*

*Soli Parenti Virgini mei calent*  
*Amores. Hic nulla pars Cupidini:*

L

*faci*

*fœdi procul calores.*

*Una es Formosa mea, Amica  
mea, Columba mea.*

*Amo te, quæ tam formosa, mea  
Gemma, mea Rosa.*

*O Mater pulchræ dilectionis, for-  
ma, reforma amores meos.*

*O Clemens, o Pia, o dulcis Vir-  
go, MARIA!*

*Glorifico, veneror, Te Maxima  
& Optima Matrum.*

*Tu letitia Israël, Tu honorifi-  
centia populi DEi, Tu gaudium  
universa terræ,*

*Tu es illa Speciosa, qua nulla  
est pulchrior.*

*Tu es illa Victoriosa, qua nul-  
la est fortior.*

*Tu es Gratiosa, qua nulla est  
dulcior.*

*Exaltata es S. DEi Genitrix  
super choros Angelorum ad cele-  
stia regna.*

To.

*Tonate celi desuper; & date  
Virgini laudem.*

*Pulchra es, & amabilis nimis!  
Magna es, & laudabilis nimis!*

*Omni die dic MARIE, mea  
laudes anima.*

*Mater DEI, memento mei.*

*Monstra te esse Matrem. Mon-  
strate Matrem.*

*Ad te clamamus exules filij Eve.*

*Vitam presta puram; iter para-  
tutum: ut videntes JESUM, sem-  
per collatemur.*

### HYMNUS MATUTINUS

**Q**uem terra, pontus, sidera,  
Colunt, adorant, predicant,  
Trinam regentem machinam,  
Clastrum MARIE bajulat.

*Cui luna, sol, & omnia,  
Deserviunt per tempora,  
Perfusa celi gratia,  
Gestant Puella viscera.*



*Beata Mater munere,  
Cujus supernus Artifex,  
Mundum pugillo continens,  
Ventris sub arca clausus est.*

*Beata celi nuntio,  
Fœcunda S. Spiritu,  
Desideratus gentibus,  
Cujus per alvum fusus est.*

*JESU tibi sit gloria,  
Qui natus es de Virgine,  
Cum Patre & almo Spiritu,  
In sempiterna sæcula. Amen.*

## ALIUS.

**M***undi deliciae salвете,  
Virgo, & proles Virginis,  
Salvete millies, JESUS & MARIA.*

*Tu rubus ardens es, MARIA:  
Ureris & non combureris,  
Nam rubi flāma est Filius MARIE.*

*Tu Arca fœderis, MARIA:  
Corruptionis nescia,  
Sed Arca Manna, & Filius MARIE.*

*Tu radix Jesse es, MARIA:  
Virgo & Virga florida,  
Sed virgæ Flosculus Filius MARIAE.*

*Tu Thronus regius, MARIA:  
Divinae artis specimen,  
Sed Throni Salomon Filius MARIAE.*

*Tu Dei Templum es, MARIA  
Non ictus in Te resonat,  
Sed Templi Ara est, Filius MARIAE.*

*Tu mundi Oculus, MARIA:  
Luna & Sole clarior,  
Pupilla oculi Filius MARIAE.*

*Tu mundi calum es, MARIA:  
Quo bonum omne clauditur,  
Sed celi Gaudium Filius MARIAE.*

*Tu celi Janua, MARIA:  
Per Te in celum via est,  
Sed Clavis januae Filius MARIAE.*

*Tu mundi Corculum, MARIA:  
Amoris domicilium,  
Sed cordis Centrū est Filius MARIAE.*

*Cor meum valeas, MARIA:*

*Te Vita DEUS animat,*

*Tu JESU, Anima cordis mei, Vale.*

# HYMNUS VESPERTINUS

**A***ve maris Stella,*

*DEi Mater alma,*

*Atq; semper Virgo,*

*Felix celi Porta. &c.*

## ALIUS.

**M***ARIA celi gaudium, ter-*  
*rae delictum,*

*Te placet affari: sat nequis amari.*

*Tu pectore capto & animo raptto,*

*Me totum vendicas.*

*Os tuum merus Hortulus; sed*  
*in hoc hortulo.*

*Sunt due formosae, tua labia Rose;*

*Ex illis, per illas, sermonem distillas*

*Plùs quàm Rosaceum.*

*Si tua spectem lumina, sunt duo*  
*sidera:*

*Ex quibus amœna sub luce, serena,*

*Quot spicula jadis, tot vulnera facis*

*Vivit*

*Viri qui tangitur.**Tu omni flore pulchrior, excellis omnia:**Tibi lilia soli, conchyliis soli,  
Argentea, aurea, gemmea poli  
Cedunt & sidera.**MARIA meum gaudium, quod  
corde nutrio:**Incendium grave sed blandum & suave,  
Ab! Divi augete, excipiam late  
Diducto pectore.**Post DEUM, mihi omnium Vo-  
torum meta es:**Dum spero, dum spiro, MARIAM requiro  
Hæc speculo jacto & vulnere facto,  
Mihi rapit animam.***LECTIO SPIRITUALIS.****De Invocatione DEiparæ Vir-  
ginis.***Ex Homil: 2. S. Bernardi su-  
per Missus.***L**oquamur pauca & super hoc  
L4 Nomi-

Nomine (MARIA) quod interpretatum *Maris Stella* dicitur, & Matri Virgini valde convenienter aptatur. Ipsa namq; aptissime sideri comparatur. Quia sicut sine sui corruptione sidus suum emittit radium: sic abiq; sui læsione Virgo parturit Filium. Nec sideri radius suam minuit claritatem, nec Virgini Filius suam integritatem. Ipsa igitur nobis illa stella ex Jacob orta: cujus radius universum orbem illuminat; cujus splendor & præfulget in supernis, & inferos penetrat, terras etiam perlustrans, & calefaciens magis mentes, quàm corpora, fovet virtutes, excoquit vitia. Ipsa inquam, est præclara & eximia Stella, super hoc mare magnum & spatiosum necessario sublevata, micans meritis

tis, illustrans exemplis. O quis-  
quis te intelligis in hujus sæculi  
profluvio, magis inter procellas  
& tempestates fluctuare, quàm  
per terram ambulare: ne aver-  
tas oculos à fulgore hujus fide-  
ris, si non vis obrui procellis. Si  
insurgant venti tentationum, si  
incurras scopulos tribulationum:  
respice Stellam, voca MARIAM.  
Si iracundia, aut avaritia, aut  
carnis illecebra, naviculam con-  
cusserit mentis; respice ad MA-  
RIAM. Si criminum immani-  
tate turbatus, Conscientiæ fœ-  
ditate confusus, judicii horrore  
perterritus, barathro incipias ab-  
sorberi tristitiæ, desperationis a-  
byssò: cogita MARIAM; In pe-  
riculis, in angustiis, in rebus du-  
biis MARIAM cogita, MARI-  
AM invoca. Non recedat ab o-

re, non reeedat à corde, & ut impetres ejus orationis suffragium, non deferas conversationis exemplum. Ipsam sequens non devias; ipsam rogans, non desperas; ipsam cogitans non erras; ipsa tenente non corruis, ipsa protegente non metuis; ipsa duce non fatigaris; ipsa propitiâ pervenis: & sic in temetipso experiris; quàm meritò dictum sit: *Et Nomen Virginis*

*MARIA.*

## DIGRESSIO

*In Poloniam, Litvaniam,  
& Prussiam.*

**P**OLONIÆ regnum, & M. Ducatus Litvania, ut olim Sparta, non tam mœnium mole, urbiumq; munitione, quàm fortibus viris, splendoreq; Nobilitatis gloriantur; cujus summum, & vitâ charius, decus est *Aurea Libertas*, & affinis ipsi liberi oris facundia, qualem



lēm vel in medio Latio quæsieris. Nemo regum, in Europa tam latè imperat, ac Rex Poloniæ: nemo tam frequenti splendidoq; stipatur Senatu. Senatores regni, opibus potentes, numerat Starovolscius 147 quadruplici classe distinctos: scilicet in Episcopos Palatinos, Castellanos, & Officiales Majores; uti sunt Mareschalli, Cancellarii, Thesaurarii Regni, M. Ducatus L. & Curia.

Amplitudini ditionis detrahunt imperiti nonnulli, objectantes infrequentiam incolarum, & copiam sylvarum. Sed vel inde facile arguuntur erroris quòd ad Electoralia Comitia in Campum Martium prope Varsaviam confluant multò plura, quàm centum millia Solius Nobilitatis. Quamvis verò nonnulli tenuioris sint fortunæ: pleriq; numerosis gaudent subditis, plurimi millibus; non pauci justum exercitum è millibus suis scribere possunt. Adde subditos Spiritualium, Ecclesiasticorum, Religiosorum, sanè numerosos: adde incolas civitatum, Judæos,

Tartaros &c. Anno 1697. initio in  
M. Ducatu Litvaniæ censu, inventi  
sunt 257254. Foci eorum tantum qui  
ad Contributiones publicas tenentur.  
Ubi Ecclesiastici, ubi Nobilitas, Mili-  
tes, & famulorum agmina &c.? Deinde  
ad unum Focum, quot spectant capi-  
ta? Olim Magno Duci Litvaniæ non  
erat operosum, trecenta & amplius ho-  
minum millia in aciem educere: quæ  
potissimum suppeditabat Vilna me-  
tropolis.

Alter non levior error est Geogra-  
phorum, qui nescio quem antiquorum  
seculi, eadem nunc facie repræsentant  
Poloniam Litvaniamq; , qua olim squal-  
lebant: cum interea, allaborante cul-  
tione tempore, longè alium induerint  
cultum, præsertim ante ruinas, in quas  
à Moscho & Sveco nuper sunt conje-  
ctæ; è quibus sensim, nec rarò cul-  
tiores, emergunt. Non desunt sua de-  
cora Cracoviæ, non ex jam lignea Vil-  
na; habet quibus superbiat, magnifica  
palatia regum sedes Varsavia: quin to-  
ta regio passim aulis nobilium, ceu  
cam-

campus amœnus vernantibus flosculis, est distincta. Quod scribitur: Litvaniam adiri non posse nisi hyemali tempore vel ignorantia est, vel impudens maledicentia. Quamvis enim non desint loca quædam palustria; quanta hæc pars Litvaniæ? Commeamus ultro citroq; quovis anni tempore: nec auditur de funeribus demersorum viatorum.

Sed missis hisce imperitorum ineptijs, lustremus cursim memorabilia Poloniæ: Salisfodinas Bochnenses & Veliscenses, ubi marmorum loco columnæ salis eruuntur; fodinas nistri apud Visliciam, cupri & carbonum apud Tencinum; chalybis apud Podolentiam; ferri apud Olstiniam & alibi; plumbi & argenti (imò & aurum) in Palatinatu Cracoviensi & Sandomiriensi; marmorum omnis generis colorum apud Seleciam. Invisamus Cracoviæ Basilicam D. Stanislai Ep. M. ubi se offerent duo ex solido argento altaria, alterum à Sigismundo I. Rege, alterum ab Anna regina constructum. Observemus: ut

in eadem Ecclesia nunquam est silentium, sed semper alternantibus choris, diu noctuq; resonant DEI laudes; & inter centum quotidiana sacrificia, octo sint cantata; inter mille & 18. templa Diocesis Cracoviensis, novem sint Collegiata. Ipsos miremur harum regionum agros eâ frumenti copiâ abundantes; ut fere tantum varijs emporijs importetur, quantum alendæ Europæ sufficit.

Cætera prætereuntes tandem in *Prussiam* nos recipiamus: regionem scilicet, quam Natura & Ars singulari studio excoluisse videntur; ut jam certent fecunditas agrorum atq; lacuum plurimorum, cum frequentia & elegantia civitatum; volucres cæli cum piscibus maris, industria hominum cum naturæ sagacitate, Prussia Brandenburgica cum Polonia, Portus opportunissimi cum navium copia, Regiomontum cum Gedano, Elbinga cum Thorunio: ubi ejectis ex ædibus sacris Sanctorum lipsanis, in heterodoxo Gymnasio civitatis religiose

giosè asservantur duæ Ciceronis Epistolæ in tabulis cereis scriptæ. At majori admirationi est: quòd Varmiensis Episcopatus, Episcopo S. Rom. Imp. Principe inclytus, in medio Catholicorum, vigeat incorruptus.

## EXCURSIO

*In Asiam ultra Gangem.*

**I**ndia dividi solet in eam, quæ est cis Gangem, & quæ est extra Gangem. Illam lustravimus Feriâ quintâ; hæc multis sæculis Europæ fere ignota, nunc spectanda venit. Ipse utriusq; discriminator Ganges spectatorem meretur, fluminum Asiæ totius non solum maximus, sed & opulentissimus, utpote aurifer & gemmifer. Multi veterum Patrum censuerunt, esse unum è 4. Paradisi fluminibus, in sacris Literis *Phison* dictum. Minima ejus latitudo est duorum, maxima quinq; milliarium Germanicorum. Oritur è montibus Tartariæ magnæ, & per Imperium magni Mogolis quod *Indostan* dicitur, illabitur in vastum

Oceanum

Oceanī Orientalis Sinum, quī ab eo Gangeticus dicitur. Debet id orbis Europæus inclytæ Lusitanorum nationi; quod postremis hīscē sæculis ipsi innotuerunt etiam extrema Indiæ ultra Gangem, imò ipsa à tota continente avulsa Japonia.

Celebriora ultra Gangem regna sunt Bengala, Pegu, Siam, Camboia, Tunquin, Cocincin, Chersonesus Malacensis, deinde Imperium Chinense.

Bengala paret nunc Magno Mogoli: incolas habet omnibus vitij scatentes, sed quæ putant omnia elui, si in flumine Gange, cujus originem è Paradiso ducunt, se lavent. Non admittuntur autem ad hoc lavacrum, nisi prius certo pretio regi persoluto.

Regnum Pegu vastum est & opulentum: ingens ibi elephantum copia, qui fame cicurantur. Incolæ colunt duos Deos, bonum & malum: Christiani quoq; nonnulli reperiuntur.

Siam regnum ad 300. milliaria extenditur in longum ad 160. in latum; nego-

negotiatione cum Chinenſibus & alijs populis dives. Ante paucos annos, operâ Miſſionariorum è Societate JESU tam feliciter res Chriſtiana ibidem proceſſerat: ut rex non ſolum baptiſmum ſuſceperit, ſed etiam per legatos ſuos pontifici Maximo Alexandro VIII obedientiam filialem detulerit. Sed breve id Eccleſiæ gaudium fuit. Deſuncto enim rege, ſucceſſor ejusdem Gallos omnes qui fidem & negotiationem ſuam ibi promovebant toto regno faceſſere juſſit. Elephantes bis mille alere dicitur, ad prælia doctos.

Malacenſis Cherſoneſus, Aurea dicta, finitima eſt Siamenſibus. Metropolis ejus Malacca à Luſitanis expugnata anno 1511. ſed his adempta ab Hollandis anno 1641. Multa magnaq; miracula ibi operatus eſt Indiæ Apoſtolus S. Franciſcus Xavierius: ſexcentra intra paucos menſes numeravit Epifcopi Vicarius. Etiam deſunctus non deſijt eſſe beneficus. Nam corpus ejus Malacam delatum eſt San-



è Sanciano insula, sævissimam pestem illico extinxit, ac veluti tot mortuos suscitavit, quot vivos servavit. Aureæ nomen obtinuit ea Peninsula, tum ab auri fodinis, quibus abundat, tum à perpetuo vere, & negotiatorum ex tota Asia concursu.

Camboyæ regnum, Siamonfi conterminum, incolas habet minus male, quàm alibi moratos, Mahometis sectæ addictos. Homicidia, furta, adulteria ibi nulla; plebei unâ contenti sunt uxore.

Tunquinum & Cocincina provinciæ fuerunt Imperij Chinenfis: sed jam excusso jugo regna sunt, cum ea tamen conditione; ut quovis triennio congruis muneribus Imperatorem colant Sinensem. In Cocincinam illatum semen Evangelij 1614. insignes fructus tulit; quos etiam persecutionis bruma acrior non decoxit. Anno 1663 & seqq. non pauci sanguine proprio purpurati cæcæ sunt ingressi. In regno Tunquin insonuit tuba Evangelij primum anno 1626.

tan-

tantumq; valuit in animis indigenarum: ut ad annum 1639 fere centum millia ad Christum transierint, eiq; mirâ constantiâ adhæserint, sæpiùs proscriptis Evangelij prædicatoribus. Singularis est in hac gente propensio ad pietatem, aliasq; virtutes, præsertim Castimoniæ studium.

China, seu Imperium Sinense, grande quoddam compendium est totius Asiæ, & fere orbis terrarum, præsertim hac ætate, qua Tartariam quoq; Magnam complectitur, & jam magna ex parte Christianum est. China ipsa ultro 600. milliaria Germ: à regno Siam & Tunquin protenditur usq; ad Oceanum: latitudine fere pari. Separat illam à Tartaria portentosus murus totidem milliarium, 60. pedes altus, 15. latus; qui per montes, vales, prærupta, & vasta flumina ab Oriente in Occidentem æquabili tractu excurrit. Centena millia præsidiorum assistebant perpetuo eidem muro, ad arcendos Tartaros. Nihilominus hi, non violentâ invasione, sed ultro-

ultroneâ invitatione ad compescendos rebelles quosdam, occuparunt imperium Sinense circa annum 1640. Domitis enim rebellibus, laboris sui non aliud admiserunt præmium, quàm ipsum imperium, quod etiamnum possident. Unde potentissimus in orbe terrarum princeps nunc est Imperator Sinensis, cùm etiam Tartariæ Magnæ in qua inter alia Catayæ regnum amplissimum, dominetur. Rei Christianæ commodior est Tartarorû gubernatio & jam modernus Imperator edicto publico, quod per annos 100. impetrari non poterat, copiam fecit per totum regnum prædicandi & suscipiendi Evangelium, admissis etiam Episcopis duobus, quorum unus in regia Pekinensi, alter in Nanchinensi residet. Fidelium centena millia numerantur, Populi autem in Sinis tanta est frequentia, ut perpetuæ nundinæ videantur; tanta urbium, civitatum, castellorum &c. copia, ut totum regnum urbis unius frequentissimæ, pulcherrimæ, ordinatissi-

natissimæ, & cultissimæ, speciem præferat, & jure ipsi applicetur quod de Roma olim cecinit Propertius,

*Omnia Sinenſi cedant miracula terræ:*

*Natura hîc poſuit, quidquid ubiq; fuit.*

Asiam deniq; commendant plurimæ, amplissimæ & feracissimæ auri, & argenti, gemmarum, aromatum &c. Insulæ. Præcipuæ sunt *Ceyla* deliciæ Orientis, ubi perpetuò florent, simulq; fructus maturos gestant arbores *Summatra* in qua elephantes procerissimi; *Borneo* vastissima, abundans thure, mastiche, camphora, auri & adamantum fodinis; *Lava* major & minor cum insulis Molucensibus, aromatum, præsertim piperis & caryophyllorum feracissimis. *Celebes* *macassar*, *Manara*, margaritarum piscatu celebris, *Amkoinum*, *Banda*, *Maldivæ* & *Philippinæ* insulæ: quarum postremas occuparunt Hispani anno 1546 & à Philippo II. rege Hisp. denominarunt. Sedes Proregis est Manila urbs: Sinis vicinæ & subiectæ sunt insulæ majores *Hainan* & *Iermosa*  
mi-

minores *Sancianum*, morte & sepulchro Indiarum Apostoli S. Franci-  
Xaverij, celebrata, & *Macaum* seu  
*Amacaum* insigni Lusitanorum em-  
porio, è quo velut arce ptodeunt in  
Sinus Operarij Evangelici, famosissi-  
ma Austrum versùs jacet *Nova Gvi-  
nea* & *Nova Hollandia*: sed nondum  
constat; an sicut Insulæ vel Peninsula

Insularum autem omnium in tra-  
ctu Oceani Chinenfis, *Japonia* nobilis-  
sima est. Italiam aliquantò amplitu-  
dine excedit; à Lusitanis circa an-  
num 1539 vel 1542 detecta, dividitur  
in regna, seu potius provincias & ter-  
ritoria 68. quorum domini, princi-  
pes & reges unum venerantur Impe-  
ratorem, cujus sedes urbs Meacum  
est. Ingenio vivaci & acuto sunt Ja-  
pones, moribus culti, at armorum stu-  
diosissimi. Xacam & Amidam vene-  
rantur Deos, quorum ministri Bonzj  
dicuntur, quorumq; potissima prædi-  
catio in fanis & scholis est: *Omnia  
sub celo esse Nihil*, Primus Evangelij  
Christi præco in Japonia insonuit S.

Fran.

Franciscus Xaverius anno 1549 instituitq; Ecclesiam zelosissimis Confessoribus & fortissimis Martyribus inclutam. Non est alia regio in toto Oriente & Occidente novi Orbis, in qua Christi fideles tam graves diuturnasq; persecutiones pari fortitudine & constantiâ tolerârunt; tolerantq; in hanc usq; diem, ab anno 1587 inauditorum præteritis sæculis tormentorum victores. Ultra Japoniam Septentrionem versus, jacet regnum *Iesso* seu *Iedzo*, ferocissimis populis habitatum: quod an insula sit, vel peninsula Americæ Septentrionali annexa, nondum constat.

## ELENCHIUS ITINERUM ad Loca præcipua Orbis terrarū.

**P** Rænotandum circa Milliaria, quibus distingui solent viæ: illa admodum varia esse non tantum in varijs regionibus; sed etiam in una eademq; secundum varias ejus provincias, vel territoria: prout distinctè repræsentat Ricciolus lib. 2. *Geograph.*

graph. cap. 8. v. g, Italicum Milli-  
re aliud est Romanum, aliud Bono-  
niense; aliud Ravennaticum, Anto-  
nitanum &c. Vetus Romanum mil-  
liare constabat passibus mille; unde  
etiam denominationem accepit. Pas-  
sus autem Romanus constabat pedi-  
bus 5; Modernū autē Milliare Romanū  
continet solūm Passus Rom. antiquos

984. Bononiense 1266 - Ravennaticū verò 3833

juxta computum Riccioli cit. Cæte-  
rūm quando simpliciter ponitur Mil-  
liare Italicum sine addito Romanum  
vel Bononiense, &c. intelligitur pas-  
sim Bononiense, quod correspondet  
quartæ parti Milliaris Polonici, Pru-  
tenici, & Germanici communis.

Milliare quo Galli vias suas meti-  
untur, dicitur Leuca, constatq; circa  
Parisios, Rhemosq; in Normandia,  
Britannia superiore, & apud Andes  
duobus milliariibus Italicis cum di-  
midio: At in Britannia inferiore, Bur-  
gundia, Lotharingia, Arvernia supe-  
riore



riore apud Bituricenses & Lugdunen-  
ses miliaribus 3. Italicis: quibus con-  
stare etiam Leucam Lusitanam & His-  
panicam tradit ex pluribus Ricciolus  
cit. Vulgo dicitur Leuca Hispanica  
& Gallica esse Iter unius Horæ im-  
pigri Viatoris pedestris.

Germanicum commune Milliare  
(qualia 15. continentur in uno Gra-  
du Circuli maximi) similiter Pruthe-  
num, Litvanum & Polonicum (non  
multum enim hæc differunt) æqui-  
valet 4 Italicis communibus, 5. Ro-  
manis. His prænotatis.

In Italia itur Romam v. g. Tri-  
dento per Veronam, Mantuam (aut  
Mirandulam) deinde Bononiam, I-  
molam, Faventiam, Forum Livi. Ca-  
jenam, Vrbinum, Pontem Centesimum  
& Civitatem Castellanam. Quod iter  
Bononiâ Romam usq; continet Mill.  
Italica 243 juxta recentius Itinerari-  
um Bononiense. Si devotionis causâ  
Loretanam S. Ædem invisere place-  
at: Bononiâ itur Cæsenam ut sup de-  
inde Ariminum, Pisaurum Fanum,  
M Sinj

Sinigalliam, Loretum. Huc Bononiâ numerantur 152. mill. Ital. Laureto Romam 131 per Maceratam, Spole- tum, Narniam, & civitatem Castel- lanam. Brevius sed magis impeditû iter est per Tusciam & Florentiam, numeranturq; Bononiâ Romam mill. 194 tantum; postæ verò 21. Româ Neapolim sunt 122. Messanam in Si- cilia 231, Rursus Bononiâ Lucam 63. Mediolanum 130 Mediolano Genu- am 84. Bononiam verò Veronâ 98. Bononiâ Venetias III mill.

In Germania itur Viennam Au- striæ v. g. ex Polonia & Silesia, per Vratislaviam, Nissam, Olomucium, Brunam. Numerat autem Martinus Zeidlerus in Itinerario Germ. ac Po- lon. Uratislaviâ Olomucium. 32. mill. Germ. inde Viennam 20. Uratislaviâ Pragam 26. inde Viennam 37. Vien- nâ Græcium in Styria 23. inde Go- ritium 37; hinc Venetias 24. Viennâ Villacum 25. Posonium in Hungaria 10. inde Cassoviam 48. hinc Varadi- num 20. hinc Clausenburgum 14. hinc

Albam Juliam 7. Viennâ Strigoni-  
um 24. hinc Budam 9. Augu-  
stâ Vindelic. Ingolstadium 9.  
hinc Ambergam 12. hinc Egram 11.  
hinc Francofurtum ad Oderam 46.  
Pragâ Norimbergam per Pilsam 30.  
Norimbergâ Ratisbonam 16, hinc Mo-  
nachium 16. Augustam Vindel. 17.  
hinc Oenipontem 20. hinc Tridentū  
18. Coloniâ Antverpiam 29. hinc Le-  
odium per Namurum 15 Antverpiâ  
Augustam Vindel. per Bruxellas 101.  
Pragâ Dresdam 17. Lipsiam, 26 Lint-  
zium 24 Salisburgum 13.

In Gallia, juxta Itinerarium Ultra-  
jecti editum 1654, Parisijs Rotoma-  
gum Leucæ Gallicæ 19. hinc ad Por-  
tum Gratia 17. Parisijs Sueffionem 19  
Rhemos 34 Metas 71 Nivernium 48,  
hinc Lugdunum 39. Parisijs Aurelia-  
num 33 Carnutum 18 Alenconium 52  
Burdegalâ Mediolanum Santonum 22  
Aginum 20. hinc Tholosam 19 hinc  
Narbonem 22 hinc Montem Pessu-  
lanum 16. hinc Avenionem 15. Mas-  
siliam 23 hinc Forum Iulij 23. hinc  
M 2 Niceam

Niceam 10 Avenione Lugdunum 44  
hinc Taurinum 57 Genevam 23 Di-  
vionem 38 Basileam 38.

In Hispaniam, juxta Itinerarium  
Ultrajecti 1630 editum, Narbonâ Bar-  
cinonem per Perpinianum & Gerun-  
dam, Leucæ Hispan. 51 hinc Derto-  
sam 22. hinc Valentiam 21. hinc Ca-  
ravacam 30. hinc Acci 19 hinc Gra-  
natam 11. hinc Cordubam 21. hinc Hi-  
spalim 21 hinc S. Lucar. 14 hinc Ga-  
des 12. Hispali Vlyssiponem 62. hinc  
Salmanticam 88 hinc Vallisoletum 48.  
hinc per Segoviam Toletum 55 hinc  
Sarguntiam 38. inde Cæsaraugustam  
30. Toletum Madritum 11. Alicantem  
62. Cordubam 41. hinc Hispalim 22.  
hinc Malacam 26 & inde tandem  
Gades 27.

Ex Itinerario Hierosolymitano a-  
pud Ricciol cit. c. 14. Constantinopoli  
Nicomediam mill. Italica 62 hinc  
Ancyram Galatiæ 258. hinc Tharsum  
Ciliciæ 343, hinc Antiochiam 141.  
hinc Tyrum 174. hinc Cæsaream Pa-  
lestinae 73 inde Hierosolymam 116.

Ex Lusitania in Indias Orientales navigando Vlyssipone Goam, confici milliaria Italica 15000. etiam quando rectiore itinere navigatur, tradit Daniel Bartolus Tom. 1. Asiae. Goâ Malaccam 2100. leucas, ( quarum singulae constant tribus milliariibus Italicis ) numerat Turfellinus. Malaccâ in Moluccas 1100. Goâ in Japoniâ fere 6000. Exitinere Legatorû Iaponicorû ad Gregoriû XIII. Pont. Max. colligo, inquit Ricciol9 cit. lib. Macaû ( quot est emporiû Lusitanorû prope Sina ) à Malacca distare 1500 milliariibus ( Italicis ) à Iaponia verò per Malaccâ & Goâ Româ usq; censita fuisse milliaria circiter 21000.

Iter ex Hispania in Indias Occidentales seu Americam: ac imprimis in Hispaniolam, juxta Gonzal. Fernandum Ovetanum est dierum 35. aut 40. reditus circiter 50. ob ventorum importunitatem. A portu Hispalensi ad Hispaniolam numeravit Columbus leucas Hispan. 1200. Rupellâ in Canadam seu Novam Franciam Iosephus Bressanus

ponit leucas 900.

IN POLONIA Varſaviâ Cracoviam  
36. Lublinum 22. hinc Leopolim 30.  
hinc Camenecum 32. Varſaviâ Sen-  
domiriam 26. Gneznam 30. Califfium  
32 Poſnaniâ 40 Plociam 20. Pulto-  
viam 7. Ravam. 18. Czeſtochoviam 35.

IN LITVANIA & PRUSSIA vide  
in Schemate A.

Advertendum verò Computū mil-  
liarium ſupra numeratorum non eſſe  
initum juxta Mappas Geographicas,  
quæ paſſim tum inter ſe tum à viatorū  
ſenſu diſſident; ſed juxta peritorū rela-  
tionem & experientiam. Hī autem cū  
paſſim non ſint minus ſcrupuloſi in de-  
finiendo milliariū numero: ſubintelli-  
gendum communiter, Tot circiter eſſe  
milliaria; ſeu plus minus; ad eum modū  
quo Theologi volunt numerū peccato-  
rū graviorū exprimi in Confefſione Sa-  
cramentali.

# COROLLARIUM I.

Proponuntur Resolutiones  
Casuum quorundam circa  
Itinerantes.

## I.

**A**N Itinerantes teneantur Legibus proprijs suæ Diœcesis, seu Territorij?  
Resp. Loquendo per se non tenentur, dum actu extra versantur. *Suarez lib. 3. de leg. c. 32. cum Panorm: Navarro &c comm.* Quia potestas Legislatoris particularis non extendit se ad terras ipsi non subjectas. *Theologi & Canoniste comm ex cap. Ut animarum de Constit: in 6. ibi.* Extra territorium jus dicenti non paretur impunè.

Dixi: Loquendo per se. Nam si quis iter suscipiat extra territorium, vel diœcesim suam, eò tantum fine: ut evitet legem v. g. jejuniij in suo territorio servandi; non evadit liber ab obligatione talis legis. *Vasq. Salas, Rebell. &c.* Sumitur ex cap. Sedes & cap. Ex tenore de rescript: ubi dicitur: Dolum nemini patrocinari debere, Refert



quoq; Card de Lugo *l.b. 1. Respons. Moral* authenticum Breve Urbani VIII quod non sit legitimum matrimonium, quando sponsi extra suum domicilium aliò commigrant, eo solùm animo, ut ibi ( ubi Tridentinum Conc: receptum non est ) contrahere possint sine assistentia Parochi & testimonium requisitorum.

Ut quis licitè & impunè agat contra Statutum proprii territorij vel Diocesis necesse est, ut & ipse qui operatur contra legem seu statutum, & actio ejus, & res circa quam operatur vel cui aliquid per statutum debetur, sint extra territorium statuentis. *Barbosa in cap. A nobis il. primo de sent Excomm: Svar de leg: c. 32. n. 8. & comm: Jurisp: & Theol.* Hinc si quis existens extra territorium suum, delinquat tamen in ipso v. g. Sagittâ emissâ occidendo hominem; tenetur lege & pœnis proprijs sui territorij. Et contra si quis existens in proprio territorio, missâ sagittâ occidat hominē existentem extra suum territorium

rium adhuc tenetur lege & pænis sui territorij. Idem est, si quis alibi existens omittat actionem, quam in suo territorio exercere deberet.

## II.

*An Itinerantes obligentur Statutis particularibus locorum, ad quæ veniunt!*

**I**tinerantes quàm primùm in aliquo loco figunt domicilium, statim tenentur legibus & consuetudinibus talis loci. *L. 29. C. Ad municipalem & cap. fin. de foro compet. & comm. DD.* Ut autem quis censeatur alicubi fixisse domicilium, non requiritur habitatio per decennium, aut alia diuturna in tali loco: Sed sufficit, quòd eum inhabitare incœperit cum animo perpetuò ibi degendi *Fagnan. in c. significavit; de Parochis n. 44. cum Hostien. Abb. Joan. Andr & c. alijs comm.* Sumiturq; *l. 27. §. Celsus C. ad municipalem.* In foro externo civili post decennium transactum in loco, præsumitur animus perpetuò ibi manendi,

nisi manifesta in oppositum argumēta præsumptionem elidant. Quoad leges & consuetudines Ecclesiasticas omninò absolum est & repugnans communi sensui atq; praxi: ut diu commorantes in aliqua Diœcesi vel civitate, non teneantur illis, cum contrahant ibi quasi domicilium. Tenentur itaq; legibus & consuetudinibus talis loci, Advenæ, volentes ibi commorari notabili parte anni: & quidem tenentur statim à prima die accessûs; cum ut notat Cardinalis, statim fiant Parochiani ratione talis voluntatis. Et ita tenet Sanch. *lib. 3. de Matr. disp. 18 cum Paludano, Rosella, Sylvest.*

Tam Peregrini, quàm Vagi tenentur legibus & consuetudinibus Contractuum, vigentibus in loco per quem transeunt, & in quo contrahunt *Ita comm. DD.* Item legibus, latis principaliter & directè in bonum proprium illius loci. *Bartol l. 1. n. 21 C. de summa Trin. Baldus ibidem Abb Sanch. &c* Item illis legibus, quæ similes sunt extantibus in proprio domicilio. *Paiaus disp.*

*disp. 1. de leg. pun. 24 § 3. cum Suar. Salas, Bonac: Sanch. l. 3. de Matr disp. 18. n. 3. Item illis legibus loci per quem transeunt, quæ sunt juris communis, etiamsi in loco domicilij ipsorum vigorem non habeant, propter inductam consuetudinem contrariam. Palao alijq. citati proxime. Item legibus Poenalis, si ibi delinquant: cap. Postulasti de foro comp.*

Ad alias à prædictis diversas leges & consuetudines proprias locorum, per quæ transeunt, probabilius est, Peregrinos forenses, similesq; Viatores, non teneri per se: Sed ad summum per accidens, ratione scandali vel alterius incommodi emergentis. *Proposit. Archidiacon. Hostien: Geminian. Turrecrem. cum Glos. in cap. Quæ contra dist. 8. Ex Theologis Paludan. Sylvest. Tolet. Azor. Thom: Sanch. cit. Joan: Sanchez disp. 54. Select. innumeros alios referens. De Vagis oppositum probabilius sentiunt. Sanch. Azor, Salas, Bonac. Suar. & alij: cum alias nullius absolute loci propriis tenerentur legibus,*

gibus, utpote qui nullibi domicilium habent.

### III.

*De Itinerantibus quoad Jejunium.*

**A**lexander VII. inter Propositiones à se prohibitas posuit hanc n. 31. *Excusantur absolute à præcepto jejuniij omnes illi, qui iter agunt equitando; utcunq; iter agant, etiamsi iter necessarium non sit, & etiamsi iter unius diei conficiant.*

Bene tamen, & communiter excusantur à Jejunio, qui pedibus iter faciunt longius: v. g. leucarum sex (leuca sumitur pro itinere unius horæ impigri Viatoris) ut complures docent apud Rodriq. tom. 2. qq. Reg. q. 100. a 3. seu per magnam dici partem, ut ait Bus. l. 3. tr. 6. dub. 2. n. 3. cum Sanch. & Filliuc. Iter pedestre 4 leucarum in Belgio excusare, testatur Archdekin P. 3. tr. 5. c. 3. Potest tamen esse itinerantis debilitas, vel itineris asperitas, vel quid simile, ut etiam ex breviori spatio excusetur, ad arbitrium viri prudentis: ut rectè notat Bassæus v. Jejunij.

junium n. 7. Equites, vel curru iter agentes, non excusantur à Jejunio, nisi pluribus diebus sic iter faciant: vel nisi specialis debilitas interveniat: *D.D. comm.*

## IV.

*De Itinerantibus quoad Jubileum.*

1. **I**N Bulla Jubilæi Romani pro Anno Sancto solent Pontifices concedere: ut, qui legitimâ causâ impediti, non possunt perficere iter Romanum, quod aggressi sunt, potiantur nihilominus Jubileo. Porro per causam legitimam non solum intelligitur Impotentia physica, sed etiam Moralis ex difficultate vel damno valde gravi. Gobat Tract: de Jubil. c. 4. n. 20. & seqq. extenditq; hanc resolutionem ad omnes Jubilei favores in Bulla concessos. Benzonius lib. 3. c. 11. addit: Gratiam Jubilei solere extendi etiam ad illos, qui post præparationem ad iter Rom. legitimè impediuntur ad illud effectivè aggrediendum. Intellige præparationem non remotam tantum.
2. Dum Jubileus conceditur alicui Pro-

vinciæ vel regno, vel civitatî, extenditur ad omnes etiam advenas & peregrinos illuc venientes. *Card. de Lugo disp. 127. n. 126. Gobat cit. c. 13 n. 87 testaturq; de praxi 3.* Dum ad sua redeunt Viatores conceduntur ipsis, duæ hebdomadæ pro Jubileo. 4. Si ante professionem promulgatus fuit apud ipsos Jubileus: possunt Conditiones exequi alibi (etiam ubi non est promulgatus Jubileus) v. g. confiteri apud electum à se confessarium approbatum, communicare, jejunare, eleemosynas dare. Quia per præsentiam tempore promulgationis acquisiverunt Jus ad lucrandum Jubileum, quod non tam locale, quàm Personale est. *Idem cum Lug, Diana Laym* Ecclesiæ tamen visitari debent ibi, ubi promulgatum jam est Jubileum, & Ecclesiæ designatæ à Loci Ordinario. *Idem 5.* Si iter faciens pervenias ad locum, in quo Jubileum celebratur: frueris illo æque ac incolæ, sive perveneris illuc ante, sive primum post publicationem Quia Promulgatio semel facta perseverat, &



& operatur per totum tempus præfinitum. *Iidem.* Ex dictis sequitur: Non teneri te ratione Jubilæi differre iter in aliud tempus; Siquidem Bulla communiter sine distinctione vel restrictione offert gratiam iter agentibus.

## V.

*De Itinerantibus quoad Absolutionem Sacramentalem.*

I. **S**acerdotes itinerantes sive sæculares, sive Regulares, non possunt absolvere poenitentes alterius Dioecesis, in qua approbati non sunt. Patet ex Decreto Urbani VIII. apud Lug. de poenit. disp. 21 S. 2. n. 29. Esset autem non tantum illicita, sed invalida absolutio.

2 Episcopi & Parochi possunt suos subditos etiam in aliena Dioecesi absolvere Sacramentaliter, tum quia jus habent in eas personas; tum quia actus exercendus non est fori contentiosus. Bassæus V. Absolutio n. 18. cum Sanch. Reginal. Diana. Et habet Suar. de Poenit. disp. 28. sect. 6. n. 4. Lugo cit. n. 37.

3. Re-

3. Religiosi approbati in una diœcesi, dum proficiscuntur in aliam, non possunt ibi Sacramentaliter absolvere etiam illius diœcesis pœnitentes sæculares, in qua approbati sunt, antequam approbentur à Loci Ordinario ejus diœcesis, ad quem venerunt. Ita expresse habet Clementis X Constitutio, incip. *Superna Magni Patrisfam.* Proinde Religiosi dum transferuntur ad aliam Diœcesim, quàm primùm procurent Approbationem ab ejus Loci Ordinario, ut possint excipere ibi Confessiones sæcularium; vel eam petant à Superiore suo, si hic habet ab Episcopo delegatam ad id potestatem.

4. Quando inter Religiosos peregrinantes unus est Sacerdos, peccata deponenda sunt apud ipsum à cæteris, etiam quando alius aliquis ejusdem Religionis Sacerdos occurrit in via. In domibus tamen Religionis suæ, per quas transeunt possunt etiam confiteri Confessario alicui domestico. Quod si non habeant inter se Sacerdotem suæ Religionis, possunt cuicumq; Sa-  
cer-

cerdoti ( nisi aliud statuat alicujus Ordinis regula ) etiam non approbato confiteri. ( nam approbatio Episcopi solum requiritur pro sæcularium confessionibus ) Gobat de Sacram. tr. 7. n. 646 & seqq. cum suar. & aliis.

## VI.

*De Itinerantibus quoad Absolutionem à Reversatis.*

I. **I** Tinerantes sæculares obnoxij Casibus reservatis suo proprio Episcopo, possunt in aliena diœcesi, ad quam venerint, absolvi ab iisdem à quovis Sacerdote ibi approbato: si tamen casus illi non sint etiam reservati Episcopo hujus Diœceseos, & ipsi non susceperint iter in fraudem reservationis: nimirum ut alibi possint liberius absolvi à quocunq;, nemini enim dolus suus patrocinari debet. Si verò illi casus fuerint etiam in hac, ad quam venerunt, diœcesi reservati: non poterunt absolvi, nisi ab habente potestatem in reservata ab Episcopo ejusdem diœcesis. Bassaeus V. Casus reservati n.

9. cum Suar tom: 4. disp. 30. sect.  
1. Navar. Cajet. Henriq. Reginald. Di-  
ana, Filiuc.

2. Religiosi itinerantes dum in via  
absolvuntur à peccatis, non absolvun-  
tur à Reservatis, nisi cum onere sisten-  
di se Superiori loci, ad quem perti-  
nent: DD. Comm.

3 Subjungo *Casus Episcopis* reser-  
vatos: ut in varias Diœceses inciden-  
tibus in promptu sint.

*Casus Reservati Episcopis in  
Regno Polonia.*

1. Hæresis. 2. Apostasia 3 Homici-  
dium voluntarium. 4. Raptus Virgi-  
num. 5. Injectio violenta manuum  
in parentes cum eorum læsione. 6.  
Violenta Virginum oppressio. 7. In-  
cestus cum consanguineis. 8. Item  
cum Monialibus. 9. Incendium ma-  
litiosum. 10. Simonia. 11 Adulteri-  
um notorium 12. Sortilegium.

Et generaliter omnia delicta quæ  
excommunicationem majorem à Ca-  
none, vel ab homine latam annexam  
ha-

habent, & omnes alij excessus prædictis graviores.

*Casus Reservati Episcopo Vilnensi  
in Synodo Anni 1613.*

1. Hæresis. 2. Lectio librorum Hæreticorum, qui ex professo tractant de dogmatibus Fidei. 3. Perjurium in judiciis publicum. 4. Falsificatio sigillorum & Chyrographorum. 5. Falsum testimonium in judiciis, scripto & voce dantium. 6. Sodomia. 7. Bestialitas. 8. Incestus cum consanguinea, vel affine in primo gradu. 9. Violatio Virginum. 10. Raptus cujuscunq; mulieris, multò magis alienæ uxoris. 11. Homicidium deliberatè voluntarium: & ad illud operam & consilium navantes. 12. Parentum percussores. 13. Incendiarij. 14. Peccatum Clericorum piis legatis non satisfacientium. 15. Ad beneficia curata ordinariè non residentium sine facultate Episcopi.

*In Synodo Anni 1669 additi præter dictos immediatè Casus isti.*

1. Crī-

1. Crimen magiæ, veneficiorum, incantationum, Divortia inter conjuges procurantium, fovenium. 2. Suppellectilem post intestatos Sacerdotes rapientium, aut viliora pro melioribus supponentium.

### CASUS EPISCOPALES in Diœcesi Culmenſi & Pomezanix ex Synodo Anni 1641.

**Q**ui facit incestum, deflorans, aut homicida, acriter, Patres percussor, vel Sodomita, Transgressor Voti, perjurus, sortilegusq;.  
Et mentita fides, faciens incendia, prolis Oppressor, blasphemus, hæreticus, omnis adulter, Cum bruto coiens, Iudæa, sive Pagana, Aut cum comatre, seu nata spiritali, Conjugis in mortem machinans, sacris & abutens His simul usuram jungas publicam & occultam Pontificem. Ceteris his se non ex devotus adiōs.

Archipresbyteris tamen solis potestatem faciemus ab illis, quatenus occulti sunt, laicos utriusq; sexûs absolvendi. Quatuor exceptis: Homicidis, Opprimentib; pueros, Hæreticis, & Excommunicatis, quos remitti ad nos volumus. Ad publicam etiam Pœnitentiam Parochi eos, qui publicè peccaverint, cohortentur.

C A-

CASUS EPISCOPALES  
in Diœcesi Varmienſi ex Syno-  
do celebrata ſub Illuſtriſſimo Si-  
mone Rudnicki Anno 1612.

1. **P**ercutiens Clericum levi percuſ-  
ſione: *ſuadente tamen diabolo* 2.  
Percutiens Parentes ſuos. 3. Homici-  
da. 4. Procurans maleficiã inter con-  
juges, ne coire poſſint. 5. Procurans  
abortum vel ſterilitatem in ſe vel in  
alia. 6. Oppreſſor liberorum ſuorum.  
7. Machinans in mortem uxoris aut  
uxoricidium committens. 8. Clericus  
qui bello interfuit. 9. Si corpore e-  
normiter vitiatus ſine diſpenſatione  
celebravit ſacra, ſive irregularis. 10. Si  
quis Clericus coivit cum ea quam ba-  
puiſavit vel in confirmatione tenuit  
vel cujus confeſſionem audivit. 11. Si  
Clericus fuit bigamus vel in Sacerdo-  
tio contraxit matrimonium. 12. Si  
quis committit peccatum contra natu-  
ram ſive ſodomiticum. 13. Coitus in  
Eccleſia 14. Contrahens matrimonium  
poſt ſponſalia priùs contracta & jura-  
mento



mento firmata cum alia vel alio. 15. Oppressor Virginis. 16. Qui cum Monacha vel quæ cum Monacho rem habuit. 17. Incestus seu copula carnalis vel matrimonium inter propinquos, affines & spirituales, consanguineos & compatres. 18. Mulier alienum partum marito pro ipsius vel suo supponens. 19. Clericus excommunicatus majori excommunicatione celebrans vel Sacramenta administrans. 20. Clericus admittens excommunicatum ad audienda divina. 21. Clericus absolvens excommunicatum sine facultate vel in casibus prohibitis præterquam in mortis articulo. 22. Excommunicatus & cum eo sciens communicans in divinis. 23. Sepeliens excommunicatum in templo & cæmeterio. Celebrans in altari non consecrato vel si celebrat sine sacris instrumentis aut sine corporali vel si celebrat non jejunus. 24. Celebrans in loco interdicto. Bis baptisatus. 25. Baptisans proprium filium extra imminentem mortis necessitatem vel tenens ru-

eundem ad baptismum aut Confirmationem. 26. Qui revelat confessiones aliorum. 27. Contrahens matrimonium post votum castitatis 28. Clericus ordinatus sine licentia sui Episcopi vel per saltum promotus. 29. Si quis illegitimus sine dispensatione beneficium accepit vel ad sacros Ordines promotus est. 30. Abutens Sacramentis vel rebus Sacris & Sacramentalibus ad profanos vel illicitos usus. 31. Fautores & receptatores hæreticorum, propagantium hæreses. 32. Habentes & legentes scienter libros hæreticos. 33. Qui cum hæreticis in cultu divino vel circa administrationem Sacramentorum communicavit. 34. Simoniaca labes. 35. Rem sacram pecunia comparans aut vendens 36. Absolutus in mortis articulo à Casu Episcopali vel Papali si postquam convaluit non re-præsentavit se Ordinario suo nec ejus auctoritate denuo absolutus est. 37. Sacrilegus & adjutor ejus. 38. Raptor aut usurpator bonorum Ecclesiasticorum. 39. Violans Ecclesias & immu-  
nita-

nitates earum 40, Incendiarius, etiam antè denunciationem 41. Publicè blasphemus. 42. Qui publicè crimen usuræ perjuriivè commisit. 43. Falsarius literarum & publicæ monetæ. 44. Incantatrices, sortilegi, malefici.

*Apræmissis Casibus, dum occulti sunt, omnes approbati absolvere possunt: exceptis Homicidis, Opprimentibus infantes, Excommunicatis, & Hæreticis.*

## BENEDICTIONES VARIÆ.

*Petuntur subinde ab Itinerantibus Sacerdotibus Benedictiones variæ: quas ne ob defectum Ritualis omitti contingat; subjungo aliquas ex probatis Ritualibus excerpeas.*

### BENEDICTIO ORDINARIA AQUÆ.

*V. Adjutorium nost: R Qui fecit &c.  
Deinde fit Exorcismus salis.*

**E**Xorciso te Creatura Salis, per DEUM † vivum, per DEUM † verum, per DEUM † sanctum, per DEUM, qui te per Elisæum Prophetam in aquam mitti

mitti jussit, ut sanaretur sterilitas aquæ, ut efficiaris sal exorcisatum in salutem credentium: & sis omnibus te fumentibus sanitas animæ & corporis: & effugiat atq; discedat à loco, in quo aspersum fueris, omnis phantasia, & nequitia, vel versutia diabolicæ fraudis, omnisq; Spiritus immundus adjuratus per eum, qui venturus est judicare vivos & mortuos, & sæculum per ignem. *Resp. Amen.*

## OREMUS.

**I**mmensam Clementiam tuam Omnipotens æterne DEUS, humiliter imploramus, ut hanc Creaturam Salis, quam in usum generis humani tribuisti, bene † dicere, & sancti † ficare, tuâ pietate digneris, ut sit omnibus fumentibus salus mentis & corporis: & quidquid ex eo tactum, vel respersum fuerit, careat omni immunditiâ, omniq; impugnatione spiritualis nequitiae, Per Dominum nostrum &c.

*Exorcismus Aquæ, & dicatur sine Oremus*

**E**xorciso te Creatura Aquæ in nomine DEI † Patris Omnipotentis,

N

&amp; in

& in nomine JESU † Christi, Filij ejus Domini nostri, & in virtute sancti † Spiritus, ut fias aqua exorcisata ad effugandam omnem potestatem inimici & ipsum inimicum eradicare, & explantare valeas cum Angelis suis Apostolicis, per virtutem ejusdem Domini nostri JESU Christi, qui venturus est judicare vivos & mortuos & sæculum per ignem. *Resp* Amen.

## OREMUS.

**D**EUS, qui ad salutem humani generis, maxima quæq; Sacramenta in aquarum substantia condidisti: adesto propitius invocationibus nostris, & elemento huic multimodis purificationibus præparato, virtutem tuam bene † dictionis infunde: ut creatura tua mysterijs tuis serviens, ad abigendos dæmones, morbosq; pellendos, Divinæ gratiæ sumat effectum: ut quidquid in domibus, vel in locis fidelium hæc unda resperferit, careat omni immunditiâ, liberetur à noxa: non illic resideat spiritus pestilens, non aura corrumpens: discedant omnes

mnes insidiæ latentis inimici, & si  
quid est, quod aut incolumitati ha-  
bitantium invidet, aut quieti, aspersi-  
one hujus aquæ effugiat, ut salubritas  
per invocationem Sancti tui Nomi-  
nis expetita, omnibus sit impugnati-  
onibus defensa. Per Dominum no-  
strum Iesum Christum &c

*Hic mittat Salem in Aquam, in mo-  
dum Crucis, dicendo semel.*

Commistio Salis & Aquæ, pariter fi-  
at in Nomine Patris, & Filij, &  
Spiritus Sancti, Amen.

*Vers.* Dominus vobiscum.

*Resp.* Et cum Spiritu tuo.

## OREMUS

**D**EUS invictæ virtutis auctor, in-  
superabilis imperij Rex ac sem-  
per magnificus triumphator: qui ad-  
versæ dominationis vires reprimis: qui  
inimici rugientis sævitiam superas: qui  
hostiles nequitias potenter expugnas:  
te Domine tremantes & supplices de-  
precamur ac petimus, ut hanc crea-  
turam Salis & Aquæ dignanter aspici-  
as, benignus illustres, pietatis tuæ ro-

re sanctifices: ut ubicunq; fuerit aspersa, per invocationem sancti tui nominis infestatio immundi Spiritûs abigatur, terrorque venenosi serpentis procul pellatur, & præsentia Sancti Spiritûs nobis misericordiam suam poscentibus, ubiq; adesse dignetur. Per Dominum nostrum Jesum Christum &c. Amen.

*Antiphona.*

Asperges me Domine hyssopo & mundabor, lavabis me, & super nivem dealbabor. Miserere mei DEUS secundum magnam misericordiam tuam. Gloria Patri, &c

Asperges me, *repetatur.*

*V.* Ostende nobis Domine misericordiam tuam.

*R.* Et salutare tuum da nobis.

OREMUS,

**E**Xaudi nos Domine Sancte, Pater Omnipotens, æterne DEUS, & mittere digneris Sanctum Angelum tuum de cælis qui custodiat, foveat, protegat, visitet, atq; defendat omnes habitantes in hoc habitaculo. Per Christum Dominum nostrum. A. Præ-



**P**Ræsta nobis quæsumus Domine,  
hac aquâ aspersis, sanitatem cor-  
poris, integritatem mentis, tutelam sa-  
lutis, securitatem spei, corroboratio-  
nem fidei. Per Christum Dominum  
nostrum. *R. Amen.*

## BENEDICTIO COMMUNIS.

*V. Adjutorum nostrum &c.*

*R. Qui fecit cælum & terram.*

*V. Dominus vobiscum.*

*R. Et cum spiritu tuo.*

OREMUS.

**C**reator & conservator humani  
generis dator gratiæ spiritualis,  
largitor æternæ salutis, tu Domine  
mitte Spiritum S. tuum, cum superna  
benedictione † super hanc creaturam  
N. ut armata virtute cœlestis defensi-  
onis, illis, qui eâ fruuntur, proficiat  
ad corporis & animæ salutem ac tu-  
telam. Per Dominum nostrum JE-  
sum Christum &c. Amen.

*Aspergat aquâ benedictâ.*

N<sub>3</sub>

Bene-

Benedictio depulsiva Maleficiorum  
& Incantationum.

**S**acerdos stolâ amictus, & Incantatum, sive maleficio affectum hominem, vel animalia ante se habens, aut si locus incantatus est, in eo stans paratâ aquâ & thure, vel herbis benedictis, devotè sic oret:

*V.* Adjutorium nostrum &c.

*R.* Qui fecit cælum & terram.

*Kyrie eleison. Christe eleison. Kyrie eleison. Pater noster. Ave Maria. Credo.*

*V.* Domine exaudi orationem &c.

*R.* Et clamor meus &c.

*V.* Dominus vobiscum.

*R.* Et cum spiritu tuo.

OREMUS.

**D**EUS Cælorum, Terræ, & Maris, & omnium quæ in eis sunt, Conditor & Moderator: qui Sathanam extollentem sese adversus mentem tuam unâ cum asseclis ipsius sicut fulgura de cælo præcipitasti: & Ministrorum ejus Magorum Pharaonis, Moyfi servo tuo resistentium incantationes & maleficia inefficacia reddidisti: te supplices  
ora-

oramus ut incantationes, præstigia & maleficia huic famulo tuo ( huic famulæ ) ( vel huic loco ) ( vel his creaturis ) improba fraude dæmonum, ( meritis peccatorum nostrorum fortassis ) intenta & inflicta omnipotentî virtute tua, & clementi bonitate dimoveas, avertas; & itidem inefficacia reddas, quâ tyrannide eorum liberati, tibi Domino DEo nostro expeditiùs serviamus & nomen sanctum tuum studiosiùs celebremus. Per Dominum nostrum JESUM &c.

## OREMUS.

**D**omine JESU Christe Fili DEi vivi, qui de sinu Patris in terras descendisti, ut opera diaboli dissolveres, & discipulis tuis dedisti potestatem calcandi serpentes, & scorpiones: te supplices precamur, ut eos ipsos antiquos serpentes atq; dracones diabolos, qui in hoc famulo tuo ( hac famula tua ) ( vel in loco ) ( vel in his Creaturis tuis ) tyrannidem sibi usurpant, pedibus familiæ tuæ potenter subjicias, & opera eorum, quæ addu-

cti incantationibus & maleficiis hominis mente corrupti & sibi dediti in perniciem servi tui, (vel servorum tuorum) machinantur & exercent, divinâ clementiâ & virtute tuâ dissolvas & inefficacia reddas. Qui cum eodem Patre tuo, & Spiritu Sancto DEUS unus regnas, in sæcula sæculorum. Amen.

*EXORCISMUS.*

**E**Xorciso & adjuro vos maledicti diaboli, quicumq; & quotquot estis; qui adducti, incantationibus, maleficiis & nefariis artibus hominis vobis addicti, hominem hunc, (vel locum hunc,) (vel has creaturas,) perniciosè vexatis & exagitatis: ut hinc statim cum omnibus præstigiis, & maleficiis vestris discedatis, nec ullam vobis deinceps potestatem (in hunc hominem) (vel in hunc locum,) (vel in has DEi creaturas) usurpetis. Hoc autem non mea virtute vel meritis, vobis præcipio: sed in nomine DEi Omnipotentis, Patris,† & Filii,† & Spiritus† Sancti: & in virtute Sanctæ† Crucis &  
mor-

mortis Domini nostri, per quam potestas omnis tenebrarum & tyrannis vestra in homines, & omnes creaturas DEI enervata & exinanita est. Recedite ergo & fugite hinc illico, & date locum DEI potentiae dissolventis opera vestra maligna, per immensam misericordiam suam. Increpet in vos digitus DEI, qui Magorum Pharaonis incantationes inefficaces reddidit, & cujus virtutem tunc agnovistis, cum Pauli Apostoli imperio vim vestram in Elymam magum mancipium vestrum (ad cujus nutum multis noceratis) convertistis, & cum in Sanctam Justinam incantante, & vos urgente Cypriano, nihil profecistis: Sit super vos nunc etiam terror DEI Omnipotentis, qui vos in ignem æternum precipitavit: Pater, † & Filius, † & Spiritus † Sanctus, Amen.

*His dictis aspergatur homo, vel locus, vel jumenta, & pecudes incantata & maleficia aqua benedicta: & suffitu thuris vel herbarum benedictarum lustrentur, sive incensentur.*

*U. efficacior sit hæc Benedictio: juvabit,  
quantum fieri poterit, Sacrificium Di-  
vinum, & pridie Jejunium in eundem  
finem.*

## BENEDICTIO AQUÆ SANCTI P. IGNATII.

*U. Adjutorium nostrum in Nomine  
Domini,*

*R. Qui fecit Cælum, & terram.*

*V. Sit nomen Domini benedictum,*

*R. Ex hoc, nunc & usq; in sæculum.*

*V. Domine exaudi orationem meam,*

*R. Et clamor meus ad te veniat.*

*V. Dominus vobiscum.*

*R. Et cum Spiritu tuo.*

OREMUS.

**D**omine Sancte Pater Omnipotens  
æterne DEUS, qui benedictionis  
tuæ gratiam ægris infundendo cor-  
poribus; facturam tuam multiplici pi-  
etate custodis, ad invocationem No-  
minis tui, benignus assiste (interce-  
dente B. IGNATIO Confessore tuo)  
ut famulos tuos ab ægritudine libera-  
tos, & sanitate donatos dexterâ tuâ e-  
rigas,

rigas, virtute confirmes, potestate tuearis, atq; Ecclesiæ Sanctæ tuæ cum omni prosperitate restituas. Per Dominum nostrum IESUM Christum Filium tuum, &c. Amen.



**B**enedic † Domine hanc Aquam, ut sit remedium salutare generi humano, & per intercessionem B. IGNATII, cujus reliquiæ in eam immerguntur, præsta, ut quicumque ex illa sumperint, corporis sanitatem, & animæ tutelam percipiant. Per Dominum nostrum &c. Amen.

**D**EUS qui ad maiorem tui Nominis gloriam propagandam, novo per B. IGNATIUM subsidio militantem Ecclesiam roborasti, concede propitius, ut ejus auxilio, & imitatione certantes in terris, coronari cum ipso mereamur in cælis. Qui vivis & regnas, &c.

*Reliquiæ merguntur initio Benedictionis, usq; ad finem.*



BENEDICTIO AQUÆ  
S. FRANCISCI XAVERII  
INDIARUM APOSTOLI.

*V.* Adjutorium nost: *R.* Qui fecit &c.  
*V.* Dominus vobiscum,  
*R.* Et cum spiritu tuo.

OREMUS.

**D**EUS, qui ad salutem humani generis, maxima quæq; Sacramenta in aquarum substantia condidisti adesto propitius invocationibus nostris: & elemento huic multimodis purificationibus præparato, Virtutem tuæ bene dictionis infunde, & præsta per invocationem Sancti Nominis tui, & intercessionem S. FRANCISCI XAVERII Indiarum Apostoli, cujus reliquæ in hanc aquam immerguntur, ut quicumq; ex ea sumpserint, corporis sanitatem, & animæ tutelam accipiant. Per Christum Dominum nostrum. Amen.

OREMUS.

**D**EUS, qui ad illuminationem gentium B. FRANCISCUM India-  
rum

rum Apostolum elegisti, & miraculo-  
rum gloriâ decorasti, concede, ut e-  
jus meritis, & intercessione, & in Fi-  
de, quam docuit, inveniamur stabi-  
les, & in charitate, quam exercuit  
efficaces. Per Dominum nostrum JE-  
sum Christum &c.

## COROLLARIUM II.

## PARAPHRASIS

seu Brevis Explanatio Psalmi 90.

*Qui habitat in adiutorio Altissimi &c.*

PRO SOLATIO ITINERANTHUM, IMÒ

QUORUMVIS FIDELIUM.

**E**Xcitat nos Psalmographus divinus  
hoc Psalmo ad eximiam in DEum  
Opt. Max. fiduciam concipiendam, &  
constanter fovendam Cùm enim in-  
numeris & gravissimis, semper & ubi-  
q; expositi simus periculis, ad quæ  
declinanda, vel propulsanda nec sa-  
tis virium, nec prudentiæ nobis sup-  
petit: necesse est, ut oculos, manus,  
corda, vota, suspiria, & voces leve-  
mus in cælum ad eum, qui gratiosè

vult, & facillè potest, nos juvare, atq; etiam è portis inferi eruere. Ad id nobis persuadendum, miram habet efficaciam pulcherrimus hic Psalmus: cujus virtute agnitâ, ordinavit Ecclesia S. ut singulis diebus in Officij Divini Completorio decantetur, seu recitetur, ad propulsanda pericula nocturna. Cum autem diurna non sint minora, si non majora: valde expedit, eum etiam manè, præsertim à Viatoribus, meditatè recitari. Sed jam audiamus Psalmographum præcinentem:

## PSALMUS.

Ps. I. *Qui habitat in adjutorio Altissimi*, mente devota, & corde puro, in ipso spem suam omnem & fiduciam reponendo: *in protectione DEI commorabitur*, gaudebitq; fidei & Omnipotente Protectore per omnem vitam suam.

2. *Dicet Domino*, postquam in omnibus necessitatibus suis expertus fuerit constantem ejus protectionem: *Susceptor meus es tu*; qui me ab hominibus desertum gratiosè suscepisti; & resu-

*refugium meum*, in omni tribulatione; *DEUS meus!* quid extra Te volo? *& sperabo in eum*, potius, quàm in filiis hominum, in quibus non est salus.

3. *Quoniam ipse liberavit me de laqueo venantium*, qui diu noctuq; calidissimè insidiantur animæ meæ: sed Dominus detexit, & dirupit laqueos eorum; liberavitq; me etiam à verbo aspero, quo famam meam lacerârunt, & in interitum meum conjuraverunt.

4. Sic confitenti homini justo divitiâ erga se benevolentiam & protectionem, promittit Propheta ulterius & uberius ejusdem auxilium in omni adversitate. *Scapulis suis obrumetabit tibi, & sub pennis ejus sperabis.* Instar gallinæ vel aquilæ, imminente imbre, grandine vel milvo, colligentis pullos sub alas suas, colliget te sub scapulas suas Omnipotens Protector, in brachio forti defendet te, nec confundet te spes tua.

5. *Scuto circumdabit te Veritas ejus.* Quando jam non delitescendum erit sub alis, sed pugnandum cominus cum hoste;

hoste; scutum, seu clypeum tibi præbebit inexpugnabilem, quo undiq; tegeris, & omnia hostium tela retundas victor. Hunc autem clypeum tibi præbebit *Veritas ejus*. Nihil enim efficacius est ad retundenda, refringenda, & extinguenda etiam ignita hostium tela, Veritate oraculorum divinorum, quibus DEus probis in ipso sperantibus, promisit tutelam suam & salutem æternam; improbis supplicia æterna. *Non timebis à timore nocturno*. Sic armatus & protectus, dormies securus, tanquam in paterno ejus sinu, nihil timendo eorum, quæ nocturno tempore timeri solent, ut insidiæ, mors repentina, dæmonum infestationes, &c.

6 *Asagitta* quoq; *volante in die*, non timebis: quando scilicet te inimici tui vi aperta aggredientur, & venenatis lingvæ jaculis configere, atq; cōficere laborabunt, neq; *à negotio perambulante in tenebris*, timebis: sive hoc negotium tibi facessere voluerint, lemures seu spectra nocturna, sive cōmessatores,

tores, aut grassatores, sive prostitutæ lupæ, & quidquid est, quod diē lucemq; odit ac fugit. Non deniq; terrorem patieris *ab incurſu & demonio meridiano*; ab otio, ſomnolentia, Baccho, & Venere: quæ dæmonia infeſtiora eſſe ſolent tempore meridiano; ut patet in ipſo Davide.

7. *Cadent à latere tuo mille, & decem millia à dextris tuis*, ingruente vi tentationum, ſollicitantium & trahentium ad lapſum: *ad te autem non appropinquabit tentator*, DEO arcente; ſed à longè fremet & tabeſcet; tu autem in tanta hominum ſtrage, exultabis victor in DEO JEſu tuo.

8. *Veruntamen oculis tuis conſiderabis*, attentius eos figendo in tragicum & miſerabile objectum: *& retributionem peccatorum videbis*; qui non poſuerunt in DEO ſpem ſuam, ſed ſperaverunt in divitiis ſuis, vel poſuerunt carnem brachium ſuum, vel contra DEum roborati ſunt &c. Non protrahetur vindictæ executio in ſæcula, ſed ipſe retributionem horribilem, æquiſſimam tamen, videbis. 9.

9. *Quoniam* dixisti DEO, *Tu es Domine spes mea*, & *Altissimum* posuisti *refugium tuum*; potentiam autem & auxilium hominum non existimasti validius baculo arundineo: stabis intactus etiam inter mundi ruinas.

10. *Non accedet ad te malum* quod te evertat; sed ut vincas in bono malum. Tentatio erit tibi in maiorem proventum: *Et flagellum*, quo castigari solent improbi protervi & incorrigibiles, *non appropinquabit tabernaculo tuo*, in quo domicilium sibi fixerunt Iustitia & Pax, nec locum habet iniquitas:

11. *Quoniam Angelis suis mandavit de te ut custodiant te in omnibus vijs tuis*. stupenda dignatio! DEUS mandavit; & *Angelis suis* cæli principibus, mandavit; & *de te* homuncione misero, vili terræ vermiculo mandavit: *ut custodiant te*, à primo conceptionis momento, ad ultimum instantis vitæ; *in omnibus vijs tuis*, indefessi comites, invicti præsidarij, officiosissimi ministri.



12. *In manibus portabunt te: luteum vas? saccum hunc stercorem? Portabunt in manibus suis. Quò portabunt? Ad regiam cælestem gloria & honore coronandum. Quomodo portabunt? Quàm levissimè, & circumspèctissimè: Nè fortè offendas ad lapidem pedem tuum. Atqui hoc sufficeret, portari te splendida quapiam lectica, vel equo pretiosè phalerato. Homini suffiebat, non DĒo, divitias & delicias amoris in te sui demonstrare volenti. Vnde, quàm pretiosus sis DĒo! Angelos humiliat, ut te exaltet.*

13. *Super aspidem & basiliscum ambulabis, & conculcabis leonem & draconem.* Angelicis manibus delatus, non solum non impinges in lapidem obvium: sed etiam insidiantes tibi feras bestias victorioso pede calcabis. Quamdiu fidus adhaeris DĒo, & in ejus protectione commoratus fueris, nihil est in mundo, quod non serviat lucro & gloriæ tuæ; quod terrori esse possit. Audi DĒum ipsum pollicentem:

14. *Quoniam in me speravit, libera-*

*bo cum*, etſi jam conſumptus videbitur. *Protegam eum*, quoniam cognovit nomen meum, cognitione practica ſeu experimentalis, qua didicit: quàm ſuavis ſim, quàm potens, & fidelis in omnibus promiſſis meis.

15. *Clamabit ad me*, in periculis & anguſtiis ſuis: *& ego exaudiam eum*, imò plùs præſtabo, quàm deſideret: *eripiam eum* ex tribulatione, periculis & faucibus hoſtium ſuorum; *& glorificabo eum*, ut ex adverſitate non ſolùm nihil capiat detrimenti, ſed plurimùm lucri & ſplendoris. Deniq;

16. *Longitudine dierum replebo eum*: ut vitam vivat & annorum numero diuturnam, & bonorum operum copiam plenam atq; pretioſam; ac tandem *oſtendam illi ſalutare meum*, manifeſtando ei me ipſum in æterna beatitudine, ut facie ad faciem videat, amet, glorificet æternùm Salvatorem ſuum.

Quid poſſumus deſiderare ampliùs? Hunc ergo planè Divinum Pſalmum, liquidiffimi pariter ac ſolidiffimi ſola-

tij plenum, juvat ab Itinerantibus, & quibuscvis in aliquo discrimine & angustia constitutis, attentè recitari: ut in se excitent foveantq; solidam in DEum Adjutorem & Protectorem suum fiduciam, fiducia autem operetur victoriam, exultationem & gloriam æternam.

## COROLLARIUM III.

### Illustria quædam Exempla

#### PROVIDENTIÆ DIVINÆ

#### circa Itinerantes.

*Dedi, seu potius delibavi, aliqua superius Distract: 10. Verùm, cum non facilè sit, diffidentiam nostram suppressere, & pusillavimitatem erigere, ut vivam solidamq; fiduciam concipiat erga DEum; consultum putavi, aliquot insuper de eodem argumento congerere Exempla.*

#### I.

**C**Horum ducat celebris ille in sacris Literis Tobias Junior, Optimi Parentis non degener filius: quem

eo honore dignata est Providentia Divina: ut ex Septem primis cæli Principibus, assistentibus throno divino, Raphaëlem Archangelum, ipsi attribuerit Comitem viarum. Quid præstiterit Clienti sibi commissio Raphaël, notum est ex Scripturis Divinis, & compendio recenset Tobias cap. 12. de gratitudine debita sollicitus, atq; deliberans cum patre. *Pater, quam mercedem dabimus ei, aut quid dignum poterit esse beneficijs ejus? Me duxit & reduxit sanum, pecuniam à Gabelo ipse recepit, uxorem ipse me habere fecit, & demonium ab ea ipse compe-scuit, gaudium parentibus ejus fecit, me ipsum à devoratione piscis eripuit, te quoq; videre fecit lumen cæli, & bonis omnibus per eum repleti sumus.* Ita Bonitas Divina per ministros suos consulit non solum necessitatibus proborum viatorum; sed etiam abundantia, honestæ voluptati, & dignitati.

## II.

**E**X infinito recentium Exemplorum agmine præcedat, quod suppeditat

Lyra-

Lyræus *lib. 2. Trisagij Mariani*. Religiosus ex Ordine Capuccinorū in Provincia Veneta, functus Guardiani ac Magistri Tyronum officio, facultatem sibi impetravit, Lauretanam DEiparæ Virginis ædem visitandi. Vix triduum processerat, cum sylvam obviam cum juniore Socio ingressus, aberrare cœpit à via: cumq; ingruente nocte, exitum nullum conspiceret, sub arbore pernoctare constituit. Sed Socius perspecta Senis infirmitate, noctis frigore, & repentinâ pluviâ ingruente, lustrare cœpit viciniam, & clamore accolas frustra accire. Tandem palpando in tenebris progressus, parietem domus alicujus offendit. Advocato igitur Socio Sene, ad portam deveniunt, excitatoq; pulsū campanæ, Janitori denuntiant adesse par Capuccinorum Peregrinorum, qui nocte oppressi hospitium rogant. Respondet Janitor, se sine mora relaturum ad Dominam. Mox adest œconomus cum duobus ephebis, geminas faces præferentibus, jussu Domine gratulans

Pere-

Peregrinorum adventum. Introducti in interiora Domûs, reperiunt Dominam insigni formâ & Majestate spectabilem, in medio Conclavi mensâ humili ac viridi tapetio instratâ, quam bina candelabra ex argento affabrè elaborata, illustrabant, assidentem, & nescio quas chartas pervolutantem. Visus Peregrinis, illa blandè arridere, saluum adventum gratulari, ac itineris adeò molesti causam inquirere. Cui Senior: Susceptam esse ad Domum Lauretanam Peregrinationem reposuit. Quò auditò; rectè equidem factum, intulit Domina, & digna Religiosis Viris pietas; eò vobis crastina die literas deferendas committam: ire nunc, vires reficite, & securi quiescite. Deducuntur itaq; ab œconomo ad cubiculum interius, mensâ, focò ac duobus lectis, cæterisque necessariis & commodis probè instructum. Nocte, commodè lauteq; traductâ, summò manè œconomum adeunt, Domina valedicturi: sed antè, ab eodem adjutaculum deducti sunt; quò sumptò,

ad

ad Dominam admittuntur; quam Majestate humanam prætergressâ venerabilem, & comitate singulari amabilem repererunt eodem loco & situ, quò pridie. Gratias, quas, agere instituerunt maximas, interrumpens Dominâ, de varijs sibi devotis Ascetis quæsit accuratiùs, & eorum commemoratione, non parùm recreari visâ est: mox literas tradidit Lauretum deferendas. Sic læti discessere Peregrini, Vix passus 50 fecerant; cùm desiderio cognoscendi Hominis, cui literæ essent inscriptæ, exteriùs involucrum evolvunt & non modò inscriptionem nullam, sed nec obsignatas deprehendunt. Quare iter relegere, ac de commisso defectu Dominam statuunt admonere. Sed, ô rem admirandam! nec domũ reperiunt, nec ullâ isthic extitisse intelligunt. Unde literas perlegentes, inveniunt illas à DEipara V. scriptas ad ipsosmet. Quibus lectis, mirum quantâ ambo lætitiâ inceserint; actisq; DEo & DEiparæ gratiis, statuerunt rem fidò silentiò tenere, quò ad viverent.



Tandem Sacerdote, post annos plures, animam agente, res tota per eundem, Guardiano innotuit, traditaq; eidem epistola Mariana fuit: quam is ad totius Provinciæ Præsidem detulit; ab hoc, cum facultate R. P. Ministri Generalis, Duci de Camerino, ejusdem Ordinis Eximiæ Benefactrici, data est, apud quam summo in honore habita pluribus miraculis effulsit. Contigit res eo tempore, quô R. P. Clemens à Noto clavum Ordinis tenebat, quem tenuit ab Anno 1618 ad 1625 Porro Epistolæ Marianæ hic erat tenor.

*Venerande Pater*

*Agnita tua in me voluntate ac pietate, qua ferri te in ædem meam Lauretanam liquidò perspexi; cùm tibi deficerent omnia, sine quibus hæc vita ducitur; ego deesse nolui, sicut nec unquam, ubi tempus aut ratio postulârit, defutura sum.*

*MARIA Virgo,*

Nimirum hæc est illa Mulier fortis & provida, Proverb. 31. quæ facta est quasi navis institoris, de longè portans panem

*panem suum: & de nocte surrexit, deditq; prædam domesticis suis. Reclinemus, post DEum, spem nostram in sinum ejus maternum: & ipsa nos enutriet, & è periculis cunctis vindicabit.*

## III.

**E**Xpertus est non semel similem DEi paræ V. gratiam & curam maternam Petrus Bastus, è S. J. Coadjutor religiosissimus. Adhuc ante initam Societatem peregrinanti ad quoddam illius templum, fesso atq; esurienti prandium ac cœnam ipsa dedit, locumq; ostendit ubi securus quiescere posset. Aliàs cùm Salutationem Angelicam recitaret contra insultus dæmonum, à quibus terrebatur, Divina Mater intra brachia sua recepto, Asylum præbuit. Societatem ingressus, dum iter ageret cum alijs tyronibus, Sociam se adjunxit Matrona illustris cum Viro, ætate ac specie venerando, atq; venustissimo Puero. Cumq; sub noctem cœnam dedissent fessis, peregrini autem vehementer scire cuperens; quinam essent tam gratiosi & benefici Comites?

responsum acceperunt: Nos fundavi-  
mus Societatem; & videri desierunt.  
*Nadasi in Anno dier. memorab. 1. Martij.*

## IV.

**S**ubvenit Divina providentia sa-  
tis lautè, inter alios etiam San-  
cto Didaco iter facienti cum So-  
cio ex obedientia. Fessis cùm nulla  
occurreret civitas vel villa, ubi panis  
fragmentum emendicaret: viderunt  
repente in prato pulcherrimo expan-  
sam mappam candidissimam, duos  
quoq; panes illi impositos, cum pisci-  
bus duobus: ad quorum condimen-  
tum præstò erant aurea mala duo, vi-  
num verò suavissimum ad sitim extin-  
guendam & vires refocillandas. Sic  
refecti, oculis viderunt, & manibus  
palparunt veritatem illius oraculi.  
*Psalm. 54. Facta super Dominum cu-  
ram tuam, & ipse te enutriet.* Quam-  
sententiam viatici loco offerre sole-  
bat Fratribus suis S. Franciscus. Cùm  
autem quidam, illius immemores, in  
via non leviter affligerentur, quod  
longè latèq; circumspèctantibus, nihil  
occur-

occurreret, unde vel bolum aridi panis sperarent: Angelus specie juvenis se se illis adjunxit, quæsitq; cur ita tristes incederent? Responsum in promptu habuerunt, & dederunt; quia nihil ad comedendum habemus. Tunc Angelus: O modicæ fidei! cur non credidistis verbis Patris vestri, & fidistis DEo? Adeste, & comedite. Et obtulit eis duos panes miri saporis; quos non solum familici, sed etiam saturi, abliguriissent. Addidit autem salis, seu aceti aliquid, dicens: In pœnam dissidentiae vestræ permisit DEus, ut nec frustulum panis invenireris; cum aliàs etiam volucres cæli saginet, impleatq; omne animal benedictione. *Lancic. Opuse. 13. lib. 4. n. 626.* Et hæc plerumq; ratio est: cur DEus subtrahit annonā itinerantibus. Quod si aliquando eam non suppeditat etiam confidentibus: vel mentibus eorum, latrante stomacho, lautius præbet epulum cælestium solatiorum; vel capiti pretiosissimam & immarcescibilem parat Patientiæ coronam.

**N**on mensam tantum, verum & hospitium opportunum parat Providentia Divina viatoribus suis. In conversionis suæ ad vitam perfectiorem primordiis, peregrinationem Hierosolymitanam susceperat S. Ignatius de Loyola, Societatis JESU Fundator; acceptaq; benedictione ab Adriano VI Pontifice Max. Romam tendebat Venetias. Iter nactus est paribus ærumnis & solatiis refertum. Cum extrema voluntaria tamen, egestate conflictatus, à sociis & viribus corporis desertus, ægrè trahebat animam: sed prope Patavium spectabilis illi factus Dux suus JESUS, non vires solum restituit corpori, sed etiam delicias animo, ea tamen moderatione: ut læta cum tristibus, adversa cum prosperis alternarent. Pervenit tandem Venetias sub noctem: sed homo externus, linguæ gentis & locorum urbis ignarus, quò se reciperet pro necessaria quiete, non invenit. In porticu igitur quadam fori publici, super duram al-  
gen-

gentemq; humum stratus, pernoctare constituit. Et jam ad modicam rigidamq; quietem artus composuerat: cum ecce Viro Senatorio, Illustrissimo Marco Antonio Trevisano cælitus vox allabatur: *Ergone tu in lecto molli quiescas, famulus autem meus noctem sub dio trahat?* Confusus non indecorâ verecundiâ homo probissimus, lecto exilit, Virum DEi sollicitus quærît, & invenit, domum suam adire compellit, nec minùs reverenter, quàm humaniter tractat, quantô Ignatij cum rubore, tantô suô merito. *Orland. hist. Soc. lib. 1. n. 34 & 35.* Meritò dicere poterat Ignatius cum Psalte sacro: *Ego autem mendicus sum & pauper: Dominus sollicitus est mei.* Psalm. 39. Retuli suprâ, *Distract. 10.* quomodo novo architecturæ genere, S. Petro de Alcantara, tugurium desertum ingresso ad quietem nocturnam, tectum ex nivibus imposuit sollicitus de Servorum suorum hospitio DEus. Ecce, quàm bonum, & quàm jucundû, habitare in adjutorio Altissimi.

## VI.

Quemadmodum regis ad exemplum terrestris componitur orbis: ita Divi Cælites ad exemplum Domini sui, solliciti de Viatoribus, in ipso confidentibus, præstò sunt invocantibus se, præbentq; auxilium in tempore opportuno. Jucundum est, quòd contigit Viro Apostolico è Societate Jesu, P. Bernardo Colnago, Catanæ in Sicilia. Contraxerat ille non solum insignem fiduciam, sed etiam familiaritatem quandam cum Sancta Virgine & Martyre Agatha. Tam frequenter enim se ipsi spectandam obtulit: ut Bernardus diceret: sibi tam probè notam esse de facie; ut vel penicillo effigiem ejus germanam exprimere posset. Contigit aliquando, ipsum ex aliquo itinere, DEi & salutis proximi causâ suscepto, curru revehi Catanam serò, & portis urbis jam clausis. Inclamat, pulsat, instat auriga; ut custodes portam aperiant: sed illi vel somno sepulti, vel aliò dilapsi, nusquam comparent. Aliam igitur por-



portam adire parabat auriga, meliore fortunâ fortè reperturus hominem & ingressum: sed P. Bernardus vetuit, sperans etiam sine Janitore & clavi portas sibi aperiendas. Egressus igitur curru, accedit ad portam, eâq; leniter percussâ, convertitur ad Sanctam suam Agatham, leniq; voce, sed quam Socius & auriga probè percipiebant, illam compellat, ut aditum sibi faciat ad Collegium. Post exiguam moram, instat urgetq; confidentissimè: *Agathula soror mea, non audis? Aperi mihi ô Virguncula Christi. Non te fugit; fractas corpusculi mei vires sub Jove frigido noctem sine damno ferre non posse. Itaq; necessum est, ut nisi in pristinos cruciatus servulum revolvî velis, portas ipsa actutum aperias. Et dabis hoc amanti, qui nihil meritis, omnia spernit. Vix dixerat: & porta minor confestim patuit, sed per quam ipse solum cum socio ingredi urbem poterat, curru & equis extrâ relictis. Quare novis precibus Divam aggreditur, & Agatha,*

*tha*, inquit, *spes mea*, quid me ludis? *mancipium tuum* audi, sed *filium per omnia*. Ut *currus* quodq; introeat, *opus est*; *maiores* aperi *portam*, *utramq;* *laxa valvam*. Dictum factum. Difficile visæ sunt valvæ, auriga cum curru lætus invehitur. Sed Pater jubet illum, subsistere paulisper, & portam obserare; ne fortè custodibus aliquid incommodi crearetur. Revertitur ergo, mandatum executurus, sed præ stupore pavens tremensq; invenit eam, feris & vectibus de more optimè occlusam. Quomodo igitur cum curru & equis intraverit, non capiebat. At P. Bernardus, Divæ pronam in se voluntatem, & humanâ maiorem potestatem, non ignorabat: poteratq; cum regio Vate fidenter cedere illud Psalm. 17. 30. *In DEo meo transgrediar murum*, non solum portas occlusas. *Paulinus in vita P. Bernard. Tanner. in Soc: Apost.*

*Imitat.*

## VII.

Quod Divina Bonitas sperni suam reponenti in ipsa, liberaliter pollicita est Psal 90, *Clamabit ad me, & ego exaudiam eum: cum ipso sum in tribulatione; eripiam eum & glorificabo eum:* id cumulatè implevit in Maximiliano I. Austriae Archiduce. Delectabatur inprimis hic princeps in ætate floridore, venatione rupicaprarum, quibus in horridis rupibus suis abundat Tirolis. Contigit, ut propè Oenipontum, mirâ aviditate reptaret per saxa, manibus pedibusq; ad aliquam hujusmodi caprarum detegendam, aulicis minùs agilibus longè post se relictis. Intentus unè prædæ, non circumspectabat, quò pergeret, quomodo rediret; tandem eò evasit, ut in præcipitio altissimæ rupis constitutus, nec ascendere ulterius, nec descendere valeret, nec ullus hominum eò eluctari auderet, aut posset. Adhibitis frustra omnibus, quæ poterant, mediis indictisq; per  
Eccle-

Ecclesias supplicationibus pro salute Archiducis, cui vel fame, vel lapsu præcipiti pereundum erat; ipse se non neglexit. Tolerato igitur in summa inedia triduo, collegit vocem, altumq; inclamavit, memor Austriacæ pietatis: ut Venerabile Eucharistiæ Sacramentum adferretur; quod siquidem sumere non liceret, saltem oculis eminus delibaret, & prono corpore supplex adoraret. Satisfactum sine mora voto Principis Optimi; indulisitq; ille ad sarietatem pietati suæ: cum ecce sonitum audit, tanquam gradientis inter vicina virgulta, videtq; juvenem pastoritium adreptantem, & bipenni semitam excindentem in rupe. Propior factus monet Maximilianum; fideret DEO, qui ipsum è faucibus mortis eruere posset; acintrepidus sequeretur se ductorem, semitarum omnium inter horribilia illa præcipitia probè gnarum. Respiravit ille, oculisque ac manibus in cælum levatis, gratias agit

git ardentes, pro misso sibi Salvatore.  
 re. Quem fidenter secutus per invia  
 & devia, delatus est in viam, qua  
 securus rediret ad suos. Accurrente  
 certatim aulâ, ductor ille ex oculis  
 evanuit, prodiditq; hoc ipso, quis,  
 & à quo venisset. Maximilianus So-  
 spitatori DEo gratus, in imo rupis  
 cavernam excidi curavit, in qua præ-  
 grandem Crucifixi imaginem posuit,  
 ad perpetuam rei memoriam: bene-  
 dixitq; DEo cum Victrice Judith, cap.  
 13. *Vivit Dominus, quoniam custodivit*  
*me Angelus ejus, & hic euntem, & ibi*  
*commorantem, & inde huc reverten-*  
*tem: & non permisit extingvi scin-*  
*tillam Austriæ! Servavit nimirum il-*  
*lum Providentia Divinâ: ut laudatissi-*  
*imum paulò pòst ageret Imperato-*  
*rem, dictus Maximilianus FORTIS,*  
*propter edita raræ fortitudinis speci-*  
*mina in conficiendis ursis, leonibus,*  
*&c. Obijt anno 1519. Fuxius in me-*  
*moria stirpis Habsburgica.*



*V*ale jam Lector pie, & vide ne ab-  
 erres à domo Beate Aternitatis;  
 quemadmodum aberravit ille, cui in  
 suprema hora adstitit Sacerdos no-  
 ster, & ad periculosum illud iter in-  
 struxit. Ut anima corpus deseruisse  
 visa est: Sacerdos cum circumstanti-  
 bus procidens in genua, Litánias de o-  
 mnibus Sanctis pro defuncto recitare  
 instituit. Et Ecce defunctus sese erigit,  
 & elata voce, Ergo erravimus, in-  
 quit. Coborruerunt omnes, prosecuti  
 tamen sunt Litánias. At ille iterum se  
 erigens, iterum ingeminat: Ergo er-  
 ravimus. Continuant nihilominus o-  
 rantes suas preces, cum tertio se eri-  
 gens defunctus inclamat: Ergo erra-  
 vimus. O errorem, nunquam satis do-  
 lendum, nunquam corrigendum, sem-  
 per puniendum! Perge Viator:  
 sed vide, Quò?

FINIS.

IN-



# INDEX.

## Distractiones Generales.

- DISRRACTIO I. per Orat. frequentem,*
- II. Per piam Meditationem.*
- III. Per Sacrificium Divinum.*
- IV. Per crebras Aspirat: ad DEū & Divoꝝ*
- V. Per colloquia opportuna.*
- VI. Per pias cantilenas.*
- VII. Per lectionem Historicam vel Geo-  
graphicam.*
- VIII. Per lectionem libri Spiritualis.*
- IX. Per Conversationem comem & piam*
- X. Cū Sapientia & Providentia Divina*

## DISTRACTIONES SPECIALES

PER SINGULOS HEBDOMADÆ DIES.

**DIE DOMINICO.** *Cultus SS. Tri-  
nitatis & Conversatio cum eadem. Me-  
ditatio de varijs Itineribus Personarum  
Divinarum. Affectus Pij, erga SS. Trin.  
Hymnus Matutinus & Vespertinus ad  
eandem. Lectio Spiritualis ex Thoma  
Kemp. Digressio in Italiam & adjacentes  
Insulas. Excursio in Africā Septētrionalē.*

**FERIA II.** *Cultus S. Angeli Custodis  
& Conversatio cum eodem, Meditatio,  
Affectus Pij, Hymnus, Lectio Spirit.*  
*Di-*



## INDEX.

Digressio in Germaniam. Excursio in Africam Australem.

FERIA III. *Cultus Divinorum Tutelarum & Conversatio cum iisdem.* Meditatio, Affectus Pij, Hymnus. Lectio Spiritualis, Digressio, Excursio in Americam Australem.

FERIA IV. *Cultus S. Josephi & Conversatio cum eodem.* Meditatio, Affectus Pij, Hymnus, Lectio Spir: Digressio in Hispaniam. Excursio in Americ.

FERIA V. *Cultus Eucharistici Salvatoris, & Conversatio cum eodem.* Meditatio, Affectus Pij, Hymnus Lect. Spir: Digressio in Angliam, Scotiam, Hiberniam Excursio in Asiam usq; ad Gangē.

FERIA VI *Cultus Christi Patientis, & Conversatio cum eodem.* Meditatio, Affectus Pij, Hymnus, Lectio Spir: Digressio in Daniam, Sveciam, Moscho-viam Excursio in Terram Sanctam.

SABBATO *Cultus DEipare V. & Conversatio cum eadem.* Meditatio, Affectus Pij, Hymnus, Lectio Spir: Digressio in Poloniam, Lituaniam, & Prussiam Excursio in Asiam ultra Gangē usq; in Chinam.

LAUS DEO.

in

e-

te-

cio

A-

on-

fe-

ref-

c.

cal-

Me-

pir:

per-

gē.

utis,

atio,

Di-

cho-

n.

x. &

AF

gres-

Ex-

inas.



Biblioteka Jagiellońska



stdr0022098



